

**SEVENTH LEGISLATIVE ASSEMBLY OF MIZORAM
(TWELFTH SESSION)
LIST OF BUSINESS**

FOR THIRTEENTH SITTING ON THURSDAY, THE 30th MARCH, 2017
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

LAYING OF PAPERS

2. **Pu LAL THANHAWLA**, Hon'ble Chief Minister to lay on the Table of the House a Notification No. A. 43016/1/2010-DCA (L) dated. 24th March, 2017 regarding powers and functions of the Lai Autonomous District Council and appointment of Deputy Commissioner, Lawngtlai as a Caretaker of the Lai Autonomous District Council.
3. **Pu P.C. LALTHANLIANA**, Minister to lay on the Table of the House the following :
 - i) Sixth Report of National Commission for Scheduled Tribes for the year 2010-11.
 - ii) Seventh Report of National Commission for Scheduled Tribes for the year 2011-12.
 - iii) Eighth Report of National Commission for Scheduled Tribes for the year 2012-13.

**FINANCIAL BUSINESS
DISCUSSION AND VOTING ON DEMANDS**

4. **Pu LAL THANHAWLA**, Hon'ble Chief Minister to submit to the vote of the House various Demands under his charge.

**LEGISLATIVE BUSINESS
*Bill for introduction, consideration and passing***

5. **Pu LALSAWTA**, Minister to beg leave of the House to introduce "The Mizoram Appropriation (No. 2) Bill, 2017".

**ALSO
to introduce the Bill
to move that the Bill be taken into consideration
AND
*to move that the Bill be passed.***

NGURTHANZUALA
Secretary

.....

SPEAKER : A tawp berah chuan unaute u, lawm takin awm rawh u, tihthat famkimin awm ula, thlamuang takin awm ula, rilru hmunkhat pu ula, inrem takin awm rawh u. Tichuan hmangaihna Pathian chu in hnenah a awm dawn zuk nia.

(II Corinthians 13:11)

Zawhna no.178-na neitu Dr.K. Beichhua sawm ila.

Dr.K.BEICHHUA : Pu Speaker, ka lawm e. Starred Question No. 178-na Higher & Technical Education Department changtu hnena ka zawhna chu –

- a) Mizoramah hian Government College engzatnge awm ?
- b) Assistant Professor post ruak engzatnge awm ?
- c) Part time-a Lecturer rawih mi engzatnge awm ?

SPEAKER : Chhang turin Minister zahawm tak Pu R.Romawia sawm ila.

Pu R.ROMAWIA, MINISTER : Pu Speaker, ka lawm e. Member zahawm tak Pu K.Beichhua zawhna chhanna chu –

- a) Mizoramah hian Government College hi 21 (sawmhnih pakhat) a awm.
- b) Assistant Professor post ruak hi 122 (za sawmhnih leh pahnih) a awm.
- c) Government Colleges leh institutions ah a vaiin part-time Lecturer (Assistant Professor) 201 (zahnih leh pakhat) rawih a ni.

Hetiang in :-

1. Government College-182
2. Mizoram Law College-5
3. Mizoram Hindi Training College -3
4. IASE-6
5. Mizoram Polytechnic, Lunglei-5

Dr. K.BEICHHUA : Pu Speaker, ka zawhbelhna chu-1) Kum 2014-ah khan College Principal recruitment advertised a ni em? Advertised ni ta se diltu an awm em? Awm ta se mi engzat in nge dil? Lak an awm em? Recruit loh ni ta se engvanga recruit lo nge?

2) Assistant Professor post ruak hi tun hnaiah lak tum a awm em? Part time-a Lecturer ruai tur hian advertisement a ngai em?

3) Contract Lecturer te hi kum 5 an thawh hnu hian regularize theih an ni em? Regularise tur hian eng criteria nge ngai?

SPEAKER : Zawhbelna dang a awm loh chuan Minister chhang turin i lo sawm ang.

Pu R.ROMAWIA, MINISTER : Pu Speaker, College Principal ng het neih hi kan sorkar hian a duh em em a. Kum 2014 khan chutiang chuan advertisement pawh an chhuah a. Amarawhchu, UGC lam atangin an dan siamthat deuh hlek a awm a. Chuvang chuan thiltih fel a nih hma khan khami dan siamthat zul zui khan tih a ngai ta a. Hun kha a duh a, tunah pawh department chuan theihtawpin kan la zel a, MPSC lak tur a ni hrim hrim a. Tin, diltu pawh kha 14 vel in an dil a, mahse kha dilna kha a thar a tih a ngai leh dawn a ni.

Tin, part-time Lecturer kan lak turte hi advertisement tih a ni a, Commissioner Secretary, Higher & Technical Education hovin hemi hi lak thin a ni ta. Tun hma kha chuan Principal-in-a remchang chang an lo la thin a, tunhnuah chuan a khuangrual deuh hlekin ti ila tiin lak an ni ta a ni.

Tin, Contract Lecturer te hi chu contract an nih ang ngei hian MPSC through a lak an ni a, chuvangin contract Lecturer te hi chu hnaruak te a lo awm a fill-up a nih chhoh chuan MPSC kaltlangin a ngehta lak an ni.

SPEAKER : Starred Question no.179-na ah kan kal ang a, a neitu Pu Lalruatkima i lo sawm ang.

Pu LALRUATKIMA : Pu Speaker, ka lawm e. Ka Starred Question no.179-na Minister zahawm tak chhan atan.

- a) Mizo Carbon hian VAT registration a nei em? Engtikah nge a neih a, tunga a neitute? Proprietorship/ Partnership a ni em ni ?
- b) VAT Registration te hi partnership a nih hnu ah proprietorship ah thlak a ni em? A nih chuan engtikah nge thlak a nih ? Engvanga thlak nge an nih?
- c) Mizo Carbon in engzatnge lungalhthei a lakluh tawh a, truck trip engzatnge a lakluh tawh?
- d) Engtik chhungin nge a lak luh? Bungraw lakluh hlut zawng enge? VAT etc. engzatnge a pek tawh?

Pu LALSAWTA, MINISTER : Pu Speaker, Starred Question no.179-na chhanna chu hetiang hi a ni:

- a) Mizoram Carbon Products hi Mizoram Value Added Tax Act, 2005 hnuiah register a ni. A proprietor chu Margaret Varte a ni a, proprietorship a register a ni.
- b) Mizo Carbon Products hi Indian Partnership Act, 1932 hnuiah register a ni a, an registration no. hi RF/MZ-94 of 2011-2012-ah proprietor-ah thlak a ni. A chhan chu partner Shri Ravi Gulgulia a inhnuhdawh vang a ni.
- c) M/s Mizo Carbon Product hian lungalhthei 29046.2 MT an phurh luh record a ni. Hei hi truck trip 2,368 a ni. M/s Carbon Product-in ni 4.1.2012 to 10.7.2014 chhungin bungrua an lalut a, a hlut zawng nia record chu ` 11,33,93,394.00 (rupees eleven crore thirty three lakhs ninety three thousand three hundred ninety four) only a ni a, VAT an pekzat hi `40,00,403.00 (Rupees forty lakhs four hundred three) a ni.

SPEAKER : Zawhbelhna.

Pu LALRUATKIMA : Pu Speaker, ka lawm e. Ka zawhbelhna chu, industrial registration, district industry office DIC Aizawl-ah partnership deed hi hnukdawk in, Ravi Gulgulia hmingin dah a ni leh lawi si a, helaiah hian Taxation department ah Gulgulia hi a inhnuvdawk leh lawi bawk si a, tunge a neitu zawk tak ni ang? Record-a awm dan tur, Taxation leh Industry registration kha neitu a inang ta lo tihna a ni a. Hei hi enge a chhan tih leh helai a Industry department chhanna thin ah hian a neitu hi Dr. Margaret M. Varte tih a ni a.

Tuna Minister zahawm tak chhanna ah khan Margaret Varte a ni a, ziak kha a kim lo deuh nge tih kha ka zawhbelhna ni sela.

Tin, ka hriat sual loh chuan Pu Spaeker, Supreme Court ruling-ah tribal hmeichhia in non-tribal pasal a neih chuan tribal nihna a hloh dawn tih a ni si a, chutah chuan Margaret Varte hian permanent registration hi a nei thei dawn em ni tih kha ka zawt a. Chubakah tuna kan Minister zahawm tak chhanna atang khan truck trip 2368 a rawn lut tawh tiin min chhang a, tun session Unstarred Question 50-na Dr. K. Beichhua zawhna ah khan way bill 2,207 pek chhuah a ni an ti a, chuti a nih chuan way bill pek chhuah loh 161 awm hi engvanga way bill tello a check gate rawn paltlang nge tih hi ka

zawhbelhna a ni a. Tin, record-a RTI leh a dangte kan hmuh angin nikhatah check gate hi truck 3 hian vawi ruk, truck pakhat in vawiruk a paltlang a, truck pahnih hian vawi nga a paltlang bawk a, chu chu Khleriat atanga Aizawl inkar rawn kal tur tih a ni bawk si a, enge a chhan? He lai hi ziak diklo a awm nge, record dikloh luih tih kha ka zawhbelhna ni sela. Tin, proprietor chhungkhat hnai tak, registration tih vel laia department a enkawltu thlak that a ni hi enge a chhan ti kha ka zawbelhna a ni.

SPEAKER : Chhang turin Minister zahawm tak Pu Sawta sawm ang.

Pu LALSAWTA, MINISTER : Pu Speaker, member zahawm tak Pu Lalruatkima zighthna, Industry department lamah chutiang chu a ni zawk si tih kha ka chhang thei lova, department dang a nih avangin. Tin, non-tribal a ni tawh a, Supreme Court-in a tih chungchangah khan chutiangin tunah hian ka chhang mai thei lo bawk a. Tin, hemi chungchang hi chhui mek a ni a, ACB-in an chhui mek a, chuvangin a zighthna awm thenkhat te pawh kha an chhui mek atanga la chiang tur a niin ka ring a. Court a awm, subjudice ni lo mahse chhui mek a nih vang hian document thenkhat pawimawh te an la bawk a, chuvang chuan kan member zahawm tak in a rawn zawhbelh tam tak kha department kutah document hi a awmlo a ni.

SPEAKER : Chhui mek a ni a, i duhtawk ang aw. Zighthna 180-na ah kan kal thei ta a, zighthna neitu member zahawm tak Pi Vanlalawmpuii Chawngthu zawt turin sawm ang.

Pi VANLALAWMPUII CHAWNGTHU : Pu Speaker, ka lawm e. Starred Question no. 180-na Public Health Engineering Department changtu Minister zahawm tak chhan atan Bungtlang leh Keitum tui harsa lutuk tan hian Department-in hmatakna a nei tawh em? Pu Speaker, ka lawm e.

SPEAKER : Chhang turin Minister zahawm tak Pu Zodintluanga sawm ang.

Pu ZODINTLUANGA, MINISTER : Pu Speaker, member zahawm tak Pi Vanlalawmpuii Chawngthu Starred Question no. 180-na chhanna chu:- Bungtlang leh Keitum tui harsatna sut kian nan hian Tuichang lui pump na tur in survey and investigation neih mek a ni.

SPEAKER : Zawhbelhna a awm em ? Aw, Er. Rinawma a phar hmasa.

Er. LALRINAWMA : Pu Speaker, ka lawm e. Ka zawhbelhna chu, (a inthenawm tho bawk a, min chhan theih chuan a lawmawm ngawt in ka ring a) Tlungrvel-

ah khian tui te an han pump a, quarter sak hi kan mamawh khawp mai a, ruahmanna te pawh siam tawh niin ka hre deuh a, tun dinhmun ah eng chen nge kalpui a nih tawh tih kha min chhan thei chuan a lawmawm khawp ang.

SPEAKER : Pu Sangkunga'n zawt law law se.

Pu T. SANGKUNGA : Pu Speaker, ka lawm e, Keipawh a chhak chiah constituency mai kha a nia, kan Minister hian a chhan theih tho han ring ta ila. Khawbung, Khuangthing, Bungzung leh a hran hranah kan tui harsatna te min phuhruk turin thanemngai takin kan Minister hian hna min thawhsak a, kan lawm em em a. Amaherawchu tui lak a harsat avangin Farkawn, a khawlian ber khi tui a har ber a, ti ngaihna avang khawp mai. Tui zem lian eng emaw zat siam a, fur laia rain water harvest emaw, kawrte tui han lak a, fur lai ami chhek khawl mai loh chuan tihngaihna a vang bawk si a, an khua khi a thang chak bawk si a, kan Minister chak tak hian Farkawn tan tui an harsatna hi engtin emaw solve sak turin min pui thei ang em le tih kha a chhan theih tho ka ring a, ka han zawt a ni. Pu Speaker ka lawm e.

SPEAKER : Pu Lalrinliana Sailo in zawt nghal se.

Pu LALRINLIANA SAILO : Pu Speaker, ka lawm e. A chhak bial leh a thlang bial in an zawh chuan zawh ve a ngai in ka hria. Tuichang tui lak khi min laksak dawn in ka hria a, Khawhai tui lak khi enge an thlen tawh a, engtikah tak nge bul an tan theih ang tih kan Minister zahawm tak hi ka zawt e.

SPEAKER : A tawpna atan Pu K. Sangthuama.

Pu K. SANGTHUAMA : Pu Speaker, hmanni ah ka sawi tawh tho na in, Sairanga tui cluster an hlih sak vek mai khu vuahsak leh theih mai a ni ang em tih ka zawt e.

SPEAKER : Keitum atangin Sairang lam kan peng ta daih a, Minister zahawm tak sawm ang, chhan theih theih chhang turin.

Pu ZODINTLUANGA, MINISTER : Pu Speaker, member zahawm tak tak te zawhbelhna kha, sorkar hian mipui te hnenah tui thianghlim in tur tam tawk pe tur hian nasa takin tan a la a, scheme hrang hrang NLCPR, NEC, NRWDP atang ten a theih ang angin hma a la a; tin NABARD atang te in hma a la a, chungah chuan tuna member zahawm tak tak sawi te kha, ram pum ah tui in tur tha an neih theihna atan scheme atang khan kan buaipui mek a. Member zahawm tak Er. Lalrinawm zawhna tunah tak hian

engchennge a kal tih lai kha ka chhang mai thei lova. Tin, Pu T. Sangkunga'n Farkawn tui harsatna a sawi kha nichina ka sawi tawh ang khan scheme hrang hrang NLCPR, NEC, NABARD atang te leh scheme pangngai atang hian buaipui reng a ni. Tin, Khawhai pawh kha sorkarin theihtawpin tan a la mek a ni tih kha ka chhanna ni sela. Sairang kha a zawhna kha ka hrechiang hman lo va.

Pu K. SANGTHUAMA : Pu Speaker, tunah khuan public point an va lakna thin kha Sairang-ah khuan an siam a. Chu chu tunah khuan cluster an siam kha an phawi vek a, tui an nghei ta a. Private connection nei thei kha an tlem ropui mai si a, an harsa em em mai a. A thlangah luipui a luang na a, tui in tur an nei manglo a ni. Chuvangin khumi khu a tih sak leh theih lawm ni tihna a ni e.

Pu ZODINTLUANGA, MINISTER : Pu Speaker, hmanni khan ka chhang tawh tho in ka hria a. Sairang Water Supply khu central lam atangin rokhawlhma eng eng emaw a awm avangin kum tam tak sanction kha hmuh loh a ni a. Amaherawhchu tunah hian sanction te a lo chhuak tawh a. Tui connection neih theihna tur atan bul tan chhoh mek a ni a. Sairang chu hmanni kan sawi ang khan tui connection la thei khu an la tam rih loh avang khuan public point khu a tam thei ang bera dah tura hma lak mek a ni tih kha ka chhanna a ni e.

SPEAKER : Zawhna no.181-naah kan kal ang a. Zawhna intawm a ni a, a hmasa zawk hi zawt turin ka ko mai ang a. Er.Lalrinawma, MLA zahawm takin zawt se.

Er.LALRINAWMA : Pu Speaker, ka lawm e. He zawhna hi Pu Lalruatkima MLA zahawm tak nen kan intawm a ni a. FCS&CA Department changtu Minister zahawm tak hnena ka Starred Question 181-na chu –

- (a) Ration chini engtik atang khan nge Retailer kaltlangin mipui hnenah sem a nih tawh loh ? Engvanga sem tak loh nge a nih?
- (b) Engtiknge sem hnuhnun ber ?
- (c) Tun dinhmunah sem leh tumna a awm em ?
- (d) Central sorkarin chini subsidy kg. khat zelah cheng engzatnge a pek theih ? Engzatnge thla khatah mamawh a nih?
- (e) Kum 2013-2014 chhungin chini subsidy sum tur cheng engzatnge central sorkarin a rawn release? Chini subsidy-na UC tum engzatnge thehlut tura

hriattirna dawn a nih tawh? Engtikahnge hriattirna dawn a nih tih ka zaws e, Ka lawm e.

SPEAKER : Department changtu Minister zahawm tak Pu John Rotluangliana chhang turin sawm ila.

Pu JOHN ROTLUANGLIANA, MINISTER : Pu Speaker, member zahawm tak Er.Lalrinawma leh Pu Lalruatkima zighthna intawm Starred Question 181-na chhanna chu –

- (a) Ration chini hi January, 2014 atang khan Retailer kaltlangin mipui hnenah sem a ni tawh lo.

Kum 2013 bul lamah central sorkarin subsidise sa a chini min rawn pek thin chu open market-a lei a, annin subsidy `18.50 per kg rawn tum a a bak hi state sorkar-in tum tur leh Ration chini chu kg. khat zelah `13.50 aia sang lo va hrall turin order a chhuah a. He mi atana state sum hman tur hi a tam tham deuh avangin December, 2013 thleng bak chu sem zui tak loh a ni e. Tilaiah hian tlemin Pu Speaker, ka'n sawifiah deuh hlek ang a. Central sorkarin subsidise sa a min pek thin kha subsidise ni tawh lovin `18.50 per kg a subsidy kan rawn pe ang che u ang a, a bak chu state sorkarin in tum ang. Tin, a hrallna tur rate kha `13.50 per kg a ni ang, an ti bawk si a. Khatihlai khan open market-ah kan lei dawn chuan `38 per kg a ni a. Chuvangin state sorkar khan 1 kg zelah `15.50 tum a ngaih tak avangin hei hi kan chhunzawm thei lo a ni.

- (b) December, 2013 kha ration chini sem hnuhnun ber chu a ni.
 (c) Tun dinhmunah ration chini sem leh tumna a la awm rih lo.
 (d) Kum 2013 ami ang tho khan tun thlengin central sorkarin chini 1 kg zelah subsidy `18.50 a pe thei a. Khatih hunlaia central allocation 6,660 quintals per month atan khan central subsidy hi `1,23,21,000/- per month a ni. Sem leh tur ni se chuan a dawng thei tur chin te, an dawn zat tur chinte leh Retail Issue Price tur zat leh chini subsidy atana state sum hman belh tur zat te hi a hrana chhut chawp tur a ni

ang. Tunah chuan a rate a lo danglam leh tawh a. Hemi kan lehkha hmuh lai hi 2015 a nih tawh avangin. Tin, chumi rual chuan 6660 quintals chauh hi central atanga allocation min pek theih a ni a. A bak chu open market atanga lei vek tur, 6660 bak hi chu subsidy min pe thei lo bawk a ni.

(e) Kum 2013-2014 chhungin central sorkarin chini subsidy atan ` 3,42,99,000/-

(Cheng vaibelchhe thum nuai sawmli pahnih singkua leh sangkua) min rawn pe a ni.Chini subsidy hmanna tur UC thehlut tur hian tum thum – ni 30.9.2014, ni 23.12.2015 leh November, 2016-ah te hriattirna dawn a ni.Pu Speaker, ka lawm e.

SPEAKER : Zawhbelhna chu Pu Ruatkiman zawaht hmasa se, a neitu a ni ve tho a.

Pu LALRUATKIMA : Pu Speaker, ka lawm e. Minister zahawm tak khan Retailer kaltlangin January, 2014 atanga pek a nih tawh loh thu a sawi a. December 2013-ah kan sem hnuhnung ber a ti a. Amaherawhchu Pu Speaker, ka lehkha neih hi ni 18, June, 2014 khan March thla atan mi pakhat tan 4 gram zela pe turin DCSO (E) leh (W) hnena lehkha a ni a. Chutih a nih chuan March thla pawhin an la sem a, January thlaah sem hnuhnun ber tih a ni bawk si a. Khalaia sem tur tih kha, he thil a sem tur tih kha a bo ta mai em ni ? Mipui hnen a thleng lo em ni ? Engnge a chhan tih kha ka zawhbelhna ni sela.

Tin, a dang lehah chuan tuna UC hriattirna vawihnih lai mai December, 2015 leh November, 2016-a central atanga UC pe thla tura hriattirna min pek kha tunah engnge a dinhmun tih leh chini subsidy tur hi advance in kan lo dil thin reng em ? Kan lo dil thin a nih chuan 2012 atanga 2014 kan sem hun chhung, kan dawn hun chhung inkarah khan engzatnge subsidy advance in kan lo dil tawh tih kha ka zawhbelhna a ni.

SPEAKER : Pu Rinawma'n zawaht ve law law se.

Er.LALRINAWMA : Pu Speaker, ka lawm e. Heng subsidy sum an rawn release te hi hman zawh vek a ni em tih ka zawhbelh e.

SPEAKER : A dang a awm tawh loh chuan Minister zahawm takin a pahnih khan chhang sela, i sawm ang.

Pu JOHN ROTLUANGLIANA, MINISTER : Pu Speaker, member zahawm tak Pu Ruatkima zawhbelhna chini kha July thla te pawh in 2014-ah khan an la sem a tih kha Aizawl (E) leh (W) DCSO hnuiah khan a dik a. A chhan chu December, 2013-a

ration chini sem kan tih tawp khan a stock kha a la zo vek lo a ni. Chuvangchuan a bang nawi a la awm a, chu chu khawpui hnaiah hian i sem mai ang u, kan ti a. Chutiangchuan kan sem ral ta a ni.

(Interruption) August 2014 hnu ah kha chuan pakhatmah kan sem tawh lo. A pumpuia kan sem tawh loh avang khan Pu Speaker, hetilai DCSO pahnih chauh hnena kan sem avang khan. Kha kha a pumpuia kan chhanna kha chu December, 2013 a ni a. A bik te la bang kan sem te a nih avang khan a chhannaah khan kan ti tel vek lo a ni.

Pu LALRUATKIMA : Pu Speaker, khawngaihin kan Minister zahawm tak khan engtikah nge sem hnuhnun ber ti a kan zawk kha khatiang khan min chhang mai sela. December, 2013-ah kan sem hnuhnung ber a ti a. Tuna a dik ang khan min chhang mai sela.

Pu JOHN ROTLUANGLIANA, MINISTER : Chhannaah khan kan ti tel vek lo a ni. Chu chu sem lohna kha DCSO 8 a ni a, a tam zawk si a, 4 chauh kan pe si a, hemi hi kan tih vek chuan keini pawhin kan dawng lo an rawn ti leh sup sup mai ang. Chuvangin a pumpuia kan sem chin kha kan rawn ziak a, a chuang bang kan sem chin kha tunah khan zawhbelhna ah khan ka'n chhang leh mai a ni e.

Tin, Pu Speaker, 2012-2014 inkarah engzah nge subsidy advance pek a nih tih hi Pu Speaker, ka lo inring chiah lo a ka chhang thei mai lo a, member zahawm tak khan min hrethiam se.

Tin, Er. Rinawma zawhna- subsidy hman zawh vek a ni em tih kha hman zawh vek a ni e, ka lawm e.

Dr. K. BEICHHUA : Pu Speaker, DCSO kha duhsak bik kan nei ta em ni? Engatinge thingtlang lam mirethei zawk te min pe lova Aizawl East leh West kha pek an nih bik tih ka zawhbelhna a ni e.

SPEAKER : Minister-in chhang sela, a hnaivai tih kha.

Pu JOHN ROTLUANGLIANA, MINISTER : Pu Speaker, a tlem tham tawh si a, a bangnawi te chauh kha a ni a, a hla zawka sem khan a phurh man te kha a ngai leh a, chuvang chuan a hnaivai khawpuiah kan tiral ta mai a nih kha, member zahawm tak te khan min lo hriatthiam ka beisei.

SPEAKER : A lawmawm e. No. 182-naah kan kal thei ta a. Zawhna neitu Pu Lalruatkima MLA zahawm takin zawt se.

Pu LALRUATKIMA : Pu Speaker, ka lawm e. Ka Starred Question no. 182-na Planning & Programme Implementation Deptt. changtu Minister zahawm tak chhan atan-

- a) Kum 2011-2016 chhungin nau piang engzatnge chhinchhiah an nih a, Birth Certificate leh Delayed Certificate pek chhuah an nih? A year wise in?
- b) Birth Certificate leh delayed Birth Certificate atang hian engzatnge sum hmuh a nih? A year wise in?
- c) Ramdang mi hnenah Birth Certificate hi pek chhuah a ni em? A nih chuan engzatnge?
- d) Kum 2012 – 2016 chhungin mitthi engzatnge chhinchhiah an nih a, Death Certificate engzatnge pek chhuah an nih?

SPEAKER : Hei hi kan lo tihsual palh nge ni Un-starred Question-a kal tur niawm tak a ni a, a chhanna hi a sei lutuk a. Engpawhnise kan lo telh tawh si a, Minister zahawm takin a theih ang angin han chhang se. Pu Sawta ilo sawm ang.

Pu LALSAWTA, MINISTER : Pu Speaker, member zahawm tak Pu Lalruatkima zawhna Starred Question no. 182 chhanna chu:-

a)

Kum 2012-216 chhunga nau piang zat leh Birth Certificate leh Delayed Certificate pek chhuah zat chu a hnuai ami ang hi a ni.					
SL No	Year	No. of Birth	Birth Certificate pek chhuah zat	Delayed Certificate pek chhuah zat	Total
1	2012	26,042	26,042	1,952	27,994
2	2013	24,584	24,584	1,973	26,557
3	2014	24,516	24,516	1,688	26,204
4	2015	24,786	24,786	5,568	30,354
5	2016	20,511	20,511	4,056	24,567

	(Provisional)				
--	---------------	--	--	--	--

b)

Birth Certificate leh delayed Birth certificate atanga sum hmuhzat chu ahnuai ami ang hi a ni		
SL No	Year	Birth/death Certificate leh Delayed Birth/Death Certificate atanga sum hmuh zat
1	2012	` 1,85,550.00
2	2013	` 1,91,497.00
3	2014	` 2,00,252.00
4	2015	` 31,92,933.00
5	2016	` 63,17,720.00
	Total	` 1,00,87,952.00

c)

Ramdang (Foreigner) mi hnenah Birth Certificate hi pek chhuah zat chu a hnuai ami ang hi a ni :-		
SL No	Year	Ramdang mi hnenah Birth Certificate pek chhuah zat
1	2012	4
2	2013	17
3	2014	5
4	2015	5
5	2016	Report not yet received

d)

Kum 2012-216 chhunga mitthi chhinchhiah zat leh Death Certificate leh Delayed Certificate pek chhuah zat chu a hnuia mi ang hi ani e.					
SL No	Year	No. of Death	Death Certificate pek chhuah zat	Delayed Death Certificate pek chhuah zat	Total
1	2012	6503	6503	732	7235
2	2013	6126	6126	513	6639
3	2014	6444	6444	550	6994
4	2015	6440	6440	621	7061
5	2016 (Provisional)	6137	6137	330	6467

SPEAKER : Zawhbelhna a la awm ta fo a, kha kha a sei lutuk.

Pu LALRUATKIMA : Pu speaker, a va pawimawh em aw ka ti, kan hnam survival tunah khan a lang in ka hria a. Kum tina piang han en khan 2013 – 2014 leh 2014 - 2015 in karah khan piang kan tlem tlat a ni, kha kha kan in en let ngaiin ka hria a, sorkar pawhin policy kan en let ngaiin ka hria. Tichuan 2014 – 2015 leh 2015 -2016 ah khan kan punna chu birth certificate hi 98 % chuan kan la nghal in ka ring a, damdawi in ah kan nei ngei in ka ring a, 270 chauh a ni kan punna kha. Kha lai te kha a serious khawpin ka hria. Chuvangin tu te pawh in dem thei kan ni lo, kan hnam pun zel dan birth certificate atanga a lan dan kha chuan kan tlem hle mai tih kha ka rilru ah a awm len avangin helai hi ka vei khawp mai a, ka zawh belh na chu ram dang mi mi 31 an la tel leh nghal a, punna awm a kan ngaih kha kan pung lo chu a ni mai thei. By birth in citizen a nih theih bawk si a, kha kha India citizen a ni mai dawn nge tih kha ka zawhna ni sela. Tin, birth certificate te, death certificate te, delayed birth certificate lak na kha 2012-2014 inkar ah khan a pangngai viau laiin, 2015 atang khan a rawn pung thut mai a, engvanga pung thut nge tih kha ka zawh belhna a ni e.

SPEAKER : Awle, chu mi chin chu duh tawk ang, Minister zahawm takin chhang se.

Pu LALSAWTA, MINISTER : Economical & Statistics Department buatsaih a ni a, member zahawm tak zawhbelhna India citizenship an nei thei nghal dawn em tih kha

India Constitution Article 5-na ang leh India Constitution hnuia dan siam in citizenship a pek theih te ang kha an fulfill chuan India citizenship pek theih an ni ang tih a ni a. Tin, kha mi kuma lo pung hluai tih chungchang kha an pian miau emaw, an thih miau emaw kha chuan kan chhinchhiah chu a ni mai a, keini ah chuan chutiang baka han hrilhfiah ngaihna chu ka hre lo.

Pu LALRUATKIMA : Pu Speaker, kan Minister zahawm tak khan a pung hluai a tih na kha sum zawk kha a ni a, a hma khan nuai sawm hnih te, nuai khat singkua tih bawr vel a delayed birth certificate leh delayed death certificate atanga kan sum hmuh kha ni a. Kum 2015 ah khan nuai 31 a lo kai a, 2016-ah khan nuai 63 a lo kai ta dawrh mai a, enge a chhan tih kha ka zawhna a ni, a hre fuh tawk lo pawh a ni mai thei.

SPEAKER : Minister in chhang leh se.

Pu LALSAWTA, MINISTER : Eng kum ah chiah nge ka hre lo a, he House-ah hian amendment kan siam a, kan siam nachhan kha delayed birth certificate te, delayed death certificate te an ngaihsak loh thin lutuk avangin a rate kan ti pung a. Tin, he dan kan lo neih thin reng reng hi kan khawih khat khawp a, pawisa ang zawng te khan, a cheng pawh ni pha manglo te khan a rate te kha alo awm deuh bawk a. Chuvangin a rate kan ti sang a, a rate sang kan hman atang khan a man kha a lo pung chho ta hlawm a ni. Nichin ah khan a mihring lam emaw ka ti a, ka lo hriat sual palh zawk a ni.

SPEAKER : Awle, nakin zelah chuan member zahawm tak te hriat atan hetianga chhanna thui tak mamawh chi hi chu Unstarred-ah khan telh hram ni sela a tha ang e. Zawhna no. 183- na ah kan kal thei ta a, zawhna neitu Dr. Ngurdilingiana MLA zahawm tak ilo sawm ang.

Dr. NGURDINGLIANA : Pu Speaker, ka lawm e. Ka Starred Question no. 183 – na Higher & Technical changtu Minister zahawm tak chhan atan.

Mizoram chhunga College hrang hrang te University Grant Commission-in National Accreditation Assessment Committee Peer Team kaltlanga grading an pek thin, a san dan indawtin min hrilh thei em? Tun dinhmun ah college la endik ve loh a awm em?

SPEAKER : Minister zahawm tak kan sawm ang a, hei pawh hi Unstarred-a kal chi a nia, a thui deuh hlek a, mahse han chhang tho sela.

Pu R. ROMAWIA, MINISTER : Mizoram chhunga College hrang hrang UGC in National Accreditation & Assessment Council Peer Team kaltlanga grading a pek tawh, a san dan indawt chuan hetiang a ni:

NAAC ACCREDITATION OF GOV'T COLLEGES IN MIZORAM TILL 2016			
Sl No.	College	NAAC Assessment hnuhnung ber kum	Grade
1	Gov't Hrangbana College	2011	A
2	Gov't Champhai College	2016	B++
3	Gov't Aizawl College	2016	B++
4	Gov't Zirtiri Residential Science College	2016	B+
5	Gov't Serchhip College	2016	B+
6	Lunglei Govt. College	2007	B
7	Gov't Lawngtlai College	2008	B
8	Gov't Aizawl North College	2009	B
9	Gov't Johnson College	2010	B
10	IASE/CTE	2016	B
11	Gov't Mamit College	2015	B
12	Gov't Kolasib College	2006	C++
13	Gov't Saiha College	2007	C++
14	Gov't T. Romana College	2007	C++
15	Gov't J. Thankima College	2016	C++
16	Gov't J. Buana College	2015	C+

17	Gov't Saitual College	2009	C
18	Gov't Aizawl West College	2010	C
19	Gov't Hnahthial College	2015	C
20	Gov't Zawlnuam College	2016	C

Tun dinhmun ah college la endik ve loh pali an awm a, chung te chu – Govt. Khawzawl College, Govt. Kamalanagar College, Govt. Mizoram Law College leh Mizoram Hindi Trainning College te hi NAAC Peer Team in an la rawn endik rihlo a. Kumin chhung ngeia rawn endik turin hma lak mek a ni.

SPEAKER : Zawhbelhna a neitu Pu Ngurdingliana i lo sawm ang.

Dr. NGURDINGLIANA : Stared Question-a ka zawh nachhan chu public interest a nih vang a ni. Naupangin College admission an tih dawn in a grading base-a an thlan theih nan leh college ten an dinhmun hriaa tan an lak lehzual nan ka zawt a ni.

SPEAKER : Zawhbelhna a ni tehchiam lo a, i duh tawk ang. No. 184-na ah kan kal ang a, zawhna neitu Er. Lalrinawma MLA zahawm takin zawt sela.

Er. LALRINAWMA : Pu Speaker, ka lawm e. Public Health Engineering Department changtu Minister zahawm tak hnena ka zawh na –

- (a) Tun dinhmunah PHE Department hian work contract-ah a ni emaw procurement ah a ni emaw tender an chhuah in eng bidding document nge a hman thin?
- (b) Funding Agency ten bidding document hman bik an nei em?

SPEAKER : Minister zahawm tak Pu Zodintluanga chhang turin sawm ang.

Pu ZODINTLUANGA MINISTER : Pu Speaker, 184-na zawhna hi tun dinhmun ah PHE department hnuai tanky siamte tui dahkhawl theihloh chungchang ah report dawn a awm em tih a ni a. (inmil lo zawhna kha) Aw, ka chhang thei thova. Hei hi hmannia member zahawm tak opposition group leader ten an rawn sawi, ‘hemi copy hi nei ve ila’ tih kha hei vawiinah a rawn dik chiah a. Kan business-ah hian ‘Question entered in separate list to be asked and oral answers given’ tih a ni a. Tuna oral-a kan chhan chiah hi recorded a ni a; tin, helaia ziaka awm hi kan chhanna min guide tu mai a

ni a. Chuvangin official a ni tih kha kan rawn sawi duh a. Ka chhang thei reng a, eng zawk nge, kha tho kha ka chhang dawn nge ni ang? Ka chhang thei tho va, Pu Speaker.

SPEAKER : A zawhna lo kan lo ziak palh em ni ? Aw, a nih chuan Assembly Secretariat-in an lo tisual palh a ni ang a. Chuvangin House ngaihdamna ka han dil nghal e. Engtinnge a zawhna dik zawk chu kan hre thei mai tawh si lo. Aw le, (Deputy Speaker : A chhan theih tho chuan tuna member in a rawn zawhna kha chhang sela).Chhang rawh le.

Pu ZODINTLUANGA , MINISTER : Pu Speaker, nia, kan Assembly hi kan ti hah a, department hian vawiina chhuak tur te hi tlai tawk ah te an submit chauh a, document tam tak an compile a tihsual hi an nei tlem ka ti zawk khawp mai. Pu Speaker, hetianga lo awm zeuh te pawh hi kum hei leh chen an efficient zia hetiang buai awmlo a kan awm hi, hetiang lo chhuak hi, hetiang zozai question leh answer department hrang hrang rawn lut felfai taka an ti hi Assembly chungah pawh Pu Speaker, lawmthu ka'n rawn sawi hmasa duh a.

Member zahawm tak Er.Lalrinawma zawhna kha tun dinhmunah PHE Departmet chuan work contract leh procurement chungchangah CPWD Contract Documents (CPWD form 7/8) a hmang thin a. Standard bidding documents hi Ministry of Statistics and Programme Implementation, Govt. of India leh Ministry of Surface Transport, Govt of India bidding documents zulzui in siam a ni a. Draft standard bidding document hi sorkar pawmpuina nghah mek a ni. A zawhna pahnihna kha engtin nge ni kha, i sawi nawn leh thei em? Funding Agency ten Bidding Document hman bik kan nei lo tih a ni e.

SPEAKER : Zawhbelhna maw ? Pu Rinawma zawt rawh le.

Er. LALRINAWMA : Pu Speaker, ka lawm e. Nichina Minister zahawm tak min chhanna kha Subject Committee-III ten July ni 8, 2015-ah House-ah an lay tawh a, he paper hi. Public property a ni tawh a, helai min chhanna ah hian standard bidding document kha (nikum hmasa tawh a nih chu) ‘kan nghak mek a ni, an process mek a ni, sorkar pawmpui na kan nghak mek a ni,’ ti khan min chhang a. Kha kha a rei riau khan ka hria a, kum 2 dawn a vei tawh a. Hei hi kan sawina kher chu Pu Speaker, tawite in

tawngkam hnih khat lekin. Hei hi kan ngai pawimawh em em mai a. A chhan chu hei hi Lawngtlai Water Greater Supply Scheme aggreement copy a ni a.

Hetah hian PHE department te hian an huntiam hun chhung hi thla 30 an pe a, stipulated period hi, amaherawhchu an rate hi an aggreement Schedule-III , payment, terms and condition section 2-na ah hian thla 24 chauh a dam si a, tichuan thla 30 hun an pe a, thla 24 chauh a dam si chuan thla 6 chhung zet he rate hian a huam lo tihna a ni ta a ni. A engamah hma khan hna kan zawrh chhuah in pawisa daihlo in kan zuar chhuak tihna alo ni nghal a. Tin, starred question no.101-naa kan hmuh, Minister zahawm takin min chhanna ah hian ni 23 khan Lawngtlai Greater Water Supply chungchanga pawisa sen ral an tih khan crore 9 zet mai kha pawisa sen belh a rawn ziak ta bawk a ni. Chutichuan hei hi thil inzawm tak a nih avanga Pu Speaker, sawi chhuak duh ka ni a. Hetianga kan tender hun chhung pawh daih lova rate kan chhuah hi chuan chawi belh lo thei lo kan nih avangin standard bidding document hmang hian felfai takin tih a tha e tiin Assembly Subject Committee-te chuan taima takin an lo bei tawh a ni.

Amaherawhchu Pu Speaker, 2015-a thehluh tawh si vawiin thlenga hna kal lo lai kha enge a awm zia? Kha laiah khan kan Minister zahawm tak hian eng chen nge an bawhzui tawh tih lai kha min hrilhfiah thei em tih ka'n zawt a ni.

Pu LALRUATKIMA : Pu Speaker, tuna Minister zahawm tak zawhna leh chhanna kha a dik a ni. A zawhna kha an vuah fuhlo zawk a ni, kan Minister ta ah khan. A zawttu member zahawm tak Pu Er.Lalrinawma zawhna chhanna pek leh kan Minister zawhna an pek kha an vuah fuhlo palh a ni. Chu zawk chu a ni a, tuna hemi a paper-a an pek hi a dik vek a ni. A chhanna dik sa vek a ni. Khalai tihsual palh dan kha kan sawifiah duh zawk a ni.

SPEAKER : Khalai kha chu duhtawk tawh ang. Zawhna 185-na ah kan kal thei ang a. (Er.Lalrinawma : Pu Speaker, khawngaihin hmalakna kha engchennge an thlen chin kha?) Aw, a ni maw, i thianpa khan a rawn chhan sak tawh che emaw ka tia, a nih Minister zahawm tak lo sawm ila.

Pu ZODINTLUANGA, MINISTER : Pu Speaker, standard bidding document siam hi uluk a ngai a, Er Lalrinawma sawi ang khan vawikhat siama, hmanhmawh taka siam rup rup a, nakina buaipui leh ai chuan tiin Law te kan vet tir hnu ah pawh tunah hian uluk taka en mek a ni a. Kan hman tawha tihsual tur te, tunlai ah phei chuan

E-proquirement zawng zawng te kha kalpui a ni a. Chuvangin khami kan draft document kha kan la appove lo mai a ni tih kha kan han sawi a ni. Fimkhur thu hla a ni.

SPEAKER : Awle, zawhna 185-na ah kal ila, zawhna neitu MLA zahawm tak Dr.K.Bechhua'n han zawt se.

Dr. K.BEICHHUA : Pu Speaker, ka lawm e. Starred Question no.185-na Minor Irrigation department changtu Minister zahawm tak a chhan atan ka zawhna chu :-

- a) 2013 atanga vawiin thlengin Autonomous District pathum bikah Minor Irrigation hian project kalpui mek a nei em?
- b) Nei ni ta se cheng engzat man te nge?
- c) Khawi hmunah te nge?

Pu LAL THANHAWLA, CHIEF MINISTER : Pu Speaker, a) kum 2013 atanga vawiin thlengin Autonomous District 3 bikah Minor Irrigation Department-in Minor Irrigation project kalpui a nei lo. Khami avang khan b) na leh c) na pawh kha a awmlo a ni mai a. A chhan chu Pu Speaker, hemi Autonomous District Council te Entrustment of functions of the state government departments to each of the three Autonomous District Council chungchang Mizoram Gazette no. 88 Dated 1.9.2009-ah chhuah a ni a. Minor Irrigation pual bika function transfer tura tih chu Minor Irrigation and Construction of Field channels ah a ni. Sorkar thutlukna ang hian thuneihna pawh Autonomous District Council-ah hlan a ni a. Minor Irrigation Scheme thawhna tur sum/fund pawh kum 2012-2013 atang khan a hrampain Autonomous District Council budget-ah dah/allocate a ni tawh a. Hetianga thuneihna hi District kuta a awm tak avang hian Minor Irrigation department chuan heng Autonomous District Council area chhungah hian Minor Irrigation lamah hmalakna a nei thei ta lo a ni.

SPEAKER : Zawhbelhna a awm lo maw? A tha e. No. 186-naah kan kal thei ta a. Zawhna neitu MLA zahawm tak Pu Lalpianmawia zawt turin i sawm ang.

Pu R.L.PIANMAWIA : Pu Speaker, ka Starred Question 186- na Land Revenue and Settlement Department changtu Miniter zahawm tak chhan atan ka zawt e.

SPEAKER : Minister zahawm tak Pu R. Romawia chhang turin sawm ila.

Pu R.ROMAWIA, MINISTER : Pu Speaker, MLA zahawm tak Pu R.L.Pianmawia zawhna 186-na chhanna chu ;-

- a) Kum 2015-2016, 2016-2017 chhunga house pass sorkarin a pek chhuah zat chu hetiang hi a ni.

	2015-2016	2016-2017	Total
Aizawl	698	425	1123
Lunglei	9		9
Mamit	138	21	159
Kolasib	1		1
Champhai	9	2	11
Serchhip	14	28	42
Total			1345
2015-2016	869	Total	1345
2016-2017	476		

- b) VC pass neitute hian compensation an hmu theih avangin engtik atanga intan nge tih sawi fak theih a ni lo.

Mizoram (Land Revenue) Rules, 2013 Rule 47 (4) in a sawi angin VC ten an huamchhunga House Pass an pek theih atang hian crops leh building damage bakah land value atan compensation pek theih a ni a. Mahse a ram hlutna atanga 15% chu sorkarah a rawn chhun let a ngai.

- c) Mizoram (Land Revenue) Rules, 2013 Rule 14-in a sawi angin Mizoram (Survey and Settlement Operation) Act, 2003 hnuiai notified loh khuaah te an khaw huam chhungah, chu khuaa cheng ngei te tan chauh in hmun pass VC ten an pe thei.

- d) VC pass a compensation pek lohna dan siam hi sorkarin a la ngaihtuah lo.

SPEAKER : Zawhna hun a tawp ta a. Niminah khan kan puang tawh a, puang nawn tawh lemlo ila, kan zinga thu ve theilo member 3 an awm tih kha. Tunah chuan Laying of papers-ah kan kal ang a. Kan Chief Minister zahawm takin paper lay tur a nei a, chu chu lay turin ilo sawm ang.

Pu LAL THANHAWLA, CHIEF MINISTER : Pu Speaker, i remtihna leh House remtihna in he House-ah hian “Regarding powers and functions of the Lai Autonomous District Council and appointment of Deputy Commissioner Lawngtlai as a Caretaker of the Lai Autonomous District Council” hi ka rawn lay e.

SPEAKER : A copy kha sem ni se. Aw le, Minister zahawm tak Pu P.C.Lalthanliana hian paper 3 lay tur a nei a, tunah lay turin ilo sawm ang.

Pu P.C.LALTHANLIANA, MINISTER : Pu Speaker, i phalna leh he House zahawm tak remtihna heng report 3-

- i) Sixth Report of National Commission for Scheduled Tribes for the year 2010-11.
- ii) Seventh Report of National Commission for Scheduled Tribes for the year 2011-12.
- iii) Eighth Report of National Commission for Scheduled Tribes for the year 2012-13.
te hi he House zahawm takah ka rawn lay e.

SPEAKER : A copy kha member zahawm tak te hnenah sem ni se. Tunah chuan Financial Business ah kan kal thei ta a. Vawiin hi kan Chief Minister zahawm tak, kan House Leader demand te sawihona ni a ni a. Tunah hian Pu Lal Thanhawla kan Chief Minister zahawm takin a demand no. 1, 2, 3, 5, 11, 13, 15, 27, 28, 33, 36, 37, 39, 45 & 47 te hi House-a sawiho atan rawn submit sela, tunah i sawm nghal ang.

Pu LAL THANHAWLA, CHIEF MINISTER : Pu Speaker, Governor zahawm tak remtihna leh i phalnain he House zahawm takah hian heng Demand -

Demand No.	Purpose	Amount	Demand For Grants Page No.
1	2	3	4
1	Legislative Assembly	19,96,10,000	1-6
2	Governor	13,60,000	7-12
3	Council of Ministers	5,67,20,000	13-18
5	Vigilance	5,65,65,000	38-41
11	Secretariat Administration	1,13,91,00,000	79-82
13	Personnel & Administrative Reforms	4,88,69,000	86-89
15	General Administration Department	78,08,03,000	106-142
27	District Council & Minority Affairs	3,26,64,63,000	333-339
28.	Labour, Employment & Industrial Training	29,61,65,000	340-345

	Dept.		
33.	Soil & Water Conservation	16,95,97,000	398-403
36.	Environment, Forests & Climate Change Department	76,88,35,000	425-435
37.	Co-operation Department	22,76,02,000	436-441
39	Power & Electricity	4,24,37,65,000	454-470
45	Public Works	8,15,99,48,000	520-551
47	Minor Irrigation Department	61,79,80,000	571-578
	TOTAL	20,03,33,82,000	

te hi ka rawn pharh a, House-in min ngaihtuah saka min pawm sak turin ka rawn ngen e.

SPEAKER : Chief Minister zahawm takin a demand 15-te House-ah a rawn pharh ta a. Sawihona kan tan dawn ang a. Khawngaihtakin a hnuhnung amite khan inchuh lo hram ila. Hun hi pawisa a ni tih hre rengin a sawi hmasa tur kha ding chat zel rawh u le. Kan chhiar dawn em ni?

Dr. K. BEICHHUA : Pu Speaker, demand 15 lai a ni a, 10 mins chauh chu demand pakhatah minute 1 pawh a tlinglo tihna a ni dawn a, 15 mins tal ti thei ila a tha lo maw tih rawtna ka rawn siam e.

SPEAKER : Thusawi hi in trained vek tawh a. (Pu R. Lalzirliana, Minister : Pu Speaker, ka rawn thlawp khawp mai. Chief Minister, kan House Leader hi a department hi a tam deuh a. Khatiang ringawt chuan kan member-te hian an duhtawk zo lo deuh ang a! 10 mins maw kan pek kha? 15 mins tal chu rem i ti thei mai lo em ni?) Aw le aw le, House thu thu le. 15 mins ti ang aw? 15 mins-ah erawh chuan tawp hram tum ila a tha ang e. I hun a ral tawh tih tawh hnuah pawh ‘tin’ pahnih/pathum a awm kha chuan a buaithlak thin a ni. Tunge sawi hmasa ang le? Pu K. Sangthuama.

Pu K. SANGTHUAMA : Pu Speaker, ka lawm e. 15 mins-ah pawh sawi zawh tak takna hun chu a awm chuang lovang a, sawi tur a tam em mai a. Engpawhnise department tam tak kha chu sawi ka tum hrarpa lova. Kan House Leader zahawm tak demand-ah hian a pawimawh ka tih lai deuh deuh han sawi ve ka tum ang a.

Demand no. 45-na PWD kha han sawi hmasa ta ila, PWD hi kan ramah hian kan changtlung angreng khawp mai a. Han ngaihtuah vang vangin E-in-C hi pakhat kan nei a, Chief Engineer pathum niin ka hria a, ka hriatsual loh chuan, SE engemawzat

kan nei a, EE nen, SDO nen, Assistant Engineer nen, JE nen, SA nen. Hmun riat vel ah kan intlar thla dul mai a. PWD hnathawh hrim hrimah hian kawngah hian kan hlawhtling vaklo emaw chu aw tih theih a ni a. A laih ringawt hi chu Pu Speaker, kan han lai zo mai a, mahse, a laih zawh hnua han siam leh ah hian kan hlawhtling lutuk lovin ka hria a. Kawng te, building te, bridge te (leidawh) ang chi hi PWD hnathawh pui deuh ber a ni a. Chuvangin, kan PWD pawh hi insiamthat an tum deuhhlek ngaiin ka hria.

A mihring hi chu han ngaiantuah ila, Mizoram mihring nuaih 11/12 emaw vel lekah hian Chief Engineer pawh 3 kan nei a, Engineer-in-chief 1 kan nei a, Engineer an intlar dul bawk a, EE phei chu an tam khawp a, SDO-te kan intlar dul a. Khawimaw laiah chuan an indaihlo a ni tih sawi chu a'n awm thin tak na in, a tak takah chuan kawng kan lai a, kan lai zo mai a ni. Khami kan laih zawh mai kha, kawng laihah chuan engemaw chenah Pu Speaker, engineer-te kal kherlo pawhin an lai zo ve mai a ni. Amaherawhchu, a tlangpuiin kan hna enkawl dan hrim hrimah hian, PWD-ah hian, lungawithlak lo in ka hria a. A chhan chu engineer-te office-ah an thu tlat a, an kal ngai mang lova. Aizawl atangin emaw, khawi khawpui pakhat atangin emaw kan hnathawh en ngawt chuan hna hrim hrim hi duh ang a ni theilo a ni.

Chuvangin an progress tha em, thalo em, khawilai nge an thawh, eng chen nge an thawh tih kha, hetah kan Minister-te chu a dik tak chuan indaih lohna nasa tak a awm a, portfolio dang a lo awm a, a hmunah an kal chat chat reng theilo a ni. Chuvangin helaiah hian, kan hnathawh dan hi kan tih danglam hret a ngaiin ka hria. Tun ang reng a nih chuan PWD hi tun ang reng hian hmasawn lutuk lovin kan kal dawn niin ka hria a. Chuvangin, ngun taka kan engineer-te pawh hian an hna chanpual leh an hnathawh hi Pu Speaker, an ngaiantuah ngaiin ka hria a.

A tlangpui thuin kawng siamah hian kan fail deuh niin ka hria a. Building-ah erawh chuan a tlangpuiin kan fail lo viau a. Building chu tha pui pui an han sa a, kum rei tak tak daihin an sa a, a dik chiah a, kumkhaw daih tur chu a ni chuanglo na in. Concrete building-te pawh kum 20/30/40 daihin an han sa a. Kawng erawh chu an han lai a, a laih ringawt, a kal ngawr ngawrna tur kha chuan a min loh chuan a lo ping leh lem lova, chu chu kan han lai tlang mai a. Amaherawhchu, chumi hnu a black topping, soling, rawra phah leh engkimah hian kan fail deuhin ka hria. Hetah hian tan lak ngai hlein ka hria a. Tun ang reng a nih chuan kawng tha hi keini chuan kan damchhung hi

chuan kan hmu vak dawn in ka hre lo. Chuvangin, kan engineer-te hian tan la deuhhlek se tih vawiinah hian uar takin ka sawi duh a.

Building-a tan an lak ang hian kawngah pawh tan la rawh se. Tunah pawh, (ka kal chiahlo na a,) nizan khan Mizoram paa ka pa rin ber zing ami pakhatin min rawn phone a, “Hmanni khan khawchhak lamah ka kal a, kawng a chhe khawp mai a, lo sawi teh a” a ti a, Pu Speaker. A chhelai ber chu Aizawl atanga Tuirial a ni a, a chhe khawp mai, a ti a. Tin, Seling atanga Tuirini inkar hi black top-in an han repair ve deuh a, mahse hlam 10 lek lek kar danah hian heti hian an ti a, a piah lehah an kalsan a, a piah lehah chutiang chuan hlam 20/30-ah an han ti leh a, an kalsan leh a. Khawngaihtakin Assembly House-ah lo sawi la, a ti a, a hming chu sawi kher lo ila. Amah kha Mizo paa ka rin berte zing ami a ni a, dawt a sawi ka ring lova, keimah phei chu ka kal hauh lova.

Chutiang deuh chu kan kalphung a ni a. Furpui a lo thleng leh mai a ni si a, vawiinah pawh a sur chur chur a. March thla a lo ral ang a, April/ May thla chhovah chuan a tih leh tak tak theih loh ang a. Kumin chhung hian kan pawisa dah ang pawh kha tan kan lak fe loh chuan kawng siamthatna atan hian Pu Speaker, kan hmang hmanlo ang tih te pawh a hlauhawm a. Chuvangin, theihtawpin PWD Engineer-in-chief atanga SA thleng hian tan la deuh turin vawiin hian ka'n chah duh a.

Anmahni kalkawngah chuan an fel theuh, engkim an hria. Keini ang mimawl chuan engmah pawh kan hre lova. Han kal ila, in bialah pawh a ni theuhin ka ring a, ka bialah te pawh a ni thova, kan black top reng reng hi a thalo em em a, kum 1 a daih mang lo a ni. Nikum April thlaa tha taka kan siam pawh kha tunah chuan a pawr leh deuh vek a, a khawk leh deuh vek tawh a ni.

Engatinge black topping pawh hi heti em ema tlo lova kan siam theih chu aw! ka ti a, Pu Speaker. Chuvangin, black topping-ah hian tan la sela. Mizo te pawhin an thawk a; tin, Mizo kher lo te pawhin an thawk a, hei hi tan a lak theihin ka hria. A tul chuan sealcoat te pawh ti mai ila, Pu Speaker. Sealcoat a nih loh chuan, a dik chiah chuan, tihian fur ah tui a lut a, khami a luh leh chuan motor a lo tam si a. Khatiang khan a chhe leh thuai thuai mai a, pawisa kan seng ve teuh tho si a. Sealcoat hi a harsa a nih pawhin sen belh hret ila, kum hnih/kum thum/kum li/kum nga daih tur a nih chuan kan pawisa sen kha a kum lehah a lo ziaawm ang a, a thaa hriatna ka nei ve a. Chungte pawh chu kan House Leader, PWD changtu hnenah hian suggestion han siam ka duh a. A

changtu emaw, a sorkar kha kan va dem ngawr ngawr tihna ni lovin, thahnemngaihna zawk thilah khan hei hi min lo ngaihtuah ta ula. Kan thil siam te, kan kawng siam te, kan in sak te a that chuan mahni pawh hi kan hlim asin.

PWD-ah engemaw chen, kum sawmhnih/sawmthum lai contract kan thawk ve a, kan building sakte kan va en thin a, a lo that viau a, engineer-te, hotute'n tha min tihpui viau chuan, anmahni aiin Pu Speaker, kan lawm zawk a ni. A dik chiah chuan a thawktu hi kan lawm ve veng veng mai a. Kan building sakte kan han kal a, kan hmu a, miin min hriatpui lo mah se, khatia a lo din a, tha tak a nih chuan keimahni hi kan lawm viau a ni. Sorkar chu lawm tho turah ruat a nih rual rualin, keimahni kha kan hlim zawk, tha kan ti zawk, kan lawm zawk. Kawng kan laih pawhin a dik chiah chuan, kan laih tlanga, engineer-te'n an tih anga tha taka kan laih chuan keimahni kha, Pu Speaker, kan lawm zel zawkin ka hria, keimahah chuan a ni a. Chuvangin, hetiang hi kan engineer-te ngawr ngawr ni lovin, a thawktute, contractor-te, a siamtute an that a ngai a. A siamtute'n Pu Speaker, an ngaihtuahna, an rilru zawng zawng an hnathawh ah khan a awm miau loh chuan, kan engineer-te pawhin han ti han ti mah sela, an pahniha tan kawp a ngai tlat a. Hetah Ministry in fir takin han ti pawh ni se, a thawktute an dawngdah tlat chuan kawng tha neih a har em em a ni. Chuvangin, vawiinah hian kan engineer-te pawh an lo awmin ka ring a, an awmlo a nih pawhin TV-ah nakin zan lamah te pawh an ngaithla in ka ring a. Kawng siam te, building sak te leh hna dang dangah hian, experience ka lo nei ve nual tawh a ni.

PWD hi kan insiamthat hret chu a ngai a ni. Kan hotute an zaidam hret a nih pawhin kan Minister-te, kan Chief Minister-te an zaidam hret a nih pawhin vawiinah hian Pu Speaker, mahni inhmuh chhuah a ngaiin ka hria. Vawiinah hian engatinge kawng chhia a tam em em ti ila, a chhan chu a thawktute a hmunah an kal ngai lova. SA-te, SDO-te pawh an kal zeuh zeuh chauh a ni. Khatiang hnuai kilometer sang tel kawng enkawl chu har tak a ni reng a ni. Chuvangin, kan engineer-te hian a hmunah an thutchilh tlat thei lo a nih pawhin kal se la, en se la, chutiang chuan tun ai chuan kawng tha kan nei hrim hrim in ka ring a ni.

CPWD-ah emaw, All India Radio-ah te, TV Station ka sak lai pawhin an EE-ten min thutchilh tlat mai a ni. Min thutchilh tlat chuan hna hi Pu Speaker, chhe lutuka tih hi a har angreng khawp mai. Hna kan thawh apiang kha measurement an la zat

zat a, min tih belh rawh tih pawh kha a theih tawh loh a ni. Hetiang deuh hlek hian kum thar atang chuan kan House Leader zahawm tak hian khawngaih takin heng PWD-te, PWD kher lo pawh kan engineer lam chetna hrim hrimah hi chuan a department ni chiahlo mahse ani chuan a khawih thei vek a, a thu ber a, ko khawm sela, tha deuh fek fawkin han zirtir se a tha in ka hria. Tichuan Chief Minister chak tak a ni mai ang tih hi ka ring ve tlat a. Chuvangin, PWD kawng kan siamah hian kan fail deuh in ka hria a.

Khitilai, Seling leh Tuirial inkar leh Zemabawk-Tuirial inkar pawh khi han kal zawk hi a thaa hriatna ka nei nghe nghe a. Session zawahh hian remchang a nih chuan ka pa rin ber zing ami in a sawi kha han en ka duh deuh a. Chutiang chuan kan House Leader hian PWD-ah tun ai hian tan lo la zual chho se hmel mawi takin kan ram hi a kal chhoh theih mai beisei ta ila.

Pakhat lehah chuan Chhingchhip atanga Khawhai kal chhohna hi duhthu a sam lo khawp mai a. Tukinah min rawn phone vang vang mai a, ‘Ka pu, Chief Minister portfolio a ni bawk a, ama hriat ngeiah hian min lo sawi sak teh, tun aia chak deuhin hma min laksak teh se’ an ti a. Vawiinah hian a remchangin ka hria a, ka han sawi nghal duh bawk a. Tin, khitah Tuichang constituency-ah bawk, Khawzawl atanga Biate kal pheina khi a tha lo khawp mai an ti bawk a, tam tak chu kan sawi hman lovang a. Chutiang chuan tha vak lo hi a tam mai a. Vawiinah hian kan Chief Minister kan dem ngawr ngawr tihna lam a ni lo, a tha zawnga kal tlan kan tum hian kan ram hian hma a sawn ang a, a tha ang tih duhna kawngah hian heng hi han sawi kan ni tih kha min lo hriatpui se a that ka ring.

Pu Speaker, chu bakah hei a fur leh ta mai si a, i sawi zing lutuk pawh an ti mai thei a. Khulai Ramrikawn atanga PTC kalna khu an la tan lo in ka hria a, an thawk leh hman dawn lo takngial in ka hria. Khulai Rangvamual ami khu a min leh ang a, kan in ngur kan in ngur leh ang tih ka hlau deuh a. Kan Chief Minister zahawm tak hian a contractor pawh hi a naute lo phone tir se, thawk ve thuai thuai teh se, hei hi ka han ngen leh duh bawk a ni. (SPEAKER : Minute 15 chu i hmang der tawh a sin.)

A tawp der mai a ni maw? A dang kha kan sawi hman lo a nih pawhin a pawi lo ve. Minute 1 chauh, Pu Speaker. Kawng siamah chuan tlemin kan fail deuhin ka hria a, building-ah erawh chuan an fakawm khawp mai tih kha PWD-ah chuan a tawpna ni sela.

Power hi chu sawi vak lo mai ila. Kan hmu chiang a, nakinah an rawn sawi chho leh turah ngai ila. Thil pakhat erawh chu, hmanni khan Soil & Water Conservation-ah khan, rubber chin hi kan ram hmel hmang hma kan sawn theihna tur a ni a. Kan sorkar tawp khan phun ka tum a, ka thulh leh a, pawi ka ti hle mai. Hei kum 8/9 dawn lai a ni a, lo phun ila chuan kan hnai hman tawh tur a ni a. Tunah hi chuan phun leh tur pawhin kum lam te pawh a lo upa a, duh angin kan chhawr tawhin ka ring lo a, ka ti leh peih tawh si lova. Pu Speaker, rubber plantation hi khawthlang lamah a tha vek a ni. Hei hi tun atang hian uar thar lehzual turin zirtirna pe ila a tha in ka hria a. Kan ram tana thil tha ber zing ami a ni e tih kha a tawp nan Pu Speaker, ka han sawi duh a ni e. Kha kha ka sawi theih tawk ni mai sela. Ka lawm e.

SPEAKER : Dr. Ngurdingliana.

Dr. NGURDINGLIANA : Pu Speaker, ka lawm e. Minute 15 min pek belh dawn tih ka lo hre si lova, minute 10 tur angin ka lo in buatsaih a. Demand pathum sawi ka tum a, chungte chu demand 15-na General Administration Department, demand 36-na Environment, Forests & Climate Change leh demand 45-na Public Works tih hi a ni.

Demand no. 45-na Public Works Department, tunah khan member zahawm tak, kan senior Pu K. Sangthuama khan a rawn sawi a. A bial kawng laihte pawh a rawn sawi a, kha kha ka han sawi duh a. Kan hria a, nikum lamah fur a rei a, duh angin PWD-te pawhin hna an thawk thei lo tih kha kan hre vek a. Tin, quarterly review, a changtu Chief Minister zahawm tak nen an neih thin chanchinbu ah te pawh an tlangzarh a, hma lakna tam ziate kan hre reng a. Tin, a sawi mek lai Zero point atanga Khawruhlian kha kar hmasa Zirtawpni khan Pu Speaker, ka han kal a, kan E.E te, company te, khilai NGO te nen kan sawi ho a, khilai kal kan zeuh zeuh tih khi chu a kalphung tur company-in an lo tih dan, a dam lai te, nakina tih tur avang te a lo ni a. Tin, complain an neih ang ang NGO te nen pawh kan sawiho a, a thianpa in a sawi kha chu tunah hi chuan kan tifel thawkhat in ka hria a, kha kha kan sawi duh a ni. Sawi ang khan quarterly review an neihna ah an hmalakna tam tak Zoram dung leh vangah kan hre vek a, kha kha chu ka rawn sawi dawn lo a. Mahni bialah luh a ngai a, a chhan chu Chalfilh khi Hmar thimpui zangkhaw bungbut hnan tih thin kha tunah chuan PWD zarah a ni dawn tawh lo a, a ni tawhlo mek bawk a.

SPEAKER : Kan inhlak lawk ang e.

DEPUTY SPEAKER : Awle, chhunzawm rawh le.

Dr. NGURDINGLIANA : Tunah hian Phullen atanga Phuaibuang cheng nuai 2971.53 leh Phuaibuang atanga Khawlian cheng nuai 1248.48 hi tunah (za ah 99) 99% min zawk sak tawh a, eng car pawh Phullen atang khian, USA car changkang Bentley pawh engmah hrut lo in a duk chho pur pur thei tawh a ni. Tin, tunah hian kan ngaihthlak ang khan, Zero point atanga Khawruhlian crore 13 leh nuai 71 man min thawh sak mek bawk a, Suangpuilawn atanga Zawngin tunah hian cheng nuai 802 man min thawsak mek a, kar hmasa lawk khan heng Khawlian to Tlangnuam cheng nuai 462, North East Tlangnuam to Daido cheng nuai 511.41, Phullen to Zawngin cheng nuai 1174, Dilkhian to North Lungpher cheng 1385.56, Dilkhian to Tualbung cheng nuai 774. 37, North Lungpher to Buhsan cheng nuai 692.89 te min tender sak tawh a. Tin, hemi bakah Suangpuilawn atanga Zawngin black top tur te pawh dan naranin PMGSY-in an laih hian kum 3 kum 4 hnu ah black topping tih chauh thin a ni a. Mahse PWD zarah tunah laih hna kan thawk mek a, laih hna kan thawh zawk hnu ah permanent work kan han ti leh ang a, chumi zawah kum tawp lamah black top turin tender pawh min pho chhuah sak nghal te hi PWD chungah lawmthu bial mipuiin kan hrilh mawlh mawlh a. Chu chu kawng thu ah ni se.

Lei ah pawh Pu Deputy Speaker, Tuirini lei, lei hlauhawm tak, ‘min siamsak rawh u’, tia kan ngen lawm lawm te ngaithla in tunah hian tender chhuah tep a ni a, crore 3 leh nuai 96 tunah hian Ministry of Road & Transport atangin min rawn sanction vek tawh a. Chu mai ala ni lo a, Phullen leh Saitual inkarah Tuivawl lei chhe tak tawh te khi min tender sak tep a, chu chu cheng nuai 982 a ni. Heng avang hian tuna tender te, a chhangtu tur ten an chhan mek a fel hnu ah hian hna tan hma in launching programme piah lamah Phullen-ah khian lawmthu sawi nan kan Chief Minister ho in PWD Day hman kan tum nghe nghe a ni, Pu Deputy Speaker. Chutiang khawp chuan hnuchhawn ram thin, kawngchhia, Daido atanga Aizawl darkar 18 kal ngai thin kha tunah chuan darkar 5-ah pawh a thlen theih a ni. Chutikhawp chuan ka bialah hmasawnna kan hmuh avangin PWD chungah hian kan lawm ngawih ngawih a ni tih ka sawi duh a ni. Chu chu PWD-ah kan duhtawk ang a.

Pahnihna ah chuan GAD hnuaih Aviation Wing-ah hian luh ka duh a. Nimin lamah khan zawhna ka rawn zawt tawh a, kan House Leader khan tha takin min

rawn chhang a, Principal Consultant tih tawp a nih dan khami lamah kha chuan ka kal dawn lo a. Amaherawhchu Lengpui Airport khu engemaw chenah kan ram darthlalang, kan hnam darthlalang a ni a, kan Taj Mahal pawh kan ti thei ang, kan House Leader te nena kan bul tan, kan rawngbawl pui ten an hawn kha a ni a, mipuiin a kan chhawr zia leh kan ngaihlut zia khu turu tak a ni. Mahse tunah khuan enkawltu indaihloh vang nge ka hrelo a, VVIP lounge hran te pawh siam theih tho a ni a, mahse pakhat khu kan inhman tawm a, duh zawng mai khu kan lut a, a chhungte lah khu maintain loh, vaivut paw luk te, carpet kau huau te, kan kal vek a, kan zin ngun a kan hre vek a. Tin, a chhung hrim hrim lighting system, fan vir theilo, chutiang chu tam tak a awm a. Tin, a chhung leh pawn rawng hnawih that renovation ngai em em a ni a. A enkawltu chungchangah hian an indaihlo niin ka hria a, rawtna ka'n siam duh chu tunah hian Deputy Controller-in a enkawl a, a indaihlo viau in a hriat a. Chuvangchuan Controller hi OSD angin nge a kal theih dawn ka hrelo a Deputation in. Hei Service hrang hrang kan nei a, MPS kan nei a, MCS kan nei a, MFAS kan nei a, MIS te; khata tang khan senior officer viak tha tak ten vil zawk sela, Deputy Controller a awm ta tho a, ani controller niin, khatiang te khan. Tun aia hnum zawk leh mawi zawk hian a chei theih in ka hria a, chu chu ka'n rawt duh a ni Pu Deputy Speaker.

Tin, tuna helicopter service mek te hi a tangkai em em mai a, District tin khawpui tlawhin, emergency-ah pawh damlohma thilah a hire theih te hi nunna tam tak a chhanchuak tih hi vawiin ah kan sawilang duh bawk a ni. Chu chu Aviation chungchang ah ni se.

Demand no.36-na, Environment Forest & Climate change-ah hian luh ka duh a. Pu Deputy Speaker, global warming hi tunah chuan khawi khawpuiah pawh, khawvel hmun hrang hrang ah Group of Four kan tih te emaw, ram changkang Commonwealth a ni emaw, UN meeting-ah a ni emaw agenda no.1 hi a luah ngar ngar mai a, an ralkhel a ni. Kum 2000 atang khan mithiam ten an han chhut a, khawvel ah hian world hottest of the year an tih hi kum 2000 atangin vawi 17 puan a ni tawh a, nikum 2016 kha ala lum ber a ni. Kum 2000 atanga an lum chhoh zia chu. Nikum hmasa lawka Paris Convention-ah khan ram 126 kal khawmte khan rawtna tam tak an siam a, chu chu China takngial pawhin a zawm a ni. A coal plant tur, lungalhthei plant 1000 an siam tur pawh kha a cancel phah vek a ni. Chuti khawp chuan ram tin hi an tang a,

khawlum zel hi kan dan loh chuan tun atanga kum 20-a khawvel awm dan tur hi a rapthlak em mai! Hawh u, degree celsius sang zel hi i tihniang ang u, ' tiin tunah hian war footing-in hma an la a ni.

Keini pawh kan bul lawkah Bangladesh a awm, Bangladesh khu Bay of Bengal-in a hual a, Himalaya tlang chhip in a dang bawk a; tin a ram chhungah Bramaputra a luang lut a, Ganges a luang lut a, Meghna a luang lut a. Tun atanga kum thum hnu velah sea level, tuna a sea level, khu 90 ni ta se, fit thuma a kan vah chuan, a san leh vah chuan keini Mizoram thleng hian min nghawng dawn a ni. Khawvel leilung awm dan pawh a tidanglam vek dawn tiin mithiamten an chhut a. Chung avang chuan Mizoramah pawh Forest Department-in tunah hian zau tak leh chak takin hma an laknaah hian mipuite pawhin kan tawiawm that lehzual a ngai a. Kum tin zirtirna inpe mah ila, thing pawh phun mah ila, a tak taka hlawhtlinna hi hmuh tur a vang khawp mai, a monitoring lamah kan chau bawk si. YMA, NGO kan han ring thin tak na a, khawilai emaw ah hlawhtlinna awm mah se a nawlpui (overall) chuan a la hlawtling rih loin ka hria.

Tunah hian sanctuary pakua (9) kan nei mek a, chungte chu Pualreng Wildlife Sanctuary, Khawnglung, Lengteng, Murlen, Thorang tlang, Tawkalo, Ngengpui, Phawngpui leh Dampa Tiger Reserve. Hmanni (DEPUTY SPEAKER : Hun a zo a, zawh tum deuh la.) khan khaw sawn chungchangah thu ka rawn sawi a, kan Speaker phalnain, khata ka sawiah khan kan Chief Minister zahawm tak Forest Department changtu pawh khan min lo ngaihvenpui hle a, ka lawm a. He session zawh veleh karleh lamah khian khami bawhzui khan kan han kal dawn a, a theih phei chuan Pu Deputy Speaker, Forest Department lamten min tawiawm thei se ka lawm ngawt ang. Tin, chumia kan en pah tur chu Mawmrang tlang, Mawmrang khi sanctuary-a leha a bulthut khua sawn a ni. Heng bakah ka biala Wetland Conservation Scheme, Tamdil, Rungdil min tihsak turte hi an department chungah Pu Deputy Speaker, nangmah kaltlangin lawmthu ka sawi a. A khaikhawm nan chuan heng kan House Leader demand 1-47 hi ka thlawp thu ka rawn din chhuahpui a ni e. Ka lawm e.

DEPUTY SPEAKER : Tunge sawi ang le? Pu John Siamkunga.

Pu JOHN SIAMKUNGA : Pu Deputy Speaker, ka lawm e. Kan Chief Minister zahawm tak demand te hi ka rawn sawi dawn a. A tam em avangin tlemte chauh ka sawi

ang a, ka sawi zo hman dawn lova. Ka rawn sawi hmasak ber duh chu demand no. 1, Assembly chungchang hi. Assembly hi kan hriat angin an hna hi a tam khawp mai a. Hetianga session kan neih dawn phei chuan department zawng zawngte chhanna te leh thil dang pawipang zawng zawng lo khawihtu an ni a, an hah em em a, mahse an efficient hle a ni. Keini ho phei chu kan inhrawn nasa a. Assembly-ah hian Committee hi 20 dawn a awm a, heng 20 zingah hian Subject Committee pathum a awm a. Chung chuan department zawng zawng hi hmun thumah an inthen a, an hnathawh dan thlir tul an tih te thlirin an zir char char bawk a. Hei hi a tangkai hlein ka hria a. Assembly session kan neiha House-a an rawn present thin, an rawn submit thina hi a ni a. Assembly session hi hetiang hian pui tak hian a kal reng thei lova. Heng a kal reng loh lai hian mini-session hi kan nei reng a ni. Khami mini-session kan neih kha Assembly Secretariat hian min kaihuai reng a. Kan session hi camera-a lak ve thian a nih loh avang hian pawn lam mi tan hriat a har em em a. Tin, kan thu te hi opposition an ni emaw, ruling an ni emaw, report kan submit hma chuan thurukah kan vawng vek a, chutiang chuan kan kal a. Committee pathum atang hian member hrang hrang kan awm a, chungte chuan department hnathawh a tha em, tha lo em, mit a tlung em, tlung lo em tih hi Assembly lam atang hian kan lo thlir ve thin a. Tin, chu bakah Financial Committee hi pali a la awm leh a, chung chuan chhui hrang hrang an nei leh a. Khang an chhui hrangte kha chu CAG Report atang te, Audit Report hrang hrang atangte khan hengte hi a tak tak a ni ngei em, bawhzui tlak a ni em, enge heng thilah hian a lo lan tak tih kha a hmunah te kala tih takzeta chhuitu Committee dang kha a la awm leh a. Chung karah pawh chuan kan official te an thain an viak a tha a; tin, an efficient a, kan hrawn tawh chinah pawh thil hi an tisual mawh viau a. Kha vawiin-a an thil rawn tihsual kha a pawi khawp mai a, kan perfect lova, kan perfect lo chung hian Assembly Secretariat ami te hi chu an efficiency hi a sang hlein kan hria a. Chulai te chu ka'n sawi duh a.

Pu Deputy Speaker, demand no. 45-na Public Works Department kha han sawi leh lawk ka duh a. Kumin hi fur a rawn tla hma leh dawn niin a lang a, a pawi khawp mai a. Kumin chhung hian kawr lum hak theih loh lai a la awm lo tlukin a la vawt a. Tin, kum dangah pawh rawn thlen hma chang a nei thin a, Mizoram hi kan hriat angin zawl awm ve lohna tlang bakkhai tak tak awmna te a lo nih avang hian kan kawng laihte pawh hi khatiang kara lai vek, a tawpah pawh tlang thova va thleng kan ni ti hian

kan sawi thin a. Chulai karah chuan ruahtui a tam em em a, kan leite hi rei loteah a rawn tihnip ve thin a. Khami a nih avang khan kan department te leh sorkar kan han dem mai thin hi a dik ber em aw tih ka ngaihtuah thin. Kawng hi tawi te enkawl chu ni se an titha lo a nih chuan an demawm hle turah ka ngai a. Mahse Mizoram PWD hian kawng an enkawl hi helai statistic-a a lan danah hi chuan 6127 km lai Mizoram chhungah hian an enkawl a ni, a thui a ni. Tah chuan an black top chin hi 3980 km lai a ni a. Tunah hian la khawih loh, la black top loh hi 2178 km lai a awm a ni; 6000 km chungah chuan a chhe laite chu a lo awm ve turte pawh a ni ang a. Tha lai tam tak a awm karah khan a chhe lai hi kan sawi lo thei lova, kan sawi lo tur pawh a ni chuang lo, mahse a lova luak chhuaka han tih vak erawh hi chu a tul ber em aw te ka ti thin. Anni pawh mutmawh hnarmawha theihtawpa bei ve thinte an ni a. CPWD Road hnuiah hian 175 km a awm a, hei hi black top chhuah vek a ni a. An enkawl kha a dang a dang ve a ni. PWD kan han mawhpuh ngawr ngawr a, BRO ten enkawl an nei ve leh a, BRO hian 896 lai an enkawl a. Heta 609km hi an black top tawh a, 286 km lai hi black top loh an la nei ve a. Chuvangin BRO kawngte pawh kha PWD hnuiah hian kan thun a, anmahni kan mawhpuh deuh zel lo thei lova, kan hriat loh vangte pawh a ni ang a.

Tin, National Highway-ah hian 1465 km lai hi an enkawl a, an black top chin hi 1205 km a ni a, la khawih loh, la black top loh hi 260 km lai an nei a ni. Khatiang khan kawng enkawl tu hi a hrang hrang, mahni in thuneihna hran an neihna vekte kha a lo ni a. Chutiangin tun lawka kan han ngaihthlakah te pawh khan, nia, keini pawh kan kal a, a chhia a ni chhiat chu. Amaherawhchu, heng hi Highway enkawl te an lo ni a. Kawng chhia chu a hreawm khawp mai, motor tha a han tlan phei chuan a uiawm duh khawp a. Amaherawhchu kan khua hian a zir ngang si lova, theihtawp han chhuah pawh hian awmze awm lohna lai hi a tam ve hle a ni tih ka sawi duh a. Keini phei chu a tuar zual hi kan nia. Thingsai te phei hi chu kan mang hi a ang em em thin a, ruah a rawn sur hlek tawh hi chuan kan buai thin a ni. Khingte pawh khi BRTF kawng a ni a. Buhfai kan han phur thleng thei lo nghal a, zin turte pawh an kal thei lova. Khilai khaw thenawm Cherhlun-ah khian Sumo an dah a, 16 km lai kha la ni si a. Chutiang chuan kan mangang thin a, khua an chhiatte hian kan buai em em a. Ruah a sur hlek tawh hi chuan kan rilru hi a mangang thin a ni. Khangte pawh kha BRTF an nia, kan Chief Minister zahawm tak hmalaiknain tunah khi chuan hma an han la tan dawn ta a, kan lawm khawp mai a. Camp

te pawh an han buatsaih a, an han riak lut a, survey te an han bei zel te khi kan lawm khawp mai tih ka sawi duh a.

Tin, chutih laiah chuan han sawi duh ka nei a. Mizoramah khaw lian ho zawng zawng hi kawng tha pui puiin a pawh tawh a. Amaherawhchu khawlian pahnih Champhai leh Lunglei inpawhna hi direct tak hian a awmlo a ni. Seling-a kan kal kual loh chuan Keituma kan kal kual a ngai a. Khatiang khan direct-a in link-na hi a la awmlo a.

Tunah hian South Chawngtui leh North Vanlaiphai inkar 15 km khi lai tlang ta ila chuan Champhai tlangdung zawng zawng te hi khilaia lo kal thla in Hnahthial-ah, Lunglei lam a ni emaw, Lawngtlai a ni emaw, Saiha kha awlsam te in a kal theih ang a. Keitum lama kan kual khan a hla viau mai a. Helaia kan kal erawh chuan 38 km laiin a hnai dawn a ni.

Sawlam zawng zawnge pawh heta rawn kal kual tawh lovin direct-a an kawng hnuk hnai ber a ni a, 15 km kan han tih kha a pumpui a ni a. A tlangram chin, (leilet tiampi lo khian) khi 8 km a tling vaklo a ni. Khilai khi tha deuha tih phei chuan khaw lian pahninte hi direct-a an inkalpawhna tur awlsam tak a awm theiin ka ring a. Hei hi kan Chief Minister zahawm tak hian min lo chhinchhiah sak ka duh a.

Tin, kan Chief Minister zahawm tak hmalaknain Hnahthial-Haulawng kawng hi a tan thla zawnge (Mizoram hi a dung zawng hian kawng a kal tlangpui a, a tan zawnge kal hi a tlem khawp mai a.) an ti ta a, a lawmawm khawp mai a, 12 km chin saw tunah an han lai mup mup mai a, kan va en ve a. A tha dawn khawpin ka hria a, a kawng te pawh an lai zau a, 32 km chauh a ni a Haulawng hi. Helai hi min laih tlangsak hunah chuan keini khilam pang tan pawh awlsam te in Aizawl kal dawn pawhin sawlai tlan thlak te a lo awlsam tawh zawk ang a.

Tin, sawlai bial saw nasa takin kan inpawh dawn a ni. Inpawh theih reng reng loh, inkalpawhna awmloh avanga hnai te si, rilru leh taksa lamah pawh inpawh tehchiamlo khan a awm ve theih a. Sawmi min laih tlangsak hunah chuan kawng engkimah kan inpawh tawh dawn a; tin, kawng tangkai tak a ni ang tih ka ring a.

Tin, chubakah S.Mualthuam atanga Balhlakawn, sawlai Lawngtlai inkar saw 28 km chauh a ni a. S.Mualthuam thleng sawn PMGSY a kal tawh a. Tichuan S.Mualthuam atanga Balhlakawn, Lawngtlai khawdai saw 28 km laih ngai a awm a.

Sawng te saw han laih tlang ni phei se chuan Multi-Modal Transit Transport Project hi kawng lo tlang ta se, helama rawn tlang pheina awlsam tak kha a ni tawh dawn a, a tihci awm mang e aw kan ti a ni.

Tin, Hnahthial lam atang phei chuan khulam , Lunglei lam, Hrangchalkawn lama an zu kual khuan a hla khawp mai a. Sawlai saw tlang ta se chuan a inhlat hleihna tur hi 60-70 km inkar daih a ni dawn a. Hengte hi kan rilruah a awm a, vawiinah hian kan hotute hriatah ka sawi chhuak duh a ni.

Tin, Muallianpui atanga Hnahthial khi 30 km tih lek hian a laih tlang theih a. Tunah khi chuan an rawn kal kual a, S.Vanlaiphai-ah rawn kal kual in Darzo-ah an rawn kal a. Tichuan 57 km velin Hnahthial an rawn thleng thei a.

Amaherawhchu Muallianpui atanga S. Lungleng hnuai lama kal thlakin Zabiaka kai ah Tuipui kan sown 30 km velin a kaichho thei a ni Hnahthial saw. Khangte kha min lo hriat sak atan ka'n sawi duh a.

Kan lawm em em na chu kan Chief Minister zahawm takin Darzokai lei min dawhsak a, min hawn sak bawk a. Tunah chuan an thla a muang em em mai a. An lo kal te pawhin ka kawm thin a, an lawmzia ringawt hi an sawi a ni. A vang chu tunhma kha chuan engmah an ti thei lo. Zanah an lo kal theilo a, chhunah pawh tuilen chhung zawng zawngin an kal thei lo a. Thingzik bula Zawng dan an nihna kha kan Chief Minister hmalaknain min han dawh tlang sak te hi kan lawm em em a.

Chutihlaiin PWD hian lei hi 74 enkawl lai an nei a, 39 hi permanent bridge a ni a, 35 erawh hi chu temporary a ni a. Tin, Highway lam hian 50 an enkawl bawk a. Lei chhia apianga kan Mizoram PWD han mawh ringawt pawh hi a dikhlel em aw ka ti a. Highway hian 50 lai an enkawl bawk a ni tih kha ka'n sawi tel duh a.

Tin, pawimawh em ema ka hriat chu Quality Control hi thuamthat an tha in ka ring. Avang chu vawiin-ah Quality Control hnathawh dan te ka hriat ve theih chinah hi chuan quality an control lo a ni. Avang chu an khawl neih te, a hmuna va testna tur te an neilo nge? Sawlai office-ah an va keng a, helaia tih char sa kha an va keng a, office atang chuan an cement kha a tha, an rora a tha tih mai thin hi a ni a.

Hetiang lo deuh hian Quality Control hi equip ta ila, thuneihna sang hret pe ta bawk ila. Khawl tha hmangin PWD hnathawh zawng zawng Quality Control hian an duh hun hunah check that that ta se,tichuan kan blacktop a ni emaw, kan insak zawng

zawng hi a proportion engkim hi a tha thei ang tih te ka ngaihtuah a. Chu chu kan sawilang duh a ni.

Soil & Water Conservation Department, demand no.33 hi Pu Deputy Speaker, han sawi leh lawk ka duh a. Vawiinah hian kan sawi tawh ang khan tlangrama cheng kan ni a. Kan tlang hi a chhengchhe em em a. Lo kan han nei a, kan han vat a. Ruah an sur a, kuthnathawktute sawi dan takin kan lei hang tha zawng zawng kawr ah a tla tlang thla thin a ni. Chumi a nih avang chuan kan buh thar kum 1 bak hi chu a kum lehah hian chul rih ngaihna a awm tawhlo a ni. Lei tha hang zawng zawng kha a liam tawh an ti thin a.

Chuvangin soil erosion conserve tu tur ber awmdan hi (anni pawhin rawtna chu an nei tho thin chuan ka ring a). Engtin emaw-a tihchangtlun deuh chu an ngai em aw tih ka ngaihtuah. Soil erosion te a awm nasa si a Mizoramah hian. Anni hian hnathawh tur an ngah hle lo maw aw tih lai hian an thu deuh mai mai em aw tih te pawh hi ka ngaihtuah a. Nge ni a bungrua leh sum leh pai leh thil dangah hian an changtlunglo zawk tih erawh chu ka hrithiamlo a.

Tin, ka'n sawi duh chu rubber plantation chungchang hi. India ram hi khawvelah rubber plantation nei ngah ber pathumna (3) kan ni a. Tin, khawvela rubber consume/hmang hnem berah hian a palina (4) lai kan ni. Market a buailo tih kha a chiang a. Tichuan Kerala te, Karnataka te, Tamil Nadu te, Andaman & Nicobar Islands te hi rubber tharchhuak nasa an ni. Rubber hi a market hi a buai reng reng lo a, rubber chingtu inchhir kei ka la hrelo a ni.

Khatiang kha kan dinhmun a ni a. Kum 1902 khan Havea plantation, Thattekadu, Kerala-ah khuan an rawn tan a. Chumi hnu ah Kerala atang khan Karnataka, Tamil Nadu ah te a lo darhzau zel kha a ni a.

Tunah hian Kerala-ah ringawt khuan 72,000 hectare khu an enkawl a, an latizau zel a, hei hi record-a a lan dan a ni a. Kumkhata an hmuhchhuah pawh a tam. Tin, helai kan thenawm lawk Tripura-ah pawh hian 2006 atang khan tih tak takin an ti a. Kum 20 chhung atana target hi an nei a ni. 2010-2011 ah khan 11,673 hectare ah rubber an ching a, an zawngchhang a ni.

An zawngchhang em avang khan ‘kum 20 chhung target i nei ang u’ an ti a. Tuna an target ah chuan kum 20, 2016-2026, chhung hian 85,094 hectare hi phun

hman an tum a ni. Tunah khuan an sum hnar a crore a crore tel an lakluhna a ni a, ropui an ti hle a.

(Pu Dy. Speaker, 1 min ka la nei tiraw). Mizoram-ah hian rubber plantation hi kan uar tan ve ta hle mai a. A ti tawhte ka zaws thin a, zawngchhanglo an awm lova. Hmathlir tha tak an nei a, an hlim hle hlawmin ka hria.

MIRSAC hnuaih hian rubber kan chinna hi 38,000 hectare vel bawr niin a lang a. NLUP hnuaih ringawt pawh hian kan lo ching tam khawp mai a, 1,433 hectare lai NLUP hnuaih hian kan lo ching a ni.

Hei pawh hi an han hlawhtlin chuan Mizoram economy hi a thuai danglam dawrhin ka ring a. Tin, NABARD hnuaih hian 1,000 hectare an ti bawk niin a lang a, private-a hmalatu tam tak an awm bawk a. Hengah hian nasa lehzual in hma la ta ila Mizoram kuthnathawktute tan hian a chhenfakawmin than dawrhna leh Mizoram economy ti danglam dawrh thei hmasawnna a nih ka ring.

Amaherawhchu Rubber Smoke House te emaw, Rubber Processing Plant emaw hi chu tunah hi chuan kan mamawh tan tawh em aw, kan plantation te han en hian tih erawh hi chu a ngaiantuah theihin ka hria. Tichuan heng thingpuife te, coffee chungchangte erawh hi chu Pu Deputy Speaker, ka sawi hman tawh lo ah ngai ila. Heng kan Chief Minister zahawm tak demand zawng zawng te hi ka rawn thlawp e. Ka lawm e.

DEPUTY SPEAKER : Pu Chalrosanga Ralte.

Pu CHALROSANGA RALTE : Pu Deputy Speaker, ka lawm e. Ka sawi rei lovang, point hnih khat lek ka nei a. A hmasa-in demand no. 45-na PWD-ah khan ka'n sawi ve duh chu (nichin khan kan hotute, member zahawm tak takte khan an rawn sawi tawh a)kawngchhia hi chu a awm lo thei lo a ni tih kan chiang a ni. Ama'rawhchu, thil reng reng hi mak ve deuh mai chu mihring hi mi thatna lampang sawi ai chuan an chhiatna lampang sawi hi kan uar mah mah zel emaw ni aw tih hi ka rilru ah a awm a. Ama'rawhchu, a chhe lai kha chu kan siam tha tur a ni a. Chu mi chung chuan PWD-a kan hotute ka'n fak ve duhna lai chu limited source, sum harsatna nasa tak a awm tih kan hria a, chu mi chung chuan mahni veng, mahni khua, mahni bial tan kan hotute hnenah kan va tlan a, 'hei hi min tih sak rawh, min tih sak rawh,' kan va ti a. Chutiang chuan Mizoram pum an han enkawl a. An enkawlna kawngah chuan khawilai emaw chhe lai a

lo awm a nih chuan kan inhriatthiam tlan pawh hi a ngai lawm maw ni le aw tihna rilru hi ka nei a.

Lunglei atanga Buarpui kawng saw kawng upa ve tawh tak mai a ni a. Kum 20 chuang a ni a, tun thlengin blacktopped hi an la hmu ngai reng reng lo a ni. Ama'rawhchu Pu Deputy Speaker, ka'n sawi duh chu tunah hian kan hotute thahnemngaihna leh an thawhrim avangin leh kan House Leader zahawm takin hma min lakpui avangin Thuampui atanga Sertlangpui 27 km NABARD sum atangin 30 crore sengin tunah hian an siam dawn tawh a ni. Mipuite pawhin kan nghah peih ve deuh hi chu a ngai thin a ni. Chuvang chuan, tunah hian sawlai tlangdung mipuite kan lawm a, hahipin vawiinah hian kum 20 chuang blacktopped la hmu ngai lo ten kan han hmu turte hi a lungchhiat thlak lek lek zawk a ni. Engpawhnise, mipuite pawh hian kan nghah peih ngaiin ka hria a ni.

Tin, ka'n sawi leh duh pakhat chu Power & Electricity-ah hian a ni a. Tunah hian power 132 KVA line hi Melriat atanga Buarpui kaltlangin Lunglei pawh turin chak takin hma an la chho mek a. Hei hi Lunglei mipui ten kan nghakhlel tawh khawp mai a. An rawn tih zawh hi kan nghakhlel tak meuh meuh a ni. A chhan chu kan hre vek ang a, tunah chuan Serchhip Pukpui atang hian Lunglei hian power kan dawng a. Engemaw fur nikhuua line fault a awm hi chuan kan thim rup mai a, darkar hniih khat lek ni lovin, ni khat ni hniih lek ni lovin, a chang chuan kar khat chuang te kan thim thin a ni. Chuvangin tuna 132 KVA Line Melriat atanga Buarpui kaltlanga Lunglei an rawn siam tur hi a lawmawm ka ti a. Hei hi chak taka kan hotuten hma min lak pui a, kan contractor te pawh min vil sak a, theihtawp min chhuahpui turin ka rawn sawm duh bawk a.

Hmanni lawkah bial kan fang a, tah chuan kan contractor hna te kan han en a. Bial mipui ten an han sawi sap sap a, kan contractor ten an thawh dan kha min han hrilh a. A hnuai berah rawra an dah a, balu an dah leh a, tichuan a chungah cement an dah a, tichuan tui an zuk leih a, an phun mai an ti a. Ka awih chiah lova, ama'rawhchu, rang takin Lunglei lama kan SE te, kan EE te ka han hrilh a. An chungah pawh hian lawmthu ka'n sawi duhna chu ka sawi hnu lawkah an zuk chhuk a, an zuk verify leh a, thil diklo a lo awm a. Tunah hian hma an la chho mek a, lawmawm ka ti tak zet a ni. Kan hotute chungah hian lawmthu ka sawi tak meuh a ni.

Demand no. 36-na ah hian ka'n lut leh nghal ang a, Environment, Forest & Climate Change Department-ah hian. Teak phuntu ten kan nghahhlelh em em mai Saw mill kan tih hi kan House Leader zahawm tak hian engnge tunah hian a chanchin min hrilh thei em aw tih hi ka hre duh a. A chhan chu vawiinah hian teak kung khat hi ` 1,400/-, ` 1,600/- tih velin an hrallh a. A tlawm em em mai a ni. Internet vel ka'n en hian teak cubic khat hi Indian rupee in 2,000/- a ni ve tlat mai a ni. Chuvang chuan, han chhut hian a uiawm hle mai a, hetianga Saw mill te kan nei a hma kan la chho thei a nih chuan teak growers te hian manhla takin Saw mill-ah hian an hrallh ve thei tawh dawn a. Chuvangin helaia hma an lakna zelah hian kan hotute hian tunah hian engnge a chanchin tih hi nakinah min hrilh theih chuan a lawmawm viau ang.

Pu Deputy Speaker, a tawp ber atan ka'n sawi duh chu a ngaite bawkin sawlai Buarpui tlang dungah sawn kawngtha kan nei dawn a. Thil buaithlak ve deuh mai chu P&E department-ah te, Forest department-ah te, Food & Civil Supplies Department-ah te hian keini hi Lunglei District-a awm chung hian Serchhip Thenzawl kan dawr hi a ngai tlat zel mai a ni. Heti lai hi keini bialtu MLA tan chuan engemaw chenah chuan harsatna te pawh hi a awm ve a. Administrative Reforms lampangah hian helai hi a district awmna naah hi chuan a district-te hian hma an la thei mai lawm ni tih hi vawiin ah hian ka rawn sawi duh a ni. A buaithlak thin khawp mai Serchhip-a han kal daihte hi a ngai thin a, chuvang chuan hei hi kan hotute hian min han hriat sak se; a district awmnaah khan kan district department te kha kan awm vek thei mai lawm ni tih te kha min han en sak se tih kha Pu Deputy Speaker, tawite-in ka rawn sawi duh a.

Tuna kan Chief Minister zahawm tak demand zawng zawng hi pass pui turin ka rawn thlawp a ni e. Ka lawm e.

DEPUTY SPEAKER : Hun i hmang thiam khawp mai. Tunge sawi leh ang le? Col.Z.S.Zuala.

Lt.Col. Z.S.ZUALA : Demand hi a tam deuhhlek a, a vai chuan kan sawi thei lo ang a. A hmasa berin Assembly hi, kan hriat angin Assembly hian min enkawl a. Session zawng zawng an organize a an efficient khawp mai. Prompt takin kan mamawhte min enpui thin tih kha ka'n sawi hmasa duh a.

A dawt lehah chuan Governor hi, tunah hian Raj Bhavan thar khi an sa zo tawh ni awmin a lang a, a hlui kha an la dahtha a, khi khi a tha ka ti khawp mai, thilhlui dahthat khi. Raj Bhavan sak nan leh Sainik School sakna tur kha 12th Finance Commission khan a rualin a sanction niin ka hria a, tunah chuan a pahnih hnihil a hlawhtling dawn ni awmin a lang a. Hemi ah hian PWD te pawh hi an fakawm a. Tin, Raj Bhavan tun hma khutilaia an lo plan, Secretariat kalkawnga Masjid emaw tih mai tur awm vung thin kha tunah chuan an thlak dawn ta ni awmin a lang a, a tha ang reng viau a.

Amaherawhchu an plan leh architect design vel kha Governor lo awm tawh te tumah khan an appreciate vak lo niawm in ka lo hria a. Tunah sorkar thar in Raj Bhavan tha tak a sak sak a, khingte hi a lawmawm ka ti a. Tin, kan Governor hi a fakawm hlein ka hria, south gate leh north gate hi an ip chho va, traffic leh parking area leh kawng tih zau nan an siam hi a lawmawm hle a, fakawm ka ti a.

A dawt leh ah chuan SAD hi Secretariat-ah te kan han office ve a, an tha hle in ka hria a. Punctuality pawh an maintain thei a, kan Chief Secretary ho hi an efficient-in discipline pawh an enkawl tha hlein ka hria. Tin, cleanliness lampangah an fakawm hle in ka hria. Amaherawhchu, entrance gate bula Building ho in Secretariat view hliah lura bank an sak khu a thatna tur ai chuan Secretariat mawina leh ropuina a hliah in ka hria a, bank-te hi kan mamawh ve tho si chu a ni a. Tin, pakhat leh chu lift khu an install-a mahse a function lo niin ka hria a, khu khu function thei tura tih hma theih ni se chu a tha khawp ang. Tin, Secretariat-a security khu tlem chuan tunhma ang ringawt leh tuna kan state ralmuang ang reng hi chuan kan awm theih ka ring lo a, engemawti a security khu strick chhoh a ngai tial tial in ka ring.

Forest-ah hian kan forest Minister kha engemaw buai deuh avangin a resign a, mahse a kaihhruaina-ah khan Forest ho hian nasa takin hna an thawk a, kangmei te pawh a tlem viauin ka hria. Nikum leh tun kumah phei chuan ram kang sawi tur ka hre chiah lova; pakhat ka hriat chu Zokhawsang Assam Rifle hmun thar, an location thar hnuai saw a kang deuh ziah mai a, tun kum pawh khan a kang a, saw saw private ram a ni a, an ti kang nge tih chu ka hre lova. Saw mi tih loh chu kan zinna ah te pawh ram kang chu ka hmu chiah lova, hmanni lawk khan

Kanhmun-ah ka zuk kal a, kalkawng ah pawh ram kang hmuh tur ka nei lova, a lawmawm khawp mai. Tin, forest product enkawl chungchang leh hrallh chungchangah hian hmanni deuh khan Kanhmun-ah Forest department-ten dan loa mau an sah phai lama an tawlh ruk an lo check-na lamah misual thenkhatin Bru hel pawh an ni chiahlo mai thei a, kan hre lo a, khang ho khan Forest staff duty kha an lo vau a, khangte kha a pawi hle in ka hria. Engpawhnise, kan forest product hi chu khatia ruk mai mai tur a ni lova, theihtawpin security lam backing-te pawh a tul chuan dil theih reng ni se, police escort-te pawh duty-te pek zel ni se a tha in ka ring. Tin, teak hrallh chungchang kha ka hma ami Pu Chalrosanga member zahawm tak khan a sawi a, hei hi a dik hlein ka hria. Teak an hrallh dan hi nichina an sawi kha 1500 te a ti a, khuti lai khawtlang thenkhatah chuan 1000 pawh ni mang lovin an hrallh a ni. Hengte pawh hi a uihawm lutuk a, kan ram tha lai an vat a, chutah teak an phun a, kum 30 hnu ah emaw hrallh theihin a lo awm a, tlawm te te-a hrallh kha chu a uihawm hle a ni. Chuvangin saw mill te kha nei ila chu kan saw mill ah te kan han hrallh ang a, man man zawkin khangte pawh kha deparmtent-in min enpui thei se chu a tha khawpin ka hria. Tin, forest conservation emaw kan product hi tunah hian kan hre tho a, thingzai tawlh te hi a awm reng tho a, hengte pawh hi permit nei fumfe lo te pawh an niin a lang a, khami awmzia kha chu kan thing tha tak tak kha an kit a, a rukin an zai a, an tawlh chu a ni a. Mahse in sak nan te kan mamawh ve tho si a, kha kha engchin nge kan ngaihdam theih dawn tih te chu sawi a har khawp mai.

Tin, bazar-ah hian rawtuai hi kan hrallh nasa khawp mai a, rawtuaite pawh hi a wholesale lo deuh hian tih ni se, engemaw chin domestic consumption atan an lo la te hi chu sawisel in a in check vek theih loh mai thei a. Hetah pawh hian Forest department-hi chu strick deuh se chu a tha awm mang e aw ka ti. Bazar-ah hian a lang a pau a sakhi sarep zuar ngam te pawh an awm a, vahrit te leh sava chi dangte pawh hi kan check deuh chu a tha hle turah ka ngai a,

A dawt leh ah chuan Power & Electricity department hi kan Chief Minister hmalakna example ropui tak kan hmuh theih reng chu Tuirial Hydel Project hi a ni a. Ka bial Aizawl South-II atang sawn hman deuhhlek khan kan MUP Unit pakhat chu an zuk kal a, nuam hi an han ti khawp a, ropui kha an ti

bawk a. Tin, a lo thawka te khuti laia an engineer leh hnathawk ho pawh khan an lo welcome khawp mai a. Hmanni deuh khan Mission Veng South-a kan Congress unit-te pawh an zuk kal a, a ropui a, kan sorkar hmalakna hi ropui tak a ni a. Chubakah hetianga project tha electric power supply min pe thei tur an zuk hmu te kha an lawm khawp a ni tih ka'n sawi duh a. Hengte pawh hi kan hriat angin thil harsa tak chungin kan hotute pawhin risk an la a, loan la in hetiang project-te hi min han din sak dawn a ni a, kan Chief Minister leh department-te an fakawm hlein ka hria.

PWD hi han sawi leh ta ila, kan hriat angin PWD hi department lianpu a ni a, mi zawng zawngin kan hman tangkaite an ni a. Hmanni deuha khawthlang lama ka zinin Bairabi leihlawn thlangah khuan ferry-in Tlawng kan kai a, khu ferry khu kan kal lai tak chuan a khawl kha self-starter a tha lo an ti a, manual-in kan kai a. Chu chu kan hotute ka hrilh a, khawl hi serviceable-a dah ni se ka ti a. Mahse kan han check a, khawl hlir khan an lo operate tawh a, a lawmawm khawp mai a.

Tin, khumi leihlawn khu April thla hian kan hawng thei dawn ni awm khan an sawi a, khumi khu an hawn phei chuan khawthlang nena kan in kalpawhna khu a awlsam dawn a, Mizoram pawh hi a te hret dawn a ni. A lei pawh khu a ropui a, harsatna tam tak karah khuti khuan an han ti chhuak chho a, khumi leihlawn hawn hunah khuan khawthlang leh khawchhak inkalpawhna a awlsam dawn a. A bikin Agriculture department tan chuan Oil palm lak chhohna, a khawlpui Bukvannei-a lakna tur kawng kha awlsam zawkin a awm thei dawn a, hei hi lawmawm ka ti hle a ni.

Minor Irrigation leh Agriculture department hi in coordinate a ngai khawp mai a. Agriculture-in leileh nan irrigation an mamawh a, department atanga han tih mai theihloh kha Minor Irrigation lamah te a ngai thin a. Minor Irrigation hi uluk zawka Agriculture nena in coordinate hi tha hle turah ka ngai a.

Soil & Water Conservation-ah rubber chungchang kha an sawi a, hei hi tha dawn khawpin a lang a. Amaherawhchu rubber chin nan hian kan forest ram tha tak tak te kan vah a ngai a, khatah khan balance thiam pawh a ngai hle ang ka ring. Forest kan lo neih sa hal rala rubber han phun kha, rubber a lo puitlin chhung kha kum engemaw zah kha a lo ni a, kha kha buk thiam a ngai khawpin ka ring.

Labour & Employment, ITI hi kan bial chhunga awm a ni a, anni hi an tha khawp mai a, kan thalaite nasa takin training te an pe a, kan hlawkpu hle in ka hria a. Mizoram chhunga Electric leh PHE-in an chhawr tam tak te pawh hi khami product kha an niin ka hria a. Ka bial chhunga awm an nih avangin kan in contact zeuh zeuh a, an hnathawh khu a tha a, kan technician tam tak chherchhuaktute an ni. Khati zawng kha ka sawi theih chu ni mai se. Pu Deputy Speaker, ka lawm e.

DEPUTY SPEAKER : Minute 10 a la awm a, tunge sawi ang?

Pu LALTHANLIANA : Pu Deputy Speaker, hun min pe a ka lawm e. Tlem tlem kan Chief Minister zahawm tak demand hi han sawi ka duh deuh a.

A hmasa berin demand no.1, Legislative Assembly-ah hian sawi duh ka nei a. Kan thusawi Proceedings hi an lo la thin a, a buaithlak tihna deuh ka nei a, hei hi. Correction siama han tih that tur hian tawngkam hi kan lo thiamlo thei lutuk a, a nuihzatthlak a, a then phei chu awmzia bo deuh lek lek te-in kan hmu thin a. Hmanni khan zu chungchang kha ka sawi a, zu chungchangah khan MLTP Act chhunzawm zel duh kha pawl paruk an awm a, chutih laiin tih tawp tha ti kha pahnih an awm a. Pawl paruk ‘duh dan lo khan’, tih kha, ‘duh dan khan’ ti khan a rawn chhuak a, a awmzia a in letling chiang lutuk a, mahse ka han correct a. Khatiang deuh kha a ni a, for example ka han pe mai a ni. Short hand thiamte pawh hi kan neiin ka hria a, heng hi kan CM zahawm tak pawhin a ngaimawhin ka hria a, hei hi siam that deuh dan a awm lawm ni aw! Tawngkam thiamloh nak alaiin kan sawiloh dana ziak te kha a awm a, a awmzia hi a bo deuh thak thak a. Anmahni an sual ta chu ka ti hauh lova, tlem chuan en fiah deuh a ngai em aw chu ka han ti deuh hlek a ni. (DEPUTY SPEAKER : A then hi chu kan tawng liam ve deuh bawk a ni.) Ni e, a dik a, a then chu rang deuhin kan tawng a, a then chu muang deuhin kan tawng a, khang te kha a ni a. ‘Vei rawh, vei rawh, hui rawh, hui rawh’ tih ang te pawh kha ‘hau rawh, hau rawh’ tih ang te pawh khan a awm ve thei a.

Engpawhnise, Pu Deputy Speaker, Economic Survey te min han sem a, khang atang khan kan budget te kan han en thin a, demand hrang hrangte. A kip a kawi chuan engmah hi a chiang lem lova. A hmasa bera ka sawi duh chu demand no.39, Power & Electricity Department chungchang hi a ni a. Dik tak chuan eng hi a tha niin ka ring a, keini party phei chuan kan fin-chilh nasa a, vawiin thleng hian a that zia hi kan la hria a. A nihna takah chuan eng awm miah lova chaw-eite hi a tui miahlo nia maw le!

Enga chaw-ei leh thima chaw-ei te pawh hi han khaikhin ila. Hriselna atan te pawh a tha a, eng awm tha hi. Tin, ‘Education is all round development’ tih a ni a, ‘Power is a source of all round development’ niin ka hria kei chu. Chuvang chuan a pawimawh ka ti em em a. Tin, a thawktute pawh hi an fakawm in ka hria a, Committee hrang hrang atang te pawhin kan kawm zeuh zeuh a, an hna te kan en thin a, an hneh viau zel mai a. Engkim mai hi felfai takin min lo hrilhfiah thin a, a thawktute pawh an fakawm in ka hri a.

Governor Speech hi kum dangah te pawh kan han ngaithla thin a, ‘Power MoU signed a ni, etc. etc.’ tia lui awm zawng zawng deuh thaw hi MoU sign pui deuh vek tawh niin ka hria a. Amaherawhchu tun tumah hi chuan pahnih vel chauh, Tuivai leh Tuirini te hi an ni a. Tuivai hi 210 mega watts pe chhuak thei a ni a, hei hi ni 10.2.2015 khan MoU signed tawh a ni a. Tin, Bairabi Dam Project, 80 mega watts pe chhuak thei hi ni 10.8.2012 khan Sikaria Power Ltd. Kolkata te nen MoU signed tawh a ni a. 2012 atang chuan vawiin hi a sign kum leh vawiin chhiar phei chuan a tam lutuk, a inkarah hian kum 4 a tla a. Free Feasibility Report buaipui mek a ni tih te a la ni deuh chauh a. Lui pakhat khuap tur hian hun avan duh rei dawn em ve aw ka ti a, hei hi a nghahhlel-awm ka ti, eng hi engkim atana a pawimawh a. Engpawhnise, vawiinah hian peihloh ala nih pawhin, MoU kan signed tawh te kha chu avaia buaipui luai luai tha ka ti lova, kan intodelhna tur hi buaipui mai tha in ka hria a. Tin, 60 mega watts pe chhuak thei Tuirial te pawh hi 2000 Economic Survey-ah kha chuan a lan dan chuan 2017 March-ah, ‘within March, 2017’ tih kha a nia, a zawh hun tur. Mahse, helaia Governor speech-ah chuan 17-18 chhung in tih kha a ni a, khawi zawk nge dik zawk tih hi ka chiang lova. Tin, tunah hian kan neih chin chu 29 mega watt zet zawl a ni a, a bei tham khawp mai a. In concentrate-na bik hi pahnih khat ah hian nei law law ila, kan in todelh dawn tho tho a, a tha mai awm mang e, tihpawlh nuaih ai chuan tih hi ka ngaihdan a la ni reng a ni. Lui zawng zawng hi khuap ila a tha chuang lova, chuvangin a tha zual ah hian in concentrate mai ila a tha in ka hria a. Tin, Serlui Hydel Project hi official hian kan la commission lo nge maw ni a reh ta riau va, eng nge maw a dinhmun hi ni? Tin, khawchhungah transformer tam deuh mai RAPDRP project hnuaih (a) leh (b) an siam ni khan ka hria a, nikumah khan E-in-C khan kum 2016 chhung hian khawpui chhung ami hi chu tihnun kan tum an ti a. Nov, 2013 khan MLA-a thlan tlin kan ni a, 2014 vela fund kan hmuh hmasak ber atang khan a dawhthleng tur MLA fund atanga kan siam tawh kha a lo la dawh ngar ngar

mai a, hei tunah chuan E-in-C sawi angin an rawn tinung dawn tan niin a hriat a, a lawmawm ka ti khawp mai a, a nghahhlehawm a.

Tin, RGGVY Scheme hnuiah hian niin ka hria a, mirethei te tan nimina ka ngaihthlak ang khan free connection pek an ni a. Hei hi zawh chian ka tum thin a, mahse a mobile min pek ah hian a chhang thei thin lova, khunglai Bilkhawthlir leilet ah te electric connection hi pek an ni a, RGGVY Scheme hnuiah ni tur ah ka ngai a. Hei hi a la zo lo a nih chuan a then la pek loh an awm a, chu chu bulb pakhat te te a pek te kha an awm a, khunglai vel khu Kolasib hnuiah khuan pek kim ve law law khu a tha lawm ni ka ti a, Department lam te pawhin min lo en sak se ka ti khawp mai, chu chu ka'n ngen deuh pah bawk a.

Demand no. 33-na Soil & Water Conservation Department chungchanga ka'n sawi duh chu RKVY project hnuiah CSS te pawh an lo nei a. Tin, NABARD sum atanga mirethei tanpui te pawh an lo nei a. Rubber chungchang ah hian hma NASA takin an lo la tih te pawh a hriat a. Tin, rubber, coffee, hmunphiah ah te pawh hma an la a, a bik takin hmunphiah bik ah hian zawhna chhanna ah khan quintal 350417 zet kha tunah hian thar chhuah a ni a, official record a nih ka'n ring deuh va, chumi lo pawh a awm teuh a, a hlawk dawn hle mai a ka ti a. A hmun anga siam te pawh an tam ta khawp mai a, hemi lamah hian a hlawtling khawp mai a. He Department hi te reuh te anga lang si hi a tangkai dawn hle in ka hria a. Ka hma ami te khan rubber hmakhua a that zia tur kha an rawn sawi a. Kan lekhhabu atang khan district panga Mamit, Lunglei, Kolasib, Lawnglai leh Serchhip-ah te rubber plantation a ni a. Tin, district sawm (10)-ah rubber nursery te pawh NABARD sum atangin siam a ni a (Deputy Speaker : Dar 1:00 a nia, sawi zawh tir law law ang u aw) Heng hi khawi khawi khuaah nge tih a nih aw ka ti a, Kolasib khuaah te khuan nursery te khu a awm tak tak em tih te kha ka ngaihtuahna ah a awm a.

Tin, heng district chhungah hian khawi khuaah te nge plantation hi siam a nih tih te kha hriat theih chu ka duh khawp mai a, han dawr a han bawhzui ve ka'n tum deuh va, Kolasib DEO te pawh ka'n phone a, mahse, a hriat min kawh hmuh chu vai a ni daih! Hetia district khaw sawm meuh-a nursery siam a nih tawh te chuan Mizoram chhungah te pawh kan duh khawp te chu a awm thei tawh lawm ni aw tih te ka ngaihtuahnaah a awm a. A lo awm lo a nih chuan a prospect hi a tha si a, chuvangin uar

zawka hma lak a, sum te pawh dah tam deuh hi a tha in ka hre khawp mai. A bik takin hmunphiah ah leh rubber-ah hian. He department hi an la chhuanawm dawn khawpin ka hria a. Amaherawhchu, dawr phak tur kha ka la hre hlethei lo hi a buaithlak lai chu a ni.

Pu Deputy Speaker, PWD lam hi ka'n sawi leh lawk ang a, a kip a kawi chuan ka sawi lovang a. Amaherawhchu, kan sawi angin a chhiat chuan a that hun tur a hnai kan ti a. Hmanni khan ka sawi zuai a, thenkhat khan a tha lo zawnga sawi tur emaw min ti a, a fak zawnga ka sawi tumna mah mah a ni a. Khawthlang ah COLFA Committee te kan zin a, a khu nasa em em a, lu te hi a hai ber bur mai a, kawng an lo siam vang alo ni a, a tha dawn tawh a nih hi kan ti mai a, rui ber bur mah ila a that dawn chuan pawi ka ti lem lova. Engpawnise, ka'n sawi duh chu hmasawnna tur a nih rual rual in chak zawka hmalak hi a tul in ka hria. Fur a ni leh nghal mai bawk si a, chak zawka hmalak dan tur khu engtinnge kan nawr ang aw ka ti a, khulai kawng kher lo pawh khu. Tin, Ramrikawn to PTC inkar sum ` 917 lakhs hmanni awma an sawi kha tam ka la ti tho tho mai a. Khulai kawng khu a bypass ang chauh a ni a, a main road pawh a ni lova, khatiang zat em em kha seng lovin khumi Sairang road pangngai ah khuan engemaw zat khu repair nan a bel theih zawk lawm maw ni le? A zauh theih bawk si lova, compensation a tam dawn kan ti bawk si a. Chuvangin ruahmanna siam that leh hi a tha mai lo maw? A kawngpui pangngai khu tha zawk tak maia kan siam chuan helai pumpelh ah chuan tlan tlan a ngai lo zawk a. Main road-a kal theih loh thu hlaa kal na tur chauh kha a nih avangin heti zat zat chu a uihawm ka ti deuh va. Tin, KMMTT hei hi Zochachhuah a ka kal in ka zawh ve a, a nuam zar zar khawp mai a, nakinah chuan saw lampang chu an vannei dawn mange ka ti a. A tha hi ka ti a, ka'n sawi lang ve duh hrim hrim a, ka va en ve ringawt mai a ni. Tin, a side drain an siam dan saw tha ka ti khawp mai a, tuna kan kawng awm sa te pawh hi sawtiang sown side drain te hi siam ta ila a tha khawp ang ka ti a. Tin, a hnathawk ho saw an thawk tha in ka hria a, en chet pawh saw an dawl khawpin ka hria.

Tin, minute khat chhung lek mahni bial chhungah ka'n lut zuai ang e. NEDP hnuaiah hian Aizawl City Road Junction Improvement hi thawh tum a niin ka hria a, a tha khawp mai a. Ka bial chhunga Ramhlun 'N' Industry peng saw ka tehkhin dan chuan Howrah Bridge ang vel a ni tawh in ka hria a, a busy em em tawh mai a, a tangkai

em em mai a, hetah Ramthar Veng thlengin chhuahnaah an hmang tawh a. Saw ti lawi saw zauh a, a leveling pawh saw saw aia tih that saw ka'n ngen teh ang, kan C.M zahawm tak hi. Min siam sak theih chuan a sum kha chu khawi lai atang pawhin rawn ti se ka pawi ti lo. Ka duh ber chu siam kha a ni, chu chu NEDP a ni emaw PWD budget a ni emaw khawi atang pawhin ni se. Saw lai saw zauh emaw, siam that emaw hi kan mamawh tawh lutuk a, chetsual pawh a hlauhawm em em mai a. Tin, a chhehvel ami te pawh a tul chuan compensation pawh pek mai kha a tha in ka hria. Tin, traffic tawt lutuk a zia deuh nan Ramthar, Sihpui leh Thuampui inkara lei dawh tur kha an dawh ta a, ka zuk en a hmanniah an dawh tha khawp mai a, ke in ka kal a, ka chho zel a khitah Thuampui ka han thleng tep a ni kawr atang khuan. Ka va kal nachhan chu helaia ka sawi thiam theih nan ka ti a. A lo tha khawp mai a, a leh lampang Grid saw a tha em em a, black topping te, boulder phah te a lo ni a, a kawng pawh saw a zim lo. Khu khu basic-ah chuan awm lo mahse ruahmanna leh hma min lak sak theih dan a awm lawm ni ka ti a ni. Pu Deputy Speaker, ka lawm e.

DEPUTY SPEAKER : Awle, kan chawl a hun a, kan chawl rih ang a, dar 2:00-ah kan lut leh dawn nia.

2:00 PM

DEPUTY SPEAKER : Awle, kan sawihona kan chhunzawm leh tawh ang a. Chawhma lam khan member paruk-in an sawi hman a. Tunge han tan leh ang le ? Pu Hmingdailova Khiangte.

Pu HMINGDAILOVA KHIANGTE : Pu Deputy Speaker, kan House Leader demand hi a tam zia kan hria a, 15 lai mai a ni a. Chuvangin demand-ah hian 4 han sawi tum ila kan sawi hman ang emaw.

A hmasa berin demand no. 45, PWD han sawi ila, lawmthu sawi tur a tam hle a. A hmasa berin PMGSY 2008 campaign laia laih tawh ti pucca tur khan kan nghak rei khawp a. Bial fanga kan kal te pawh hi luikawra tlak hlau hian motor hi workers te nen kan nawr tang tang thin a; Vawiinah erawh chuan pucca road National Highway 54 atanga Mualkhang kawng km 7 kan tlan zar zar tawh mai a. PWD changtu kan Chief Minister leh PWD officer te hnena lawmthu ka sawi duh a ni.

Tin, sawi tawp theih loh pakhat, lawmthu sawi pahin, tih tur tam tak a la awm a. Kawnpui to Hortoki hi tunah hi chuan bung hniah kan then a, Kawnpui atanga km 12 hi Railway contractor ten tunnel an siamna a nih avangin an motor ke, ke 10 te, ke 12 te full load-in Silchar atanga an rawn load chhoh hi kan E.E. PWD, Kolasib tih dan takah, ‘Kawnpui-ah hlang thla thawl miah lovin a ngaiin an han phur liam thla ta a. Kawng 3rd grade-a an kal hi chuan kawng chu ti chhe lo rual a ni lo,’ a ti thin a ni. Chu chu kan House Leader C.M. zahawm tak ho hian kan sawiho tawh a, Railway Engineer te nen, Railway Engineer-te chu thawk tura tih an ni a, an la tan chiahlo na a. Amaherawhchu, an General Manager lo kalin kan ti vek ang an tih avangin beiseina nen kan nghak a. Chumi bak chu km 6 a la awm a. Chu chu pawisa neihsa crore 1 kha engtin tin emaw hman loh theih loh chin a awm a. Tunah khuan black top-in an han bei ta a, PWD officer ten kan daih dawn lo ve an ti a. ‘Chuti chu NEDP Kolasib District- a an dah kha hmang dawn ta ila a remchang lawm ni tiin kan sawiho va. Mahse chu NEDP pawisa chu Kolasib town tan tih a lo ni a, ram dangah chuan a hman theih ta hauh lo mai a. Chu chu kan House Leader PWD changtu leh kan Finance Minister thlengin min lo hriat sak sela, tih fel dan te a awm lawm ni? Tin, officer rual te pawhin chu chu min lo hriatsak sela ka duh hle a ni.

Tin, Serkhan Baga road hi Congress sorkar apianga siam that tur emaw tih ang maiin Congress sorkar veleh kan han bei leh tan ta kha a ni a. Compensation te leh diversion te avangin a hun takah zawh loh a ni a. Tunah pawh khuan kan mu tanna ber chu Nisapui thlen hmaa division khu a ni a. ‘Hmang dawn lo, hmang dawn, hmang dawn leh lo, hmang dawn’ tih hian rei tak a awh a. Khuaa hotu hrang hrang te pawhin a ngai hi min tih sak rawh u tiin rei tak an dil a, mahse ‘a theih loh’ an ti a. Tunah hian diversion chu namen lovin an lai tawh tho bawk a, diversion chu kan hmang leh dawn ta niin kan hria a. Engpawhnise decision fel tak siama a kawng ngai maintain emaw, diversion emaw zawh law law hi a va tha ve tih kha Pu Deputy Speaker, ka’n suggest a ni.

Tin, kawng thar tur hi Pu Deputy Speaker, khulaia kan hotute nen proposal kan nei a. Rail kawng hian Mualkhang a rawn tlawh ngei dawn a,

Mualkhang-ah pawh station a awm dawn a. Mualkhang pawh tur hian tlang kawng kan tih Lungdai ho tan hi chuan Kawnpui dai a thlena a let leh kher a ngai a. Chumi nilovin Lungdai to Mualkhang hi hnaite a ni a. Chu chu kawng thar ruahmanna an nei a, kan Finance Minister hnenah hian kan VCP ten an submit tawh a. Engpawhnise, hei hi kan House Leader, PWD changtu hian min hriat sak sela, fumfe deuhvin estimate te nen rawn submit kan tum a, kan E.E. PWD, Kolasib division te nen min lo hriat sak leh turin ka rawn sawi lawk duh a ni.

Tin, Secretariat Administration hi kan zuk hre ve nial nual tawh a, hna an ngah hle mai a, staff an tam bawk si a. Chumi chhapah chuan keini a hminga Parliamentary Secretary lo ni ve ta hi an problem ni tur khan kan zu tel belh ve leh ta a, Secretariat service-ah hian. Heta MLA rualte Legislative Assembly Secretariat lamin an enkawl sa hi keini ang rual pawh hian hmang ve ila, SAD atang hian Assembly lamah hian chho ta ila a va tha zawk awm ve, khulam tlemin an lo ziaawm deuh ang a tih te ka ngaihtuah a, Pu Deputy Speaker, kan rawt ve ngawt a ni e.

Pu Deputy Speaker, a dawt lehah chuan (SAD kha demand no. 2 a ni a) demand no. 15-na GAD hian tih leh thawh a ngah khawp mai a, a huam a zauin a huam a hla bawk a, Mizoram House zawng zawng an enkawl a, district administration zawng zawng an enkawl bawk a, Lengpui Airport thlengin. Chu lo pawh chu khawih neuh neuh an ngah khawp mai a.

Ka'n sawi duh tak chu district administration chungchangah hian sorkarin harsatna a nei tih chu kan hre tho va. District administration hnuai Sub-Divisional ho te hi a buaithlak nalai tak a awm a, a chhan chu SDO (Civil) a bik hian kan nei hlei thei lova.

Kawnpui chungchangah chuan term hmasaa bialtu te kan lo nih takah chuan kan mi hravn kha chu Pu Darduna a ni a, kum hnih lai kan inhrawn a. Chumi bak chu BDO-in charge a rawn la tel a, a nih loh leh ADC junior deuhin D.C. Office, Kolasib atangin a rawn hmui a. Pu Sangzuala, tuna Guwahati-a Deputy Resident Commissioner khu thla 2/1 a awm a, Guwahati-ah khuan pawh thlak a ni ta a. Chumi hnu chuan an awm ta lo hrim hrim a. Vawiin thleng hian SDO (C) regular posting kan nei ta lova. Soil and Water Conservation hnuai a kan

sawi kan sawi rubber plantation hi ram lum ah hi chuan a tha deuh vek mai a, Hortoki bialah chuan hun hmasa lama an phun kha a hnai theih tawh a. Ama'rawhchu vaiho (ti mai ang) rawn hnai tum khan a rate an ti hniam lutuk a, ka hre thiam vek lova, khu lai farmer-te khuan kan sorkar hi an beisei deuh va. Kan sorkar hian a kalpui dan chu ka hrethiam chuang lova. Soil & Water Conservation changtu kan Chief Minister hnenah hian chutiang chu ka rawn thlen ve a ni e.

Pu Deputy Speaker, demand pali ka rawn sawi bak te pawh hi he House hian pass ngei turin ka rawn thlawp a ni e, ka lawm e.

Er.LALRINAWMAWA : Pu Deputy Speaker, vawiin-ah kan Chief Minister zahawm tak demand kan sawi dawn a, sawi tur a tam khawp mai.

Tun tum kan budget document kha nidangah chuan work programme kan dawng tel ziah a, tun tum hi kan hriat a tul lo nge kan dawng tel ta lova. Work programme hmuh kha a bengvar thlak em em mai a, engpawhnise hun leh ah chuan dawng leh ila a lawmawm hle ang tih ka'n sawi hmasa duh a ni.

Demand no.1 Legislative Assembly hi a pawimawh khawp mai a, a hminga MLA kan nih vena ah te kan han zin kual ve hian Assembly House building te a lo ropui khawp mai a, an hmu hma te. Kan Assembly House te pawh hi keima duh dan tak chuan democracy chhinchhiahna a ni a. Hmun hrang hrangah kan kal a, khaw pawn ah mawi takin, lian leh hleitling takin an lo sa rup rup mai a. Hetianga an sak nachhan hi ka ngaituah a. Mipui rorelna, mipuite lalna chhinchhiahna kha a lo ni a. Keini chu helaiah a building hi chu a tha viau mai, mahse chep takin kan han inbeng a ni a, tun chuk chuk ah chuan a theih kher lo ang a, hun lo kal turah chuan kan member te rilru ah awm se ka duh khawp mai. Heng kan tih ropui hian mipui rorelna leh mipui chungnun zia alo lang dawn a ni. Chuvang chu a niang ka ti a, state dang ten an lo dah ropui nachhan khu. Chuvangin ropui tak leh zahawm taka kan siam lehzual kha a pawimawh a ni.

Tin, Assembly-a thawkte pawh an fel khawp mai. Committee hrang hrangah kan han tel a, MLA te chuan englai pawhin kan lo zir reng thei lova, khatiangah khan Committee Officer leh Seceretary ten hneh taka min han brief

thin hi a lawmawm hle in ka hria. Kan tha leh zung tak tak an ni a, khalai kha tih rik loh phal chi niin ka hre lova, ka'n sawi hmasa duh a ni.

Tin, zawhna leh chhanna chungchangah hian helai atangin zawhna te an pe chhuak a; entirnan hmanni lawka constituency wise-a zawhna kan zawhte pawh kha chhan theih reng a ni. Mahse chhan theih reng si kan zawhna chiah chiah chhan kan tum kha a fel lovin ka hria a, han dap hleka chhan theih mai ang chi kha zawhna dang dang pawh a awm in ka ring a ni. Mipui aiawha MLA ten House-a kan zawhna kan hre duh a, dap khawm theih ni a lang ‘ka hre lo’ an ti kha chu thil fello ah ka ngai a ni. Kemahni mai ni lo kan hnunga ding mipuite, kan tlinlohma ang anga mipuite aiawh kan nihna ah khan House kal tlanga an hriat duh kha chu an dap ve rawk rawk turah ka ngai a ni Pu Deputy Speaker. ‘Khati zawngin kan dah lo, kan ti lo’ tih ang chi vel bawr kha chu a zia lo hle a ni tih vawiin ah hian kan sawi duh a ni.

Unstarred Question 20-na ah te pawh hian khatiang tho khan ‘Assembly Constituency ang zawngin sum kan pe lo’ ti khan chhan a ni a. Member zahawm tak ten an zawh a nih chuan a chhanna chu a zawn hian kan zawng ve mai turah kei chuan ka ngai a ni tih ka sawi duh a ni.

GAD-ah lut ila, hei hi a pawimawh khawp mai a, chutih rual chuan an chan chungchang ka'n sawi duh chu. The Government of Mizoram Allocation of Business Rules-a GAD chan serial no. 35-ah Miscellaneous subject numbers allocated to any department tih a awm a. Tun kan session dawn zawhna siam turah khan Aizawl to Tuipang double lane hi kan han zawt dawn a, zawhna tur fak hi kan hre thei lo reng reng mai a. PWD lam kan zawt a, anni lamin ‘hei hi kan kutah an rawn dah si lova, kan hre lo’, an lo ti bawk si a. Tichuan zawhna hmun tur kha kan han thlak kual a, khatiang zel kha a ni a. Tin, border fencing chungchangah pawh khan Home Department kha engemawchen hre tura kan ngaih khan an hrelo tlat mai a. Engpawhnise, central lam atanga project lo kal lai te leh hmalak tur hi chu state sorkar hian chiangkuang taka a lo hriata a lo enran hi chu a ngai a ni tih kha rilru ah a lo lang a. Aizawl to Tuipang kawng laih tur pawh chhungkaw sang tam tak a nghawng a. Mahse hre tur awma ngaihtur hrelo awma an lo awm kha a fello hle in ka hria. Tun hnu ah chuan central project Mizoram-ah agency an awm chiah

lo a nih pawhin kan lo bengkhawn emaw, khulamah keimahni thuneitu kan nihna anga kan state chhungah na na chuan kan lo bengkhawn zung zung khan mipuite tawrhna tur kan chhawk zangkhai thei turah ka ngai a ni. Ar khawthim daia a lo thlen ang angin min hmuak dawn a nih chuan thil a pawi thui tawh thin a ni. Chuvangin khalai kha hun lokal turah chuan hrechiang tlang ta ila a thain ka ring a ni.

Tun hunah hian a lehlam zawnga ngaihtuah chuan department zawng zawng hian contract work bikah hian hnathawh hi kan tum ta vek emaw ni tih tur khawpin kan awm ta a. Tun ah hian department 26 zetin contract work chungchang kan zawhna min chhanna ah chuan cheng 281 crore vel zet mai man kha mahni in thawh vek mai a lo ni a, work department kan nei chung si hian. Hei hi ruahmannna felfai zawka kan kalpui ava tha awm e aw tih ka ngaihtuah a. Finance Department hian anmahni thuchhuah ngei ah hian Works department, technical person SE neiin nuai 60 a thawk thei ang. SDO neiin nuai 30, JE neiin nuai 10 tih te kha PWD-in a phalna lo pawh khan an thawh thei tur hi anmahni thuchhuah ngeiah an siam a ni. Mahse SE nei reng renglo te khan a crore crore man te kha an khawih leh si a. Hetiang thil inkalhthelh tak mai hi chinfel a tha in ka hria a ni. Tin, payment system ah pawh rules fel tak awmin dan leh dun fel tak a inziak a, mahse department tam tak hian CPWD mannual zawm turin an zo reng reng lo a ni. Hengte pawh hi kan ngaihtuah tlan a, an thawh hi kan duh a nih chuan ruahmannna fel zawk kan ngaihtuah thain ka hria. A lehlam zawnga ngaihtuah chuan kan Chief Minister zahawm tak pawh ama chan PWD, work-department a neih laia a hnuiaia department hrang hrang ten anmahnia an lo ti sup sup mai hi thil buaithlak tak niin ka hria. Chuvangin heng hi PWD pawh in an thawh theih, engkim felfai tawhsa an ni a, kan pehhel zel dawn a nih chuan kan ti te tawlh tawlh dawn a ni mai a.

Tin, non-work ten hna an thawh te pawh hi Mizoram pawisa tho a ni a, chuvangin ruahmannna felfai taka kan kal pui kha a thain ka hria. Kan hna kalpui dan hrim hrimah pawh hian restricted tender te pawh kan ching angreng viau va. Contractor tam tak kan han register a, tah khan annin an license ti nung zel turin tender an chhan ve te a lo ngai a. A then hi chuan an license te pawh hi

an tinung zo lo ang tih te a hlauhawm mang e aw tih te pawh rilruah a awm a. Chuvangin heng hna kan han zawrh chhuahte pawh hi restricted tender lo deuhva mi tam zawkin an chhan theihna tura ruahmanna fel zawk siam than ka hria. Chuti lo chu contractor tam tak in tender an chhang hleithei lova, an licence renew dawnin an hnatawh zat te leh an tender chhan zat te phut zel a nih bawk si avangin kan rep lutuk lo maw? Helai ah te pawh hian hna han siamrem dan te leh PWD hi tun aia chak zawka thuam chak a, pehhel mai lovin tih a tha lo maw tih kha Pu Deputy Speaker, vawiinah hian ka sawi duh a.

A dawt leh ah chuan anmahni chanpualah hian cement test chungchang hi, quality control hi kan ngaihtuah a tha awm mang e ka ti a. Hmanni ah ka bial chhung khaw pakhat ah ka han kal a, an concrete chhun sa an lo vaw chhe rum rum mai a, ‘ a char thei lo’ an lo ti a, pawi ka ti khawp mai a. Chuvangin cement test-ah pawh hian tan kan lak lehzual a, tu company siam hi nge chhia tih te pawh hi kan enfiah a ngai a nih hi ka ti a. Keipawh a chungah ka han lawn ve a, Tlunvel khua-ah a ni nghe nghe a. Ka khawngaih hle mai a, eng company nge tih te ka han zawt a. Engpawnise, cement thalo khalaia lo awm kha thil zialo tak a ni. A tuartu chhungkua ten neih thinglung khawng ve tak meuh meuh a in sa an ni a, thenawm khawveng ten lo puiin an lo chhu luih luih mai a, a zialo hle a ni. Chuvangin heng quality control chungchangah pawh hian kan beng kan chhit ngun lehzual a tha in ka hria.

Tin, work quality chungchang ka sawi duh a. Ka hmaa member zahawm tak te sawi ang khan PWD-te hi an hna lo thawh tawh ah lawmthu ka sawi a. Amaherawhchu pavement an siam/thawh hian a daih rei lo thin em mai! A khawk lai leh khawi emaw lai hi a khuar awl leh em em mai a ni. Chuvangin helai ah hian technical mite leh a thawk zawng zawng ten tan kan lak a pawimawh hle in ka hria, Pu Deputy Speaker. Chuti lo chuan sum hmuh leh a harsa tawh si a, kan hna te duh anga a that loh chuan a tuartu mipui bawk kan ni leh bawk thin si a, chuvangin quality control hi nasa leh zuala kan ngaih pawimawh a ngai in ka hria. Tin non-work department-te pawhin an hnathawh chungchanga quality control thu hla ah hian chiangkuang takin a mawh an phurh thu Finance department thu chhuah ah hian a chuang a. Heng te pawh hian quality control chu a nghawng em aw ka ti a. Finance department notification ni 8-9-2016-a an chhuah ah hian tihian an ziak a ni. Pu Deputy Speaker, i phalna in, “the executing

department shall be solely responsible for ensuring the quality of works, an enforcing compliance of the procedure of the Government and CPWD manual by the executing agency” tih a ni a. Non-work department-in quality control chungchanga an mawh phurhna khatiang khian a sawi tho bawk si a. Work department pawn lama hnathawh hian quality control lam a lo nghawng thei reng mai dawn a ni tih vawiinah hian ka sawi duh a ni. Engpawnise kan thawhtir duh a ni pawhin felfai zawka kalpui dan tur ruahmanna kan siam thiam kha chu thil tul tak a ni tih a lang in ka hria a ni.

Tin, bial chhungah lut ta ila, east to west corridor kan ti, nichina member zahawm tak Pu Sangthuama sawi ang tho khan Chhingchhip atanga Khawai panna kawng te khi kawng pawimawh tak a ni a. Tunah chuan sorkar hmalakna in Chhingchhip-Thentlang, Thentlang-Sialhau-te kan han ti a. Tichuan Sialhau thlen hma Bualmun-ah kawng peng awmin Ramrikawn-ah a chhuak chho a, a kal leh zel tur lai kha, Bualmun atanga Ramrikawna chhuak chho pawh chu ni 100 inhlawhna atanga BDO thahnemngaihnaa laih mai kha a ni a. Kawng pawh duhthu a la sam chuang lo nain kal te pawh a nuam a. Engpawnise khawchhak, khawtlang panna hi chu tha lehzuala kan neih chu a tul in ka hria, chhim leh hmar kawng hi chu kan neih tha, chhak leh thlang panna hi tun aiin thlur tam deuh se, ngaihpawimawh ah neih lehzual ta ila tih ka han sawi duh a. Tin, kan bial chhung Thentlang – Sialhau kha DPR chu an siam tawh niin kan hria a, a rei leh deuh tawh si a, session-ah te khan kan zawt a, vawiin thlengin chanchin kal lam haw lam kan hre lova. Khilai khi a pawimawh khawp mai a, a bikin Sialhau khi khaw dang pan theih tawh miah lo an ni a, an changkan lehzual nan pawh a pawimawh a, black topping te a nih ve theih chuan a lawmawm dawn hle a ni. Chumai piahlamah ka bial chhung bawk ah Baktawng atanga Hmuifang panna kha engemaw chen kha chu Hmuifang atangin an rawn black top phei dawn a, amaherawhchu Baktawng atanga Chawilung phei vel bawr kha hmabak niin ka hria a, tih theih chuan a lawmawm hle ka ring a ni.

A dawt leh atan chuan Soil & Water Conservation-ah luh ve lawk ka duh a, rubber te, hmunphiah te kan ching a. Rubber hi keipawh thil tha tak niin ka hria. A chhan chu kan ram hi tlang ram a ni a, thil thiar velnate a harsa em em a, duh angin a tih hleihthei lova. Ka sawi thin a, kan ram economy ding chhuak tur hi chuan a phurh man leh a hrалh chhuah man hi a inthlau tawk tur a ni tih hi ka rilru ah a awm thin a. Chuti a

nih loh chuan thil man tlawmah entirnan, oil palm te kan sawi pawimawh em em a, sawi kai ta ila, ka zu kal a ka thil tawn chu ` 9.50-a lak a ni a, ka hriat lai chuan. Tichuan a khawih velna man, va lawh man, a thiar velna man khan a ei hnem lutuk a, an buai ve em em mai a ni. Khatiang khan thil dang tam tak, a khawih velna man to lutuk ang chi hian a man a pawtthla nasa a. Teak te pawh an ni vek ang a, rubber erawh hi chu a that na chu, tunah kg ah ` 150,160,170 pawh lo ni se thingtlang lama kan ram bawh, kawng pawh tlang lo atangin sakawrin phur dawn ta ila kg ah ` 5 aia to a phurhna tur hi chu a vang khawp mai. Chuvangin kan ram khawi hmun ah pawh, ram pilril ah pawh han ching dawn ta tehreng ila, a phurh chhuahna ah khan a man leh a phurhna man kha ala inthlau em mai a, chuvang chuan a nun khawchhuah pui thei ang tih hi ka beisei ve a. Tin, hmunphiah te pawh kan han ching a, a tha khawpin ka hria a. A chhan chu mihring hi changkan tak avanga bawlhlawh nei lo hi an vang khawp mai a. Tunlai khawvel ah kan changkan zawh poh leh bawlhlawh kan ngah tawlh tawlh emaw tih mai tur kan ni a. Bawlhlawh awm chhung chuan phiah tur kha chu a awm reng dawn tih na alo ni a, mahse a kalkawng leh link road, a hmunhma leh a sengkhawm lamah te tan kan lak lehzual tha in ka hria a, kan la viau tawh thon na in. A chhan chu heng ram tla ringawt hi chu rin aiin lakkhawm tam a harsa khawp mai a, a hmun te a lo nih loh avangin. A hmunphiah-a mumal taka kan siam theih chuan a tha hle ang tih ka ring a ni. Pu Deputy Speaker, ka sawi tam viau tawh tho bawk a, khang kan Chief Minister demand ho kha ka thlawp a ni tih ka han sawi e, ka lawm e.

DEPUTY SPEAKER : Awle, tunge sawi leh ang le? Pu Rinthanga.

Pu K.LALRINTHANGA : Pu Dy.Speaker, ka lawm e. Kan Chief Minister zahawm tak demand-ah hian lawmthu sawina tur te leh thil han tarlan ve reng reng tur te ka nei a. Amaherawhchu sawi tam vak chu ka tum hran lem lo va. Minutes 15 ka hmang zo lo maitei a ni.

A hmasa bera ka sawi duh chu PWD hian kalkawng metal an siam hian motor kawngah tuihawk luang lo tur leh tling lo tur hian theihtawp in hma la sela kan kalkawngte hi a tlo deuh ka ring a, chu chu ka han tarlang hmasa a ni.

Hmalak tur hi a lo awm teuh mai a. Chung atang chuan lawmthu han sawi hi tha in ka hria a. Hun kal tawhah te kha chuan session apiangah PWD hi kan chuk rawn luai luai ni te pawhin a lang a, kawng tha lo te a tam a. Amaherawhchu tunah chuan Chief Minister zahawm tak kaihhruainaah sum leh pai tam tak te dah niin ruahmanna fel tak te siam in hmalak tur te a lo awm a.

National Highway 306 A, Vairengte to New Vervek kan han nei thar tur hi lawmawm ka ti tak zet zet a. Vervek te, Zohmun atang te, kan Deputy Chief Whip bial te chu Vairengte-ah an rawn bazaar thei dawn niin ka hria a, ka lawmpui tak zet zet bawk a. Helai kawng hi ka han tarlan duh chu Vairengte leh Saiphai inkar khu PWD-in kalkawng te tak te in a nei tawh a. Vairengte leh Phainuam inkar khu PMGSY kawng in a tlang tawh a. Mahse metal tur kawngah PWD-in ruahmanna an han siam in a suuk zingah a tang thin a. A tawi zawngin sawi ta mai ila, 2008 Congress sorkar thar atang khan kal apiang hian a ri a. An kalkawng khu phai a nih avangin lei a nem a, a diak a, fur-ah chuan tractor tlawmngai deuh an kal hian chuanna tur an nei ve a ni mai a. Chutiang chu an dinhmun a ni a, an khawngaih thlak em em a ni. Tunah chuan he kalkawng siam na tur atan hian, a nihna ang anga metal turin tender te an ko tawh a. Double lane-a siam turin feasibility tender pawh an ko chho leh mek a ni tih te department hotute hnen atangin ka hria a, lawmawm ka ti tak zet zet a. Vairengte atanga 45 kms thleng, ka rindan in Tuirial Hydel Project thleng vel a nih ka ring a. Chutiang chuan sum leh pai te pawh a awm a ni tih ka hriat avangin a changtu Chief Minister zahawm tak hnenah hian lawmthu ka sawi a ni.

A dang leh chu National Highway 154, Bairabi leh Bilkhawthlir inkar hi mipui tan a tangkai hle a. Tunah chuan tha takin laih a ni a. Kawng thar a nih avang leh kawng lian pui te a nih avangin ko te a sang a. Ko a san avangin kalkawng tharah chuan leimin te a awm nual a, chungte chu clear zel a ni bawk a. Keini area chin phei chu kalkawng a tha tawh angreng hle a. Khulai Buhchangphai te leh Bukvannei te, Saihapui balu te khu Aizawl pa tam takin an chhawr ta a ni tih hi ka han tarlang duh a. Chutiang a nih avang chuan Aizawl pa leh ka biala mipui balu nei ten sum leh pai lak luh nan NASA takin an hmang a. Mipuiin an chhawr a, lawmawm ka ti tak zet zet a ni.

Chutihrual chuan Buhchang atanga Phaisen panna khu hun kal tawhah khan metal tawh a ni a. Amaherawhchu kalkawng te te a nih avangin metal te pawh a tha

vak lo a niang. Phaisen atangin motor lianpui pui in balu an la nasa a. Kawng khu a chhe em em a, tunah chuan fur-ah bial kan fang hleitheih lo a ni. Nikum hmasa khan pawisa kha nuai 50 em ni an dah ve a. Mahse boulder pawh kha an phah chhuak hleitheih lo va. A khuar nasat luttuk avangin kal hleihtheih loh in a awm a ni. Kuminah hian nuai 10 dah ve a ni a, hei hi chuan engmah a thawk tham dawn lo in ka hria a, mipui mamawh a phuhruk zo dawn lo in ka hria a. Hei hi dah belh leh te pawh tha in ka ring a. Phaisen balu khu anni sawi dan chuan helai phairuam pheiah chuan Phaisen balu a tha ber an ti a. Chutiang chu lak chhuah a nih theih nan khumi kalkawng, Cachar nena kan inkar khu siamthat viau a tha a. Cachar lam atang pawh in Silchar lam atangin mi tam tak Sumo-in an rawn kal tawh a. A chhan chu Silchar-a motor jam te, Sumo Shillong leh Guwahati kal ten kal pelh an duh avangin, a jam-ah kal lovin kawng nuam lam jam lo lamah an kal thin a, mipui tan a tangkai em em a. He kalkawng hi tha taka siam hi a chakawm em em a ni tih ka'n tarlang duh a ni.

Ka bial chhungah khuan Thinglian leh Saihapui V, khaw te tak te ve ve, Saihapui V chu in 50 a ni a, Thinglian pawh in 60 vel bawr a ni ang. Thinglian chu Bru hlang awmna a ni a. Khumi kalkawng khu fur-ah kan tlawh hleitheih ngai lo va. Saihapui V hi Vairengte atangin ke chuan a kal theih a, hetah Phainuam atangin, 1km khat vel ang a ni ang a, chutiang chu darkar chanve tih ang vel te kan tlan thin a. Chutiang chuan tlawh hleihtheih loh a ni a. PMGSY hmangin a khua khu a te si a, kalkawng a laih theih si lo va. PWD hian plan lam atangin hemi budget atang hian a siam dan tur min ngaiantuah sak thei sela a lawmawm ngawt in ka ring a, chu chu ka han tarlang a ni.

Bilkhawthlir leh Saiphai inkar khu 17 kms a ni a, pot-hole siamna tur atan hian nuai 5 chauh dah a ni a. Hei hi chuan hna an thawk tak tak lovin ka ring a. Pot-hole siamna tur khu tuna a awmdanah chuan nuai 50 pawhin an daih ka ring lo va, nuai 5 chauh hi dah a ni a. Hei hi dah belh theih dan kawng te chu awm se ka duh hle mai. Khulai kalkawng khu 2009/10 vel khan PWD-in metal hna an thawk a. Mahse a chhe leh vek tawh a, a pan a. An siam lai tak khan vil nachang ka lo hre lo va, pawi ka ti angreng khawp mai a. Hmun thenkhat a pan lutuk a; tin, thenkhat chu lei nem chunga metal siam te a nih avangin kal a harsa tawh hle a ni tih ka han tarlang duh a ni.

Chutih rual chuan lei chi hrang hrang a awm a, lei siam ngai Chemlui te, Cheppui te, Chepte te, Serlui te, thing leihlawn vek ala ni a, a manganthlak

viau a ni. Kan tang ang tih khu a hlauhawm viau a, chhete te in thingin an repair thin a, tunah te pawh repair hna a kal mek dawn niin ka hria a. Khu khu kum tin 2010 atang khan PWD te ka'n zawt thin a, ‘project kan siam, sanction kan dil,’ an ti a. Hei kum 8 lai a ni tawh a, sanction hmu lo zingah a tel ziah hi ngaihpawimawh zingah a tel lo a ni mai awm mang e aw tiin ka ngaihtuah deuhhlek a. Ngaihpawimawh zingah (priority) hian min dah sak theih chuan ka lawm ngawt ang.

Thil dang ka sawi leh duh chu tun dinhmunah hian Mizoram PMGSY kalkawng hrang hrang laih tawh metal-na tur te, a thar laihna tur te, PWD PMGSY Cell-in group 109 vel lai tender tunah hian an call mek a, lawmawm ka ti tak zet zet a ni. Hmun dangah chuan nichina a tira ka sawi ang khan kalkawng tha lo, a siamna tur awm bawk si lo tih kha kan ngaihthlak thin kha a ni a, kalkawng 109 zet mai cheng nuai 100 chung veka thawh tur, a then chu 300/400/500/800/900-1000 tlengin tender amount a ni a. Chutiang thawh tur chu department-in an thahnemngaihna azarah hna an han thawk a, sum leh pai an han pawt chhuak a, Mizoram kawng siam thatna tur an han buatsaih thei hi lawmawm ka ti tak zet zet a, Chief Minister a enkawltu leh department te chungah pawh lawmthu ka sawi a ni.

PWD-in DPR an siam zingah PMGSY-ah bawk khan North Chawnpui leh Builum te tan siam ve a ni tih ka hria a lawmawm ka ti tak zet zet a. North Chawnpui chu Bilkhawthlir atanga Saiphai inkar ami a ni a, tuna Chepte, Cheppui lei kan tih vel ho awmna kalkawng phei in a va fin a kha a ni a. Hemi kha a pot-hole siamna tur in nuai 5 chauh a awm tih kan sawi rual khan DPR tunah hian an siam mek a ni tih kan hriat avangin an chungah lawmthu ka sawi a ni. Builum hi khua atangin hetah New Builum-ah sawn tawh an ni a, Builum khua (a khawhlun kha) chu tui in a chim vek tawh a, mahse khulaia Serlui Hydel Project-in a chim hmabakah khan in engemawzat a awm a ni. Chumi tlawh tur chuan a mawng ah Bilkhawthlir lam atanga kal a, lawnga kal chhoh a ngai a. Tun hma khan Bawktlang leh Builum inkarah khuan motor kawng a awm thin a, enkawl a ni tawh bawk si lo a, khulaiah khuan kan kal thei tawh lo a, kalkawng a hla angreng phian a. Mahse hetah hian DPR siam a

ni tih ka hria a, lawmawm ka ti tak zet zet a, hlawhtling taka in laih ka beisei tak zet zet a ni.

Demand no. 36-na Environment, Forests & Climate Change a lo ni a. Kumin hi ruahtui tlak dan a danglam a, lo hal theilo mi tam tak an awm a, Sorkar pawhin ni 31 thleng lo halna hun kha a han siam belh a. Mahse kar hmasa Zirtawp tih velah te khan ruah a la sur a, chuti chungin ni sa tak tak a la awm lo bawk a. Ni 31 naktuk hi a hal hun tawp kha a ni a, chance kan inpek that leh hi a tul riau in ka hria a ni. Sawhthing chinna tur hi ka'n nu ten tin 6 hmun vel Mutthi ramah sawn an vat ve a, niminah ka va hal tir a, naktuk kha a hal hun tawp a ni mai si a, a kang mumal lo an ti a. Tanhril ramah khuan huan kan nei a, a mawng lamah engemaw hnephawl siamna tur tin 2 hmun vel kan vat bawk a, chu chu i zuk hal teh ang kan ti a, dar 6:30 khan kan tlan thla a. Darkar chanve zet kan dep thin a khawnvartui nen, a kang thei thlawt lova. Chutiang chuan kei chuan ni 31 thlen hma ngei khan hal ka tum a, a kang thei ngang lo a ni. Chutiang chu thingtlanga kan loneitute lo hal hun atana hun kan siam sak kha a ni a. Kan ngaihtuahpui that leh hi a tul hle in ka hria a, chu chu ka han tarlang a ni.

Tin, mau chungchangah hian ka sawi duh chu mautuai kan khawrh hian mau hmun hi a chereu tehchiam lo tih hi ka sawi duh a ni. Mau chang tha, hung tha a lo awm tawh chuan mautuai lo chawr chho hi a puitling thei lo, a puitling chu tlem tlem chauh a ni. Engtin emaw han thawl tlem hi chuan mau hung chi te leh mau tak te pawh ni se, a hung neilo chi te pawh ni se, han lak thawl chuan a thawl tawh hnu ah khan mautuai kha a rawn puitling thei thin a ni tih hi kan hriat tlan a tha in ka hria. Forest lam pawhin chu chu in hre tho in ka ring a, mautuai khawrh khap ringawt hi a tul tehchiam lo a ni tih ka sawi duh a ni.

Power & Electricity Department-a ka rawn tarlan duh chu Thingthelh khua ah khian field te tak te an nei ve a. Sport Council lam atangin kan Minister zahawm takin cheng nuai 5 hmangin a laih zauna tur sum min pe a, sorkar term hmasa ah khan kan lai zau a, zau tha takin a awm a ni. A lai ah electric ban a awm a, chu chu min sawn sak teh u kan ti a, an sawn hleithei lo

a, pawisa an nei lo te pawh a ni mai thei a. Department hotu lu lam atangin hei hi chu tih sak dan kawng zawn ni se a tha ngawtin ka hria. Field laia electric ban ding luah mai chu a buaithlak deuhhlek a, chu chu Chief Minister zahawm tak pawhin min hriat sak sela ka'n ti a ni.

Soil & Water Conservation Department-ah hian ka tarlan duh pakhat chu Phaisen bulah khuan Dumkhallui a awm a. Phaisen khuain kum 50-na an lawm tumin kan Chief Minister zahawm tak hian Dumkhallui chu a zuk hmu a, a lui dung kam vel kha leilet deuh vek a ni a. Leimin, lui-a tuihawk luangin leilet a lak hek nasat deuh mai kha a zuk hmu a, 'hei hi project siam ni sela, central-a kan hotute hnenah ka lo sawi sak dawn nia' a ti a. Department hotute hnenah ka hrilh a, kan pu pawhin lehkha min ziah sak a. Mahse, an project siam kha anmahnii an kalpui deuh nge ni tun thlengin ala hlawtling lo a. Khumi khu a awm reng chuan leilet khu tam tak a hek dawnin ka hria a. Chuvangin kan leilet te a lo zim lohna turin he project hi department-in siam leh sela, tharthawh tha leh sela. A nih loh leh NEDP lam atang te pawh khan sum te pawh dah ve ni ta sela, chutichuan kan leilet te kan hum thei in ka ring.

Chutichuan Pu Deputy Speaker, khangte te te kha sawi tul tawkah ngai ta ila, ka hun a tawp ta bawk a. Kan Chief Minister demand te hi ka rawn thlawp a ni tih ka rawn sawi a ni e.

DEPUTY SPEAKER : Pu R.L. Pianmawia a phar hmasa a, kan sawm ang a, a dawtah Pu Lalrobiaka.

Pu R. L. PIANMAWIA : Pu Deputy Speaker, hun min pek avangin lawmthu ka sawi e. Demand no. 45-na PWD-ah a hmasa in kan senior MLA in a rawn tel theih loh avangin min chah a, a bialtu pa in a sawi mai bawk si lo a, min chah angin ka'n sawi ang a. 'Vaivakawn atanga Pu J. H. Rothuama te in pan chhohna khu a phut rei tawh khawp mai a, Aizawl khawpui atan chuan hmun dang a dum tle hluau tawh mai si a, tih dum ran ve atan min han sawi sak teh', a ti a, kan senior-in min chah angin chu chu ka'n sawi sak ve a ni.

PWD hian NASA takin hma min laksak a, keini bial tan phei chuan dem phalna tur hi a awm lo hrim hrim mai a. Bial harsa leh tu te pawhin an kal chak lohna leh an awm chak lohna, hna an thawh chak lohna bial a ni chungin NASA takin hma min lak

sak a, an chungah lawm thu ka sawi a. Nidanga kan la neih ngai loh New Vervek atanga Vairengte National Highway kan han nei a, kan lawm em em mai a. Hei hi a tangkai dan tur keini mimawl mai pawhin kan han chhut hian a hlu kan ti a, hmasawnna nasa tak min thlentu tur a ni tih kan hria a, kan lawm a. Amaherawhchu a nih tur ang rin aiin a lang har em em mai a, Highway Ministry-in a feasibility study leh DPR siam tur consultant an hmu zo lo ringawt mai a, chumi avang chuan kan han muangchang phawt a. Tunah state PWD kutah mawhphurhna an rawn nghat niin a lang a, chuvangin a rang lama hma la thuai thuai turin ka ngen duh a. Kan nghahhleh thu hi he House kaltlang hian kan hrilh a ni.

Tin, hmalak tharna tur tam tak bial **chhung** ah a awm a, tuna tender mek Vaitin kawng te, Serzawl kawng te, Palsang kawng te hi alcatra luan tura tender a ni a. Tih danglam theih a nih chuan House Leader hian min ngaihtuah sakin alcatra-a tilo in cement-a ti turin ka ngen duh a, alcatra-a tih hi a that rual rualin nakin hnu zelah a repair-na thil ah pawh cement a nih chuan mimawl pawhin kan ti thei dawn niin kan hria a, remchang a nih chuan min hriat sak se ka duh a.

Tin, tun hmaa kan lo sawi tawh thin Tuivai leihlawn hi hmalakna thar engmah hmuh tur a awm ta lo mai a, hei hi kan thenawm state te nen kan inkal pawhna a ni a. Tun hmaa Delhi-a kan zu thli thlai ve tum te pawh khan ti mai turah kan ngai a, mahse tun thleng hian thawm a awm ta lo a. Heng te pawh hi kawng dap leh dan awm thei se ka'n ngen duh a. Tin, East Phaileng to Zuangtui inkal pawhna tur kha kan zawh mek lai aiin kilometer 30 in kal lamah a tawi zawk a, haw lam nen chuan km 60-a tawi tur a nih avangin rilru ah a awm reng a, compensation te pawh engemawzat pek an ni tawh a, hetia hlui hlawn mai hi central lamah a harsat pawhin NEDP atang tala hmabak hi min tih tlang sak turin ka'n ngen duh bawk a.

Tin, chhim leh hmar, chhak leh thlang ngaihtuah phak leader kan neih avangin hun hmasa lamah New Vervek atanga Mimbung lam kal pawhna tur pawh ruahman tur a nih thu min hrilh tawh a, hetiang hma thar lakna hi keini ang chuan kan hmu pha miah lo mai a. Hengte pawh hi engnge kan thlen chin ni reng? Chhak leh thlang, chhim leh hmar te inkal pawhna tur kawng pawimawh tak a ni si a. Tin, ram venhimna kawngah pawh thil pawimawh tak a ni ang tih ka ring a, chu chu ka'n tarlang tel duh bawk a. Heng te hi ngaihtuahna ah min lo hman zui sak bawk se ka duh a.

Demand no. 47 Minor Irrigation hi kut hnathawka eizawng tute tanpuitu ah chuan thawhhlawk ber pawl department an niin ka hria a, chuvangin ka bial ah KANI phai en turin kan ti ngar ngar a, amaherawhchu thlamuang taka thil tih theih ni dawn lo a an hriat avangin a tih theih loh a, chuti chunga ruahmanna min neih sak tawh New Vervek ram Khawmawi-ah project min ruahman sak niin ka hria a, a tak ram han chang thei se tih ka'n sawi a ni.

Demand no. 15 GAD-ah (Dy Speaker : Chair kan han in thlak lawk ang e) (Pu NIHAR KANTI CHAKMA at the Chair) khan SHDC nei bial kan ni a, anni hi tangkai zawka area chhung ami ten an hman theihna turin min ngaiantuhsak deuh hlek tha in ka hria a, sum leh pai pawh hemi atan hian a harsa viau in a hriat a, chuvangin sum tam zawka thuam a tih chak a, bial chhung mite tan pawh tangkai zawk tura hma la thei turin min han enzui sak leh bawk se tih ka'n sawi duh a.

Tin, demand no. 33 Soil & Water Conservation Department hi session hmasa lamah khan ka sawi thin a, financial year khat chhungin coffee kg 5 kan bial chhung tana thawh tura kan neih ve thin kha a ni a, a khawharthlak em em tih kan hria a, kan sawi a. Amaherawhchu Pu Lalrinmawia Ralte Minister a nih khan duhsak takin Ruangva project min rawn tih sak a, chumi avang chuan kan lawm hle a, hetianga hma la thei coffee kg 5 mai bak pawh han thawk thei department an lo ni tih kan han hriat chhuah hian ka'n zir chiang deuh a, chhawr tangkai zel an chakawm mang e aw ka ti a. Amaherawhchu tunah hi chuan a lan dan ah department hi phum bo tur ang mai hian hniam lam hi an pan tial tial emaw ni le tih zawng te pawhin a thlir theih in ka hria a. Allocation of Business 2014-ah hi chuan chi 9 lai mai a in ziak ve a, soil conservation tih te, hill-side terracing, plantation for soil conservation, coffee and rubber plantation, utilization of terrace, land for other purposes, contour bunding soil erosion control works, stream bank erosion control, fully control measures water extension dam water harvesting tih te. Heng ah hian tuna an tih ve chhun awm han chhut hian a theuneu riauin ka hria a. Pathumna plantation for soil conservation, coffee and rubber plantation tih chauh hi niin a lang mai a, chuvangin a dang an tih tur awm reng leh an hming pawhin a zu kawh deuh raih soil conservation hna thawk tur hian tun dinnhmun ai hian tih len a, a engineer-te pawh hi ka hriat dan chuan direct-a lak hna thawk thei tak tak tur chu pakhat

chauh an nei niin a hriat a. Department senior ve tak tawh si hetianga hman tangkai theih viau ni bawk, CSS pawh chhuak tura central sorkar-te pawh-in agency an rin ve ni bawk si tun ang lo deuh hian ngaihtuahna thar nen thlir pui deuh a tha in ka hria. Chuvangin an dinhmun hi House Leader hian tuna a enkawl mek lai a ni bawk a, han chhui thuk deuh sela. Tanpuina step khat tal tuna an kalna turah hian han chheh sak leh sela tih ka ngen duh a.

Demand no.1 Legislative Assembly-ah hian sawi ka duh chu Assembly-in Legislators Home kan nei a, kan luah a, chumi luah tute Pu Nihar Kanti Chakma te, Dr.K.Bechhuah te nen kan pathuma mamawh nia kan hriat a chu CC TV hi min dah sak ve a tul kan ti hle a ni. A chhan chu ruk ruk thil ah harsatna kan tawk zeuh zeuh tawh a. CCTV awm se kan hmuh chhuah theih loh te pawh hi kan hmu chhuak fo in kan ring a.

Labour and Employment and Industrial Training hi an tangkai hle a. Term hmasa ah khan ka bial khaw 4 khaw 5 velah anmahni lo kalin employment registration min rawn tihsak a, a tangkai khawp mai a, remchang leh hmasa ah chuan ka bial khaw hrang hrang ah employment registration min rawn tihsak leh turin ka'n ngen duh bawk a ni.

Demand no. 39-na Power and Electricity Department-ah hian lawmthu sawina tur tam tak kan nei a. Tunhmaa harsa em em thin kha tun hnu ah chuan eng (power) lamah phunchiar lo bial kan nih ka ring tawh a, tun aia tih hmasawnna tur kawng erawh chu kawng tam tak a la awm a. Kan Sub-Station enthat tur chungchang ah te khian duhthusamin thil a la kal lova, Sakawrdai Sub-Station leh Darlawn Sub-Station te hi uluk zawka enfiah a, hmanraw hlui eng eng emaw thlak kual tur pawh an han ti bawk thin tak na a, a la famkim thei lova.

Hmanniah pawh Sub-Station an han khawih velna ah PHE tui pump-na lampang khawl ami tam tak a tichhe mai a, a chei thatna lamah hian hmabak tam tak a la awm a ni tih a ticiang in ka hria a. Chuvangin heng te pawh hi hmanraw thara thuam that ni thei se tih kha ka'n sawi duh bawk a.

Tin, Co-operation lamah hian ka'n sawi duh chu building te leh loan te a tul angin cooperative society te hnenah pek a ni thin a. Hei hi a tangkai tur ang hian kan la hmang tangkai lo hle in ka hria a. Chuvangin a kaihruaina lamah Co-operation Department te pawh hian tun ai hian hma la lak pui deuh sela, la vil pui deuh hlek sela.

Tangkai mang lova building sak te chhawr tangkai dan tur ang taka la chhawr tangkai loh te hi kan sum sen nen han ngaihtuah chuan a pawin ka hria, a uihawm a. Tin, kan sum pek te pawh tangkai zawka an hman theihna turin tun aia vil ngun deuh ni se a tha in ka hria a. Chung chu ka ngaih pawimawh te ni sela. Pu Chairman, kan House Leader demand kan han sawi tak te kha a vaiin ka support a ni, ka lawm e.

Pu LALROBIAKA : Pu Chairman, kan House Leader demand sawina hun tha tak min pek avangin i chungah lawmthu ka sawi a. A tam si a, kan sawi seng dawn lova, department thenkhat te chu kan rilruah awm tho bawk mahse kan sawi seng dawn lo a ni tih kha keini ang speed thalo tan chuan a chiangin ka hria. A hmasa berin Legislative Assembly chungchangah hian sawi tur tam tak a awmin ka hria a. Kum 2008 atangin kan hotute, mipuite leh Pathian zarah hetilai ah hian kan han thu ve a.

Assembly Secretariat staff-te an efficient zia a hrechiangtu ber pawl niin kan inhria a, helaiah hian sawi tur ka neih chu, he House-ah ngei hian an chungah lawmthu ka sawi duh a. Chutihrual chuan an harsatna tawh te, an buai zia te leh an hna a buaithlak zia te kan hriat pui a, Entirnan session kan han nei dawn a, department thenkhat chuan bill an nei dawn tih an hrilh a Pu Chairman, mahse an thehlut leh lawk si lova, programme siam a harsa em em a ni. Chutiang te chu department tam tak ah hian a awm a ni. Tin, Question and Answer, zawhna chungchangah te pawh hian an tisual lo zawk ngawtin ka hria, tam tak a lo lut a. Heng kawngah te pawh hian department thenkhat te chuan chhanna mawi em em lo te pawha inchhang ta zel te pawh hi kan awm a. Hengah hian lehlamah chuan a changtu te pawh hi kan intimualpho a ni tih te pawh hi kan hriat a tha in ka hria.

Tin, Subject Committee-te, Financial Committee-te leh House Committee chi hrang hrang ah te anni hian nasa takin first timer a ni emaw, a tute pawh Committee-a awm min deal thiam em em a, lawmawm ka ti a. Chutihrual chuan entirnan, Subject Committee, PAC chuan thil engemaw an han chhui ta a, chungah chuan anni kan Secretariat te kan kutke an ni lo thei lova. Keini chuan direct-a tih kha kan dan pawh a nih loh avangin ti tura an tih lai khan thenkhat department-a lo in la senior deuh ten (han ti khanglang ila, a mawilo lam nilo sela) correspondent chungchangah te pawh harsatna siam changte pawh hi a awm a ni. Chung avanga Committee pawh in ‘zilh deuh an ngai a

nih hi a', han tih chang te pawh hi department thenkhat te chu an awm a ni. Khang kha he House-ah hian kan sawi chhuah duhna chu awm tawhlo sela kan duh a ni.

Chutihrual chuan heng zawng zawng hi kan ram tan a ni tih hriain tute pawhin a nihna ang, a system anga kal thiam turin department pawh he hunah hian kan request ngawih ngawih a ni tih ka'n sawi duh a. Heng zawng zawng avang hian kan ram a lo changkang dawn a. Tin, kan sawi ang khan Financial Committee kan tih bikah te phei chuan entirnan Lawngtlai Water Supply Scheme te kan han en ta a, chungah chuan department te an fel viau rualin sorkar-in kan tih ve tur lam te tih si loh; tin, kan contractor lam ten kan tih loh tur lam te min thing let leh si ang te kha a awm fo thin a ni. Chungah chuan fimkhur taka kan kal a pawimawh a ni tih ka'n sawi hmasa duh a.

Tin, Labour and Employment and Industrial Training, demand no 28-na ah hian kan sorkar chak takin duhsak takin West Phaileng-ah ITI building min sak sak a. Sorkar chungah a bialtu nihna angin lawmthu ka sawi duh a, tunah hian an zo tep tawh a. Chungte chu a rang thei angin kan Minister chak tak leh rem hre tak hian kan mamawh ziate hriain hma min rawn lak chhunzawm sak vat thei sela tih hi bial mipui in kan sawi duh a ni tih ka'n sawi leh a ni.

Demand no. 33, 36 leh 47 te hi a rual deuha sawi duh nachhan ka nei a, rual thei a ni lo nain. Ka'n sawi lan duh chu Agriculture la tel hram ta ang ni sela. Heng hi Department pawimawh tak, khawvel in a ngaihpawimawh em em ecological balance, global warming kan tih atana pawimawh em em an ni a. Chung avang chuan hengte hi tang khawm thiam ta se, an hmalaknaah te pawh inbukthuah ang chi kha awmlo thei ta se, (a awm e tihna ni lovin) a zau thei ang te, tha thei zawk angte pawhin hma la tlang thei ta ila a va tha dawn em tih lai kha ka'n sawi duh a. Entirnan Soil-in khawi zauah emaw hma an lo la a, chutih rual chuan Agriculture-in hma an lo la ve bawk si a. Khangah khan pawisa tam tak a lo awmlo bawk thin nen, harsatna tawh chang deuh leh engemaw inbukthuah vel te pawh a awm thei a. Chung ang chi te pawh chu zau zawk leh tha zawk leh fun kim zawka hna kan thawh theihna tur atana thawk tlang turin department ho hi in co-ordinate tha lehzual se ava duhawm awm em ka'n ti a.

Tin, kan sawi angin heng Department-te avang hian NLUP kan tih ah te pawh khan UNO te pawh an lo tel phah a ni tih kan hria a. Kan ram kal zelna turin

NLUP te pawh a pawimawh a. Chumi atana hmalatute chu heng department te hi an nih miau avangin hengte hi kan sawi langlo theilo a ni.

A biktakin Forest Department-ah hian keini bial bik Dampa bialah Tiger Reserve te kan nei a, khungte khu a chhuanawm khawp mai a. Amaherawhchu ka sawifo angin hnathawktu lak chungchangah te, mipui control chungchangah te kan field staff te an that em em rualin hei aia tha zawk hian tun anga staff nei reng chung pawh hian kan awm thei a ni tih hi a hmutute zing ami niin ka in hria. Chutih rual erawh chuan inngaihnathiamna thui tak an neih te pawh hi a ngai telin ka hria a. Entirnan Phuldungsei khuaah chuan kawng lehlam kha Tiger Reserve a ni mai a, engemaw thulhah pawh khua ami ten harsatna leh engemaw pawh a awm thei a. Naupangin ball an pet liam ringawtah pawh khan Tiger Reserve-ah khan luh loh thei lohna chen te pawh a awm thei a ni. Chutiangte chu kan dinhmun a nih avangin hengah hian Forest staff te pawhin hriathiamna thui tak nei chunga he Tiger Reserve hi a lo hlawhtlin ngei theihna tur leh India ram mai ni lo Asia ramah te, khawvel ramah te pawh Tiger Reserve tha tak a lo nih ngei theih nan hna thawk zel turin ka chah duh bawk a ni.

Minor Irrigation-ah hian keini bial bik han sawi leh ta ila, Saithah zauah khuan hna nasa tak min rawn thawh sak tawh thin a. Amaherawhchu (Chairman : “Warning”) duhthusamin kan la ti thei lova, a pawi ka ti a, nasa zawka min rawn thawhsak turin kan duh a. Tin Soil & Water Conservation hi a pawimawh khawp mai a. Ram zau zawkah te chuan state leh central-ah te pawh an chhawr tangkai em em a, Soil a that loh chuan Agriculture a hlawtling thei lova. Tin, tlangram te kan nih avangin lei chunglang tha te a lo luangral a, chuvangin anni hi an pawimawh em em a ni. Tin, erosion hrim hrim, tuiin ram a lak chungchang ah te pawh hian anni hi an pawimawh hle a ni.

Tuna NLUP-a hma kan lakna chungchangah pawh hian department te an nih rualin a hlawtling ber pawl a niin ka hria. Broom/ hmunphiah chungchangah pawh tunah hian nuai tam tak an thar chhuak tawh, an hrallh chhuak tawh a ni. Zau zawka hman tangkai theih ni sela ava duhawm em ka’n ti a. Tin, an tihtur tam tak ti lovin kan chan theih si, mahse kan tih loh avanga chan tak loh te tam tak a awm a ni.

Rubber plantation chungchangah anni hian hma la in nasa takin hlawhtlinna kan hmu chho mek a ni a. Tin sawi loh thei loh PWD-ah hian kan bial bikah

Aizawl, Reiek, West Lungdar 37km tunah hian Central Road Fund atangin kan sorkarin min rawn tihsak a, tunah hian a zo khat tawh a, a nuam tawh khawp mai. Weekend-ah te pawh han kal teh u, in tlan zur zur ang a, nuam takin tourist cottage te pawh in thleng thei tawh dawn a ni tih ka'n assure che u a ni.

Pu Chairman, tunah Tlawng leihlawn te pawh siamthat tura ruahman mek a ni a, heng atan hian crore 7 chuang zet sorkar-in min lo ruahman sak a. Chutih rual chuan strengthening and rehabilitation of West Phaileng to Marapara te pawh zawh a ni tawh a. Amaherawhchu helai kawng hi border area development atan leh border fencing atan hman a nih avangin a rim em em a, tunah hian chei that leh a ngai tan tawh a, hei hi department-in min lo hriatsak se ka duh a.

Power-ah hian tawite in Pu Chairman, kan sorkar chak takin RGGVY (tunah chuan DDUGJY an ti tawh a ni awm e) hnuaiah khaw tam tak min tih en sak a, chutih rual chuan a hmaa awm bak MR emaw, lineman emaw min pek belh si lova, kan buai em em a ni. En belh e ti lo chuan kan buaina a tam belhchhah angreng khawp mai a. A thim hlek chuan Aizawl-ah pawh a thim tho han ti ila an ngaithiam lova. Chuvangin Power bikah hian a sang te chu kan sawi phak lovah ngai ta ila, MR tal hi hei aia tam deuh hi dah belh thei ta ila kan va changkang sawt dawn em tih kan sawi duh a ni. Vawiinah hian kan House Leader demand te hi ka rawn support a ni e. Ka lawm e.

CHAIRMAN : Dr. K. Beichhua.

Dr.K.BEICHHUA : Pu Chairman, ka lawm e. Demand ka han sawi zung zung mai ang a. A hmasa berin General Administrative Department han sawi ta ila. Kan Chief Minister zahawm tak chungah lawmthu ka sawi a. Latawh tlang airport atana kan ngenna tlawn tak min ngaihpawimah sak a, aerial survey kan va nei a, ground survey kan hotute nen kan zuk nei leh bawk a. Kan engineer-te, Latawh bialtu MDC-te, kan Additional DC-te leh doctor rualte nen free clinic kan zuk nei a. A khawnawtin ruai te an siam a, kan lawm em em a ni. Engineer-ten karkhat an va riah chilh a, an survey report chu tunah kan rawn thehlut ta a. (Chairman : Chair kan han inthlak ang e) A runway tur hi 3 kms chuang a sei leh (Dy. Speaker : Chair kan inthlak) a zau lam pawh 300ft a ni a. Chumi suvey report chu kan lo thehlut tawh a. Tunah hian DPR min siamsak mek a, central lamah hma min laksak dawn tih kan hriat avangin a chungah kan lawm takzet a ni. Lawmthu ka sawi e. A district ang pawhin kan lawm a. Saiha district chauh pawh nilovin

Lawngtlai district pawh an lawm a, chhim lam kan lawm a ni. Nakin zela kan tu leh fate leh Act East Policy kan lo hmuah vena tur thil ropui tak niin kan hria. Chuvangin kan Chief Minister chungah lawmthu ka sawi a ni.

Demand no.27-na District Council & Minority Affairs. Pu Deputy Speaker, kan hriat angin District Council 3 kan nei a, Autonomous body ke pathum nei a ding, chutah sixth schedule hnuaia awm kan ni tih kan hre theuh a. Chumi enkawl tur chuan helaiah District Council & Minority Affairs Department kan nei bawk a. Tuna kan dinhmun, kan kal dan saw ngaihthatawm a ni em aw tih rilruah a awm thin! Kan administration kalpui dan te, kan financial management-te saw tun aia strict deuh hleka District Council Affairs lamin min enpui loh chuan kan than dan saw a hlauhthawnawm deuh ti tihin ka hria a ni. A chhan chu tuna kan dinhmunah, a bik takin mahni mawng hlimte pawh kan ang ang a, mahse kan thatna tur chuan kan sawi mai te pawh a tul si a. A bik takin MADC-ah phei saw chuan kan district council dangte saw enge an dinhmun ka hre chiang chiah lova. Kan normal fund atanga hlawha 92% kan hman ringawt te pawh saw a tha lo viauin ka hria a. Chutah office expenditure-te, vehicle- maintenance leh TA/DA etc. nen phei chuan han chhut ta ila mipui sown chan tur kan neilo a ni, Pu Deputy Speaker. Chuvang chuan, sawlai saw kan DCA changtu Minister chak tak hian theihtawp min chhuah sak hi a tul takzeten ka hria a ni.

Chumi piahlamah CSS atanga sum kan hmuh ang te te, sawlaia development hna ang te te pawh hi mipui lam chan hi a awm lova. Kan hotute sown ‘A, hei hi chu kan chan tur a ni e’ ti ang hrim sown an mahniin an insem vek a, chu chu tuna kan kaldan saw chu a ni. Chuvangin a pawimawh bera ka hriat chu reformation a ngaiin ka hria a ni. Fate kan hmangaihte chu an thatna tur a nih chuan kan zilhhau thin ang hian sawlai saw min watch deuh hlek a, reformation min siamsak a tul hle dawn in ka hria a ni, Pu Deputy Speaker.

Demand no.36 Environment, Forests & Climate Change Department. India ramah chuan kan ram ang hi a tam lo tih kan hria a, kan climate a tha a, ramngaw kan nei tha a. Pollution han ti dawn ila, air pollution kan nei lova. Kan pollution neih awmchhun chu zan lama proton bike ring zet zeta tlan noise pollution bak hi kan nei lutuk lo a ni. Chuvangin kan hmalak chhoh zel turah hian, a bik takin Forest lam hmalak dan hi ka ngaihtuah thin a. Kumtina pawisa tam taka thing kan phun ai hi chuan tuna kan thing

awmsa te hi kan sum neih ang ang hian theihtawpin venhim dan ngaihtuah ta ila. Chutichuan kan ram hi forest tha tak kan neih piah lamah boruak tha tak min siam belh sak ang. Chu chuan tourist attraction atan pawh hian hma min ti sawn viau lo maw tih hi ngaihtuahna ka nei thin a ni. Tuna hma kan lak chhoh zel danah pawh hian a eng kawng zawngin nge, vei zawng hian kal ila nge tha ang ding zawng hian kal ila tha ang tih te pawh hi kan inbih nawn fo hi a tha in ka hria a ni. Chutianga hma lak theih ni se a tul hlein ka hria a ni.

Tin, nichina ka rawn sawi tawh, zana ring fe fea bike tlan ho hi ka veina a rei tawh a. Damlo, heart thalo tan te phei chuan ring taka an han tlan mai te hi chu lungphuchawla thih theihna khawp thawm, jet fighter ang tluk hi a ni. Chuvangin hei hi noise pollution dik tak a nihna angin hma min laksak a, control dan hi min dap sak se tih ka rawn ngen deuh bawk.

Demand no.45-na PWD hi han sawi leh ta ila. Hetah pawh hian Pu Dy. Speaker, lawmthu sawina tur ka neiin ka hria. Opposition kan nih avanga vui reng leh lawmthu sawilo tura ngaih tur chi kan ni lova. Thil thaah hi chuan lawmthu kan sawi a, kan appreciate hi a pawimawhin ka hria. A hmasaa ka sawi duh chu Polytechnic building Siaha-ah kan sa mek a. An sa tha khawp a, kan lawm viau a ni. Chutiang chuan PWD bawkin damdawiin khum 100 awm turin an sa mek bawk a. Concern department lamte hnenah pawh lawmthu kan sawi ni se. Kan lawm viau a, Saiha District mipui kan lawm a ni.

He House-a ka rawn luh tirh khan ka thusawi kha ka la hre reng a, Pu Dy. Speaker. Kan member zahawm tak tak te hi kan damdawiinah sawn va awm ta ula, ni 4/5 in awm hnu chuan typhoid natna veiin in rawn chhuak fur ang tih kha a ni. Kan tuihal berna leh kan riltamna lai ber a niin ka hria a, Tunah chuan damdawiin te pawh tha takin engemaw chen an zo tawh a ni. Tun atanga reiloteah chuan damdawiin tha tak te pawh kan neih theih kan beisei. Hetah hian PWD, a satute leh a concern department te hnenah lawmthu ka sawi bawk a ni.

Pu Deputy Speaker, kan kalkawng chungchang hi han sawi leh ta ila. 21st Nov,2014 khan private resolution ka rawn luhpui a. Khatah khan, ‘tuna kan kawng chhe ta lutuk hi tun aia chak zawkin hmalak ni rawh se,’ tih kha ka rawn luhpui a, hnawl a ni. Khatihlai, ni 21-ah khan member tam takin resolution kha min sawipui a. Ni 21-ah kha

chuan kan kawng kha a tha vek a, ni 26-ah erawh chuan kan kawng kha a thalo leh vek a. A demand neitu hnenah khan kan kawng chhiat zia kha kan thlen leh ta a. Khami hun ngaiantuah chuan tun dinhmunah chuan hma kan sawn ve viau in ka hria. A bik takin kan bial lamah saw chuan Lunglei atanga Tuipang thleng saw black top a ni a, tlan te pawh a nuam viau tawh a, chutah chuan lawmthu ka sawi duh a. Chutih rualin Zoram hmun dangah erawh chuan ka dinna ngaiah ka la ding a. Tun aia chak zawka hma kan lak hi, (mihring chuan kan hmalam ah ke kan pen zel hi kan tih tur hrim hrim a ni ang hian) PWD lama kan hnathawktute leh a enkawltu Minister zahawm tak pawh hian tun aia chak zawk hian ke kan pen hi a tul hle a ni tih hre nawn se tih min hriatsak a pawimawhin ka hria. Sawlam kawng kan siamthat ang khian hmun dang, Mizoram hmun hrang hranga kawng kan neih ang te te hi chak zawka hma lak hi a la tulin ka hria a. Chu chu ke pen chho tur pawhin ka sawmna ni bawk se.

Demand no. 11-na Secretariat Administration. Pu Deputy Speaker, kan official-te'n thahnem an ngai a, an thawkrim viau tih kan hria a, an polite a, Secretariat-a va kal sawn dawr an nuam hle a ni. Chutih rual chuan ka rilru-a ka vei deuh chu, kan file movement muang lutuk hi chu tun aia shortcut, felfai tho si, dik deuh si, shortcut kawng hi a awm lo maw tih hi ka rilruah hian ka ngaiantuah thin. Kan file movement a chak loh chuan sorkar hmalakna hi duh angin a chak thei lo a ni. Chuvangin file movement chak theih zawk dan tur hi kan hotute hian an hre em em ang a, tun aia chak zawka file movement a kal theih nan kan Minister zahawm tak pawh hian hma min lak sak thei se tih ka rawtna a ni bawk.

Demand no. 1 Legislative Assembly, hei hi member tam takte khan kan lo sawi tawh a. Pathian leh mipuite zara MLA kum li dawn ka lo nih ve hian, Legislative Assembly pawimawhna hi ka hre chho dawn chauh in ka hria a. Kan officer-te leh kan staff-te hnathawh hi a ropui ka ti tak zet a ni. Englai mah hian awl hun hi an nei lo a ni. Chutiang chuan department hrang hrang te pawh hian an hnathawh nasat leh an taihmak zia hi kan notice sak hi a tul hle in ka hria. Committe hrang hrangah te pawh kan lo awm ve ta a. Committee in department eng eng emaw neuh neuha discussion tur emaw, evidence pek tur ang emaw, hetianga kan inkoh chang te pawh hian inhriathiamna kan neih tawn hi a tha hle in ka hria. Assembly officer-te hian MLA-te chu thil hre lutuk lo kan nihna ah min lo guide a. Heng discussion kan neih leh evidence kan han inlak te

hian, min lo feed leh kan thil hriatloh laite min lo hrilhchian te hian department official thenkhatte chuan ngaih loh lampang ah te pawh kan lo ngai mai thei ang a. Ka hriat chinah chuan direct-a Assembly official-ten department official-te question an zawh mai ang chi hi ka la hre lova. Chutiangah chuan heng kan department official-te pawh hian zawhna kan siam te leh eng eng emaw neuh neuh, evidence kan han zawhte hian chiangkuang tak leh mumal tak leh felfai tak leh uluk tak hian min lo chhang ta se. Chu chu Assembly lam tan pawh kan hmasawnna tur leh kan hahdamna tur a ni bawk ang. Department lam tan pawh thil tha tak a ni dawn tih te pawh rilruah hian a awm bawk a ni. Pu Deputy Speaker, chuvang chuan, kan Assembly hi kan efficient tha a, kan officer-te leh a thawktute hi an fakawm hle in ka hria a ni.

Pu Dy. Speaker, demand no. 33-na Soil & Water Conservation hi tawite han sawi leh ta ila. Kan ram hi kan hria a, kan dinchhuahna tur pawimawh bera ka hriat chu horticulture hi a ni lo thei lo. Horticulture-a kan hmalakna te hi Soil & Water Conservation-ah hian a innghat thui hle in ka hria a, rubber plantation kan tih ang chi te, coffee plantation kan tih ang chi te. Tuna kan district-a coffee plantation kan tih Theiva-ah sawn hmun zau deuh mai kan nei a. Saw saw ka han en a, khawchhak lam nena insundawn tawn hunah chuan sawng coffee atang sawn market tha tak kan nei dawnin ka hria. Sawng te pawh saw Act East Policy lo hmuahna tha tak a ni in ka hria. Chuvang chuan, coffee-a hma kan lakte, rubber-a hma kan lakte hi a tul tak zet in ka hria a ni.

Pu Dy. Speaker, demand no. 28-na Labour, Employment & Industrial Training Department hi tawite in han sawi ta ila. He department-in mission a neih chu - developing skill of work force, providing placement services, promoting sound industrial relations tih te a ni. Heng kan mission han en ringawt pawh hian theihpatawp kan chhuah chuan kan ram tan ro tling leh, kan ram tan thil tha tam tak kan ti thei dawn a ni tih hi ka hmuh dan a ni a. (DEPUTY SPEAKER : Minute 1 i la nei) Pu Dy. Speaker, a zo tep. Kumina kan fiscal achievement hi revenue target ah 11 lakhs kan neih laiin, revenue collection-ah 5,20,000 a ni a. Hengte erawh hi chu kan inenfiah ve leh deuh a tul in ka hria.

Pu Deputy Speaker, demand no. 47-na Minor Irrigation Department hi sawi leh ta ila. Agriculture leh Horticulture tihlawhtling tur chuan Minor Irrigation tel lo hian kan hlawhtling thei lo a ni. Kum engemaw chen kha project nei lovin kan lo awm a.

Assembly hmasa lamah te pawh khan question ka siam thin a. Chutah chuan project kan neih lohna kha kum tam fe a lo ni hman a ni. Mahse, nikum lam atangin project tha tak tak te pawh kan nei chho a, hma la chho zel turah ngai ila. Hei hian vawiina Agriculture leh Horticulture-a hma kan lakna te hi min tihhlawhtlin sak dawn a ni tih hi ka hmuh dan a ni. Hetah hian theihpatawp chhuah lehzual ila tih rawtna ka siam duh bawk.

Demand no. 39-na, Pu Dy. Speaker, Power & Electricity Department hi sawi thui lo ta ila, hun a awm tawh lo bawk a. Tunhma atanga ka rilrua ka lo neih chu, engatinge Mizoramah hian lui te hi kan khuah kan khuah? Chhimtuipui hi khuap tawp mai ila a fuh ber mai lo maw tih hi rilruah ka lo nei thin a. Tunah pawh hian chu chu ka dinna a la ni. Tuna Multi Modal Project kan neih phei khi chuan khilai tui khuah tur te pawh khi sorkar hian chak zawkin hma la ta se. Chu chuan power ah pawh hnianghnar tak leh, tu party pawhin manifesto-a kan neih thin hi a hlawhtlinna tur chu a ni berin ka hria. Chumi tur chuan a changtu Minister zahawm tak pawh hi tun aia chak zawka hma la turin ka ngen duh bawk a ni.

Pu Deputy Speaker, kan demand-te hi ka support e. Ka lawm e.

DEPUTY SPEAKER : Pahnih phar lawk an awm a. Pu TT. Zothansanga leh Pu R. Vanlalvena. Pu TT. Zothansanga a phar hmasa a, kan sawm hmasa ang.

Pu TT. ZOTHANSANGA : Pu Dy. Speaker, a hmasa in kan Home Minister khan a react-na kha min rawn pe vek mai a, lawmawm ka ti khawp mai. Kan Opposition Group leader-in ‘Parliament-ah te pawh an ti thin e,’ a tih kha a ni a, a changkang khawpin ka hria. A hmasa in kan Home Minister hnenah lawmthu ka han sawi a ni.

Pu Dy. Speaker, demand no.45-na hi ka han sawi hmasa ang a. Seling leh Champhai chungchang ka sawi duh a, National Highway No.6-na atan March 2014 khan puau a ni a. Chu chu 2015-ah state PWD kutah Ministry of Road, Transport & Highway- in a rawn hlan a, min rawn pe a ni.

Amaherawhchu BRO (pioneer i ti mai ang kan hriatthiam dan tur in.) kan pioneer unau ten min hlan mai duh lo a, chutih chhung chuan kawng khi a chhe angreng hle mai a, enkawl a ngai bawk si a, buaithlak deuh dinhmunah kan awm a. Laklawh deuha kan awm lai khan kan PWD ten, “hetiang reng chuan a fello ang, min hlan hun huna kan siam theih nan estimate anticipate in i siam tawp mai ang,” an ti a. Chutiang chuan an han siam a, tunah khian Seling – Keifang, Kawlkulh – Khawzawl te siam mek a

ni chho a, Seling – Keifang chu zia hman turah kan ngai a, Kawlkulh leh Khawzawl erawh chu an ti dum hman dawn lo niin ka hria. Khilai kawng kan siam that harna chhan hi BRO-in kan PWD kuta an hlan har vang a ni. Chutihrualin Kawlkulh– Khawzawl leh Khawzawl – Champhai sanction an dil mek a ni tih kha ka'n sawi duh a.

Nichinah member zahawm tak Pu Sangthuama khan “kawngah in hlawhtling lo, in fail der a ni” a tih khan keini lamah chuan BRO leh PWD an inhlan mai loh vang te pawh kha a ni tel a. Tin, ‘Tuirial chhakah, Seling chhak ah chuan kal hial ka duh a ni” te a ti a, khalai karah kan PWD ten thahnem an lo ngaihna vanga min pek lawk, kan kuta awm hma si a an lo ruahmanna avanga khatiang an lo siamna kha a ni a. Kha kha an ti tha hle zawk a ni tih ka sawi duh a ni. Tin, Pu Beichhua khan kawngchhia resolution min hnawl sak a tih a kha, kan siam tha dawn a, kan rel uaih uaih laia lo hnawl phet tum kha chu a dik bik chiah lo a ni. Tunah a tha a kan hmu a, Saiha te phei chu hmannah kan va kal a Rulngan pa ang deuh zar hi a ni deuh vek tawh mai a ni.

Pu Deputy Speaker, tuna kan sawi kha naktuk 31st March, 2017 hian BRO-in kan sorkar kutah min hlan chauh dawn a ni. Chutia min hlan hma hma chuan zam tha takin kan PWD te khan nasa takin an lo han thawk tawh zawk a ni tih member te min hriatpui ka duh a. Tin, Seling – Champhai hi double lane tur a ni a, Ministry of Road Transport & Highway-in tunah hian a hmunah an endik a, DPR te pawh an siam vek tawh a. Amaherawhchu a DPR siamtute hi Mizoram mi an ni lo a, kan House Leader-in a sawi fo angin Mizoram leilung hre em em lo te pawh an ni maithei, khang ho siam ang ang han pawm mai kha kan PWD lam te pawhin an lo ti mai bik lo a, a ram awmdan te hre vek in uluk deuhin an en ve ang a, annin an remtih hnuah an thawn ang a, chumi zawahah Ministry of Road Transport & Highway-in alo pawmpui tawh hnu ah chuan land acquisition te kan tan leh ang a, chutah chuan hna khi tan theih a ni chauh dawn a ni.

Hemi ka'n sawi deuh duah nachhan chu Seling – Champhai hi khilam khawchhak lam chuan mut mawh hnar mawhah kan neih a ni. “Kan van tilian har em em ve” kan han ti thin a, Mahse kan tum ang hian thil hi a kal mai thei lova. Champhai bialtu Chief Minister kan neih lai atang tawh a kan dream tawh tho a ni. Amaherawhchu file hi a kalchak hleihtheih loh avangin kan tum angin kan rang theilo a ni tih ka sawi duh a ni. Nakin ah kan han thawh tak tak hunah pawh a amount a len dawn avangin Delhi lam

atanga tih deuh vek tur ni te in kan hre leh zel a, kha kha min lo hriatpui ka'n duh bawk a ni.

Pu Deputy Speaker, lawmna deuh mai ka nei a, tunah hian Pathian leh mipui zarah ka term hnighna ka hmang ve mek a, ka term hmasa ah khan kan Chief Minister zahawm tak hmalakna in ka bialah khian Khawzawl-Neihdawn, Khawzawl-Laizawl, Khawzawl-Tualpui, Hnahlan-Tualcheng, Tualcheng-Selam, a vaiin cheng vaibelchhe 27 nuai 93 sing 5200 in kawng khiti zat khi min laih tlang sak a, ka lawm hle a ni. Chutih rual chuan khitiang kawng khi tunah hian black top leh pavement tura ruahhmannan an nei a, tender kan han chhuah lehnghal hi a lawmawm ka ti hle a ni tih ka'n sawi duh a, Chutih rual chuan kan House Leader-in min hriatpui tura kan beisei a awm a, Tualcheng – Selam khi pavement-ah khan an hmaih palh hlauh mai a, a dang zawng zawng hi tender vekin a awm tawh a, anni Tualcheng leh Selam chiah khi an left out palh hlauh mai a, khilai te khi min rawn sawi fiah theih chuan ka lawm hle ang tih kha kan sawi duh a. Tichuan tuna pavement leh a hmaa kan laihna zawng zawng kha cheng vaibelchhe 69 nuai 15 zet a ni. Kan bial chhungah hna ropui tak min thawh sak avang khian ka lawm takzet a ni tih ka'n sawi duh a.

Pu Deputy Speaker, chubakah chuan Vapar-Murlen khi formation cutting min tihsak leh dawn a, chutah chuan vaibelchhe 11 vel in ruahmannan kan han nei leh a, 15th March, 2017 khan tender te pawh an chhuak chho leh a, lawmthu ka'n sawi tel duh bawk a, Chumi rual chuan Mizoramah khaw 66 tunah hian an survey a, DPR an siam bawk a, khaw 66 zingah chuan ka bial chhung ami Aiduzawl, North Diltlang leh Lungphunlian khua te survey ah leh khami DPR siamah te a tel avang khan lawmthu kan sawi duh bawk a ni.

Chutih ruala ka'n sawi tel hram duh chu keinin kan thlakhlelh berte zing ami Hnahlan-Saichal tih tlang hi (North East Bualpui kan tih) kan duh khawp mai a. Tun tum NEC priority-ah khan Tualcheng-Rabung kha kan Chief Minister zahawm takin min lo pawmsakin an lo prioritize a. Tichuan Tualcheng-Rabung chu priority list-ah a awm vang tawh a ni. Chutihruala ka'n sawi duh chu Keifang – Ngopa te pawh National Highway a ni dawn a, Hliappui-ah khian Rabung atangin lo tlan tlang kan duh a, khimi tlan tlangna tur 30 kms vel khi eng atangin nge ni ang aw kan ti a. Tunah ruahhmannan chu kan han nei chho mek zel a, khimi khi kan tlang a nih chuan Tualcheng atang khian

100 kms velin Aizawl hi a hnai dawn a ni. Kha kha min lo hriatpui ka duh a, nakin ah department lamah te pawh keiman ka rawn buaipui chho zel ang a, Aizawl hi chawhmaa thlen ve Hnahlan mipui ten kan chak a ni. Hnahlan leh Champhai inkar khi 54 kms kal phawt a, heta Khawzawla 40 km dang han chhuk leh a, khatiang vel kha a buaithlak lutuk. Tualcheng atangin Rabung-ah, Saichal-ah, Keifang-ah a direct zat mai a. Sairawkherh ang deuhhlek a ni a, kha kha nakin ah kan hmabak a ni tih min lo hriatpui ka'n duh bawk a.

Chutih rualin Hnahlan-Tuivai hi 2012 vel khan JICA hnuiah thehluh ve a ni a, kha kha tun thleng hian a reh ta ngar ngar mai a. Hnahlan-Tuivai pawh hi nakin ah keimah bawkin ka buaipui hunah min lo hriatpui thei hram se tih ka'n ngen bawk a ni. Tunah hian Mizoram pumpuiah formation cutting hi khaw 22 ah tender mek a ni a, ` 2,87,67,00,000 zet man tur a ni a. Chutih rualin pavement hi hmun 33-ah tunah kan tender mek a. A copy hi ka kawl naa han lek tehchiam kha a sawt chuang lova (Pu Beia ten hmuh an lo chak loh takin) Pavement-ah khan cheng nuai singhnih sangnga zathum sawmli pathum man tunah hian tender mek a ni bawk a. Kha kha a lawmawm ka ti hle a ni.

Tin, nichin khan member zahawm tak Er. Rinawma khan quality control kha a rawn ngaipawimawh khawp mai a, kha kha a lawmawm ka ti a. PMGSY kan tih hmasak tum khan Zawlsei-Khuangthing te kha, bus tlan tawhnate kha an han lai nawn leh a, tlem te an lai a, an pawm ta mai a, a quality control kha a awm reng reng lo mai a. Chuvangin quality control lam kha kan tan deuhhlek a ngai a ni. 1998 -2008 leh tun dinhmun comparision kha rawn tih lan chu ka'n tum naa department-dangin hun an changlo ang tih ka hlau a, kan sawi tawh lo mai ang a.

Kan sorkar hnuiah hian vanneithalmak takin NEDP hnuiah pawh hian kawngpui siam that nan ringawt vaibelchhe 239 kan dah a. Tin, kawngpui awm mek leh a thar siamna vaibelchhe 657 kan dah bawk a, kawngpuiah in fail a ni in tih kha chu khuain a zir a nih chuan rei loteah kan fail lo maiin ka ring. Member zahawm tak Pu Sangthuama khan a rawn sawi a, pass-na hun a awmin ka hria, khua a that chuan kan pass mai ang, min lo chhinchhiah sak hram se ka ti a. Khalai bik te kha PWD bikah chuan ni mai sela, comparision chu ka siam teuh naa hun a heh lutuk dawn e.

Pu Deputy Speaker, Power-ah khan demand 39-naah Champhai-in kan mamawh em em 132 Kv Power Station kha Champhai DC tlangah khian kan Chief Minister zahawm tak hian vaibelchhe 12 nuai 50-in min siam sak a, nikum mai khan kan hmang tan a. Hei hi engatinge ropui deuha kan hawn loh aw ka ti a. Sorkar hmasa tun hma ami te kha chu ni se, Vengthlang thlanmual pawh kha an rawn hawng mai kha a ni si a. Keinin vaibelchhe 12 man kan hawng bawk si lova te kan ti deuh mai mai a. Nikum hmasa lawk atang khan hei hi kan hmang a, a lawmawm hle a ni.

Chutih rualin Champhai Tlangnuam leh Hnahlan a Saron vengah khian power kan mamawh a ni kan ti thin a, Champhai Tlangnuam-ah chuan min pe tawh a, Hnahlan Saron veng ami khi a ruala tih reng ni si tun thleng hian an la rawn ti lova. Kan han zawh hian a lo la thleng lo' tih hi a ni leh ringawt mai thin a. Helai te pawh hi chiang deuh taka min rawn react theih chuan ka lawm khawp ang.

Pu Deputy Speaker, Power Department hi department upa tak a ni a, Champhai-ah hmunhma pawh tha deuh deuh kan nei deuh nual. Amaherawhchu kan office te reng reng khi mi in luah vek mai hi a la ni a. Tlem tlema mahni insawh ng het zawnga kan chet deuh hi chu a tha lo maw ka ti. Tute in emaw kan luah kan luah hi sum senso pawh a tam a, a uiawm bawk. Chuvangin kan hmun neih sa ang angah khian kan Chief Minister zahawm tak hian keimahni in ngei, building ngei kan neih theih hun kan thlir hi min rawn pawmpui ve ta sela, nei thei ila aw tih hi kan hmathlir a ni. Chutih rualin RGGVY hnuiah Selam lamah te khian hrui fual hi a awm leh zauh zauh thin a, electric current hrui fual, clearance tih that tawk loh deuhte pawh a awm chang khi a awm a. Khi khi kan hlauthawng khawp mai a, min lo en zui se kan duh bawk a ni.

Resolution-ah pawh ka thehluh Tuirial chungchang erawh kha chu vawiinah hian ka sawi vak lovang a. Sawi ka tum hran lova, a lawmawm ka ti hrim hrim a. Amaherawhchu ka'n sawi duh zawk erawh chu Pu Deputy Speaker, chawhma khan member zahawm tak Pu Piana khan VC pass neituten compensation an hmuu theihna hi eng tik atanga intan nge tih lai te kha ka'n chhang duh a. Helaiah hian House ka rawn pe duh che a Pu Deputy Speaker.

Hei hi kan chhiar lawk ang a. Compensation VC pass atanga kan hmuu tanna chu sorkar hmasa lam daih tun hma ami kum 2001 vela an Cabinet meeting thu chhuak hi kan chhiar lawk ang e, "The compensation may be given not as a matter of

recognizing the validity of passes issued by the Village Council, but on the ground of human consideration, if the claims are properly scrutinized and found genuine on case to case basis” tih a ni a Pu Deputy Speaker, he copy hi ka rawn pe duh che a, kan House Leader leh kan Group Leader pawh ka pe duh bawk a, nakinah remchangah min lo pek mai dawn nia.

Demand no. 15-na GAD-ah khan ka’n sawi leh duh chu tunah hian sorkar quarter-ah Pu John-a nen, Pu Mahima nen Sivaji Tilla-ah sawn kan awm a. Sawlai hmunah sawn a theih hram chuan sorkar hmunte a ni bawk a, CCTV hi dah ve theih a ni lawm ni aw kan ti a. Tun hnai thil thlengte kan en a, Chief Minister in meuh an kal ngam tawh chuan keini ang in velah te saw chuan CCTV hi dah a awm ve hlein ka hria. A theih hram chuan hei hi chu min lo ensak thei ula kan duh a. Tin, Pu Piana’n a sawi MLA House te pawh khi CCTV dah tha hlein ka hria.

Tin, GAD-ah hian Pu Deputy Speaker, kan sawi leh duh chu sorkar hmun pawimawh humhalh hi a pawimawhin ka hria. Tunah hian Champhai DC compound te pawh kha kan han sawi a, DC thar te pawh khi kan han nei lehzel a.

Tin, Transport leh Supply-ah Pu John-a hi ka’n tawiawm a. Pu John-an a tih hmasak ber Mizoram pumpuia kan ram zawng zawng hi kan tichiang nghal vek ringawt mai a ni. Hei hi a pawimawh khawp-in ka hria a. Sorkarin a ta nia kan hriat ni mang si lo ang chi hi a tam riauin ka hria a. Tawng mawilo ni lo sela sorkar ram nek hi kan huai hlawm bawk si a. Chuvangin a hma thei ang berah sorkar ram reng reng hi tihchian vat vat thani ka hria. Hei hi kan House Leader-in min lo hriatpui kha kan duh bawk a ni.

Pu Deputy Speaker, demand no. 39-na Environment and Forest chungchangah khan staff hi kan indaiah lo khawpin ka hria a. 13th Finance Commission-in min han pekte kha kan ban deuh vek niin kan hria a. Khangte kha engtin emaw ngaihtuahna thar kan nei a nih loh chuan kan ram forest hian a chhiat phah ang tih hi ka hlau khawp a. A bik takin Murlen Sanctuary te pawh staff 20 chuang kan awm a, 2008 inthlan dawn khan an kaisan tur thute kha an lo tiam vek a, tun thleng khian a ngaiin an la awm a. Kum 20 chuang hi a ngaiin an la awm a ni, hlawh ngai la in, khingte kha ngaihtuah sak theih hram a ni em?

Tin, ramsa pelh chungchangah te, sangha ven chungchangah te, ram kang ven chungchangah te hian NGO te nen hian a tam thei ang bera thawhho hi a tul ka ti a. Tute emaw a vengtu, fire watcher te kan han ti leh ringawt thin a, a tha. Mahse khawtlangin an ven tluka him hi a awmlo hrim hrim. Hei chu thingtlangah hian a dik in ka hria a. Chubakah, kan MUP ten Zothelhuan an han ti te pawh hi a hranpaa fund te hi pek an phu in ka hria. Sawitur tam tak a awm ang.

(DEPUTY SPEAKER : I pel thui viau tawh ania.)

Pu T.T.ZOTHANSANGA : Nia, ka sawi tam tawh lo ang a. Assembly chungchang bikah sawi duh pahnih khat chauh ka neih chu Pu Deputy Speaker hian xerox i nei thalo hi pawi ka ti a, hei hi chu nei vat ula a tha in ka hria. Thil han xerox dawn a, helaia han chhoh hi a buaithlak a, han xerox zawk kan duh hian anni khu kan tir kawi kan tir kawi a, a nuamlo a. Deputy Speaker room-ah hian Xerox khawl awm mai se a tha ka ti.

Chutih rualin hmun dangah te pawh an tih angin he Assembly Secretariat hian kan Council of Ministers te leh hemi Secretariat-in min tuamhlawmna ang chi zawng zawng hi helai Assembly hi lian deuh hian siam ila. Staff te pawh inlakbelhin, khulaia mawhphurhna zawng zawng khu hlih chhohsak vek theih hi a tha em aw tiin ka ngaiantuah fo a ni. Helai te hi ka rilruah a awm a.

Pu Col. Sangzuala'n a sawi, helaiah MLA pangngai a ni a, Parliamentary Secretary-ah an chhuk a, "Pu T.T. rawn let leh a ni ka duh ni, MLA pangngai kha a lo nuam daih zawk mai. Khulaiah chuan engkim bill hi a tang fai vek mai a ni," a ti ringawt mai a ni, tun hma khan.

Helaiah kan Assembly-ah engkim mai, mawhphurhna diktak nena min tuamhlawm zung zung lai kha a ngaihawm khawp mai a tunah hian. Chuvangin kan Minister te pawh engkim mai kan entitlement kan tih ang chi reng reng pawh hi Assembly-in min en theih tur hian he Assembly hi tilian ila. Helai atang hian engkim mai hi min buaipui se tha in ka hria. Nia, ka'n ziak deuh duah na a, nimin ah member zahawm tak Pu Ngurdingliana'n 'ka inbuatsaih tha a nia" a tih ang deuh kha ka nia. Mahse kha kha ka sawi theih ni rih sela. Kan demand hi lawm takin ka rawn support e. Ka lawm e.

DEPUTY SPEAKER : Pu R.Vanlalvena.

Pu R.VANLALVENA : Pu Deputy Speaker, ka lawm e. Kan Chief Minister, kan House Leader zahawm tak demand sawina hun min pek avangin a hmasain lawmthu ka sawi e.

Saiha bialtu zahawm tak kha Pu Deputy Speaker, a hmin tan riauin ka hre mai a, a lawmawm ka ti a. A bialah kan va kal a, ani hi chu a fel si a, a tha si a, a rilru hi Congress rilru a nia. “Congress-ah a lut dawn emaw kan ti a, a ni lo lamah a lut daih mai a,” bial ten an lo ti a, an ui khawp mai a. An tih dan tak erawh chu ka sawi tluan lo ang a, an lo fak hle a, a lawmawm khawp mai. Helai House-a a lo luh hlim leh vawiin thlenga kum rei lo te chhunga hmasawnna a hmuh nasatzia te kan hria a, lawmthu te a sawi a, a lawmawm khawp mai. Nakinah 2018 hnulamah chuan i dinglamah hian kan la thu ho em ang chu maw ka ti deuh a ni, Pu Deputy Speaker.

Demand no.1, Assembly chungchang ka sawi hmasa duh a. Assembly hi kan thianten an sawi tawh ang khan kan vai hian kan office pui ber a ni ve ngawt a. Keini MLA ho, a bik takin Subject Committee te, Finance Committee-te a nihna nei ho chuan kan chuk rawn luai luai hi a ni ber a. An fel em em a, sawiselna tur awm miahlo in mi an dawngsawng tha thin a. An chungah kan lawm tlang hle a ni.

Amaherawhchu thil buaithlak deuh mai pakhat hi a awm ve a. Assembly zaghna hi department lam hian an chhang tha thin lo hi min tibuaitu ber a ni. Zaghna kan han siam a, (tun term chauh pawh ni lo, lehkha hlui, Subject Committee leh Finance Committee-in paper an present te, an lay tawh te han chhiar kir pawh hian a lo ni vek mai a) Assembly atanga zaghna siam hi department hian vawikhatah hian an chhang fuh mai thin lo a. Heti zawk hi a ni tih leh te, a thenah phei chuan vawili vawinga a hmunah kan va tlawh a, a ni thleng a paper, a dik zawk a ni tih rawn submit te hi an awm ta thin a. Hemi kawngah hian department lian tan tan lak deuh hlek chu a tha in ka hria a. Hun a heh a, sum a kalral nasa a. Vawikhatah inchhang dik mai thei ila, chuan hun leh sum leh pai pawh a save in ka ring a. Chutiang chuan ti thei ila chuan a lawmawm khawpin ka ring a ni.

Chutiang chu a awm tam thin avangin tukin pawh khan ka'n inhai a, kan Committee hlui leh Assembly-a tunhma lama zaghna chhanna te, tunlaiah Vishal dawr a lar em mai a, ILP kum 2 nung hi engtik atanga sumdawn nana pek theih nge a nih le ka ti a, Assembly question hlui te kan en a. Chungah te pawh chuan a thenah chuan kum 2

nung ILP pek theih hi Department-in zawhna ngai inang an chhan ah chuan a thenah chuan kum 2005 atanga pek theih a ni tih te, a thenah chuan 1999 atanga pek theih a ni tih te, zawhna inang reng chhanna inang si lo a awm a. Hetiangah hian kan fimkhur tlan a tha in ka hria, hun kalzel turah chuan.

Tin, Pu Deputy Speaker, ka rawt duh chu Subject Committee leh Finance Committee ten department-ah engemaw evidence kan va nei a, kan va kal hian a senso thingpui leh ei in, chaw senso hi a lo ngai ve a. Hei hi Assembly hian tum thei ila a tha mang e ka ti a. Kan va tlawh te department kan tum tir hi a inthlahrunawm duh riau a, min lo mikhual that viau phei chuan an seng teuh ang tih hi a hlauhawm thin a, keimahni lam hi kan inthlahrung zawk thin a. Parliament-ah te pawh an tih dan a ni deuh tlatin ka hria a. Chuvangin department-a evidence kan va neih hian Assembly lam atang hian intum ta zawk ila a tha awm mang e tih rawtna ka'n siam duh a ni.

A dawt lehah chuan no.11, Secretariat Administration Department-ah nichina an sawi kha ka rilrua awm a ni a. File movement hi a muang lutuk a, file 1 kan um hian dawhkan 72 bawr vel a tlawh in ka hria a. A chho a, a chhuk a, chutiang reng reng chuan a kal a. Tin, committee hi a tam em em a, an lo committee hi chuan nikhat hi a awl a ni deuh ber a. Chutiang chu kan dinhmun a nih avangin department-a pawisa hman mai theih tura kan ngaih, chhuak mai tura kan ngaih te, engemaw department-a hna lak tur, hmin mai thei tura ngaih te hi a kum a kum a kal leh ringawt thin a.

Hei hi tihdan tha deuh a awm ang em? Committee te hi a tlem deuh thei ang em? Entirnan, Thawhtan atanga Zirtawp-ah hian kar khatah vawi hnii (2) emaw, vawi thum emaw hi committee ni bik hi awm ta se, hnathawhna ni bik hi kar khatah ni hnii (2) te emaw ruat ni ta se, chutiang chuan kan file movement hi a rang deuh thei ang tih a rinawm a ni. Tun ang hi chuan duhthu a sam chiah lo a ni. Dawhkan hi a tlawh hnem lutuk a, duh angin hna a chak theilo a. Sorkar hi duh angin a kal chak theilo niin ka hria a. Chulai te chu kan thianten an sawi teuh tawh nachungin rawtna kan nei ve duh a ni.

A dawt lehah chuan demand no.13, DP&AR ah hian kan hre tlang a. Department zawng zawng hian thawktu kan indaihlo a ni, hnalaik hi kan duh tlang vek a. Entirnan, P&E-ah te, AH&Vety-ah te, Health-ah te, Excise-ah te tak hian kan indaihlo a. Excise te hi tunah chuan zu zawrh a nih atangte phei chuan an indiah lo hle a ni.

(Deputy Speaker : Ngawi rawh aw lawk, Chair kan han inthlak lawk ang e.)

(SPEAKER: Aw, sawi zel rawh le.)

Pu R.VANLALVENA : ...Pu Speaker ka lawm e. Champhai bialtu zahawm tak khan a sawi a, Forest department indaihlohzia te pawh kha. Chutiang chu a nih deuh vek avang hian DP&AR-ah department hrang hrang in hnalaik kan dil hlawm fo thinin ka hria a. Mahse kan la thei reng reng lo mai, hei hi engnge ni a awmzia? An exam chianglo, an zir chianglo deuh nge? Finance lamah hian problem kan neih viau chu ka hre chuanglo na in kan lak ve zauh zauh hi chu a tulin a lang a, tun anga indaihlo lutuk hi chuan sorkar department pawh hi a kal tha hleitheilo thin niin ka hria a. Chuvang chuan DP& AR atang te pawhin tlema exam chian deuh hlek a, hnate pawh hi han lak tir deuh theih dan te hi a awm lawm ni tih kha rawtna kan siam leh duh a ni.

Demand no. 15-na GAD-ah kai leh dawrh ila, tawi te te in, kan thian ten a tul zual leh a pawimawh chu an sawi theuh tawh na chungin. Kan district boundary hi a buaithlak khawp mai a, Mizoramah hian a ni nualin ka hria a, ka hriat chian em em pakhat, MLA zahawm tak, Pi Awmpuii bial ami Biate khua khi ka hriatchian deuh mai pakhat entirnan pek ka duh a. PHE-ah hian Serchhip lam a nia, Electric leh department dang PWD ah te Champhai lam a nia. Khatiang khan khaw pakhat khi department hrang hrang khan an bial dan hi a inang lo thluah mai a. Horti-ah khian Khawzawl lam bial an ni thung a, BDO ah khian Khawzawl lam bial an nia. Chutiang chuan a inkalthelh thluah mai a khi khua khi. Chutiang chu a nih avangin khimi khua chauh lo pawh khaw dang dang hi khatianga district boundary in kalthelh hi awm nualin ka hria a. Hengte hi siam rem ni ta se, a buai bial, district pahnihin a kartawn khua te hi siamrem ni se, chungte chu tih theih dan a awm em tih ka rilru-ah a awm a, chu chu ka'n sawi lang duh a.

Demand no. 27-na District Council-ah khan ka sawi tum tak ka thianten an sawi tawh nachungin, kan MDC bial hi a zim lutuk a, hei hi tih zauh deuh dan a awm ang em aw tih hi ka rilruah a awm a ni. Aizawl Local Council kan inthlang a, Aizawla Local Council-a tling tur chuan vote sang chuang hmuh a ngai a ni. Sawlaiah MDC bial khatah chuan vote 500/600 in a tlin theih tlat mai a, an power a lianin hlawh te, facilities-te a sang em em bawk si a, MDC bial tuna bial 25 ang vel saw bial 13 awm velah te hian a boundary saw rin theih/siam danglam theih ni ta se chuan sum tam tak

kan save ang a. Tin, inthlan te pawh a felfaiin (tun saw a felfailo e tihna lam ai mahin) a nuam zawk awm mang e tih kha ka rilruah a awm tel a ni.

SPEAKER : Ngawi rawh, dar li a ri a, House consent ka lak a ngai, i zo law law ang u aw. Awle, kal zel rawh le.

Pu R. VANLALVENA : Pu Speaker, ka lawm e. No. 28- na Labour & Employment-ah central-ah kan Minister-te an in thlak a, central-a kan Minister hmasa khan ITI hi a ngai pawimawh khawp mai tih kan hria a. India ramah district tinah ITI tha tak awm theuh ni se a ti a, Mizoramah pawh ITI tha tak tak din turin hma lak a ni a. Mahse central-ah a Minister an inthlak a, ngaih pawimawh zawng a lo dang ta nge ni, keini Mizoramah pawh hian Minister viak tha takte kan nei a, ITI building tha tak tak district hrang hrang Champhai-ah te Serchhip-ah te leh hmun dang dangah an sa a, kan la luah thei chiah lova. Hengte hi luah a, functiona tih puitlin theih ni se chuan Mizo thalai ten kan chhawr hle dawnin ka hria a. ITI hi zirlai thalai lehkha thiamte leh tlema zir sang vaklo te pawhin mahni level theuh-ah kan training theihna hmun tha tak a ni a. Hei hian hna min pe dawn a ni, skill kan neih theihna tur atana tha a nih avang hian tuna ITI building kan neihte hi tha zawka enkawl a, luah a function tir theih ani ang em tih ka rilruah a awm a, Pu Speaker, chu chu ka'n sawi leh duh a

A dawt leh ah chuan Power & Electricity Department-ah hian luh ka duh a, kan thian ten an sawi teuh tawh a, a pawimawhna leh a tangkaina zawng zawng te chu kan hre tlang vek a. Helai kan awmna hmunah ringawt pawh hian chiang em em chu elctric a awm loh chuan kan buai der a. Tun dinhmunah ngat phei chuan electric a awm loh chuan kan insu theilo a, kan inbual theilo hi a ni ringawt tawh a, chutiang khawp chuan electric pawimawhna kan hretlangin ka hria a. An thim hlek lah hian kan vui nasa thei em em mai a. Ka ti thin a, India ramah hian Mizoram anga eng hmu tha hi kan awm awmla mang e aw ka ti a. A khaw pumpui, a ram pumpui hisap hian eng hi kan hmu tha em em a ni. Nichin chawhma lamah te pawh kan sawi a, tawng mawilo lam ni lo se eng in a tlawh theihloh khua te kha chu khaw chengker ve tak tak, khaw hla ve tak tak te an ni. Motor kawngin a tlawh theihna khaw tha deuh deuh chin hi chuan eng tha tak kan nei vekin ka hria.

Chuti chung chung chuan tlema an thim deuh hlek hian kan phun hma em em a, a thawktute hi kan dem lek lek thin a. Tah hian mipui te hian a thawktute thawhrim

zia te, thahnem an ngaih zia te hi kan hriatpui a tulin ka hria. Kan thiante department-a thawkte hian an ti thin a, ‘hmanah chuan ruah an sur cherh cherh te hian mut a tui duh e kan ti a, tunah chuan ruah a sur cherh cherh chuan khawilaiah nge chhia ang aw? Khawiahnge ruahsur chunga tlan ngai ang aw tih hi kan ngaihtuahna a ni a. Ruah sura hmania mut tui thin kha tunah hi chuan mut hi a tui thei tawh reng reng lo,’ an ti thin. A dik chiah a, tlaivara thawh chang te hi an ngah a ni. Chung chu mipuite hian kan hriathiam pui hi a tulin ka hria a, an thawk rim a, eng min pe tha bawk. Chuti chung chung chuan electric ban leh a hrui te hi kan inbul leh kan rama kal tir hi kan phal tlat lo a, a thim hleka phun chiar tak si hian, keimahni in hnaiah chuan kallo hram se kan duh thin bawk a. Chungah chuan department-a thawk te an hah zia te, an thawhrim zia te, chetsual hleka thi mai thei reng dinhmunah an ding a ni tih te pawh kan hriattlan a tulin ka hria. Chutih rual chiah chuan keini pawhin harsatna kan tawh ve tho Bethlehem-ah khuan kan Biakin kan sa tha dawn a Presbyterian Kohhran khuan. Biakin bul chiah ah khuan transformer lianpui mai hi a ding a, Biakin kan sa tha dawn si a, a hnawk khawp mai a. Chu chu kan Chief Minister hnenah hian lehkha a kal tawhin ka hria a, sawn theih ni hram se chuan kan duh khawp mai a, he House zahawm tak kaltlang hian ka’n dil duh a ni.

A tawp berah chuan PWD hi ka hma-ah an sawi tawh a, National Highway hi PWD-ah hian km 1465 chuang kan nei a. National Highway hi kan thu a ni lo tih kan hria, tender a nih pawhin khulam atangin an rawn tender a, a thawktu thlan leh khatiang zawng zawngah khan an thu vek a nih avangin pawisa min rawn pek atanga 9% vel hi state sorkar-ah (PWD-ah a niang chu) an chhung ve a, anni hian chumi hlawn chuan an lo enkawl ve chauh thin a ni. Nichin khan Champhai bialtu zahawm tak khan Pu K.Sangthuama rawn sawi National Highway No. 6 chungchang pawh kha a rawn sawi tawhin ka hria a, khangte pawh kha keimahni thu a ni lo, BRO-in pawisa min pek har, BRO in PWD-a an rawn chhun duh si loh, khulamin National Highway-a an puan tawh si avanga khilai kawng khi thalo a ni tih kan ngaihthla tawh a. Khatiang kha Mizoram-ah kan nghah em em a ni. Chu chuan kawng hi duhthusamin a ti tha theilo a, PWD ho thawhrimna zawng zawng pawh hi duhthusamin a lang hleitheilo a ni.

Thlang lam atanga control kan nih tlat avang leh thlang lam atanga pawisa te rawn tum thin an nih tlat avang hian PWD hian duhthusamin an thawk chak hleithei

lo a ni tih kan hria a. Chumi kawngah chuan kan phun viau thin nain a tak tak hriat erawh hi chuan an fakawm hle in ka hria. Kan ram leilung hmin zia, ruahsur leh engemaw hleka a min duh zia te kan hria a. Lawngtlai atanga Burma lam kawng (KMMTTP) Kaladine Multi Model Transit Transport Project-ah te pawh sawn kan va kal a, nikum lam te pawh khan kan hre tlang vekin ka hria a, kawng ngai hi vawi thum te an lai a ni. Thalah chuan tah hian tui a put thei ang tih pawh mawilo khawpa tui put hmel loh naah hian furah chuan tui hi a rawn chik chhuak to to zel an ti a. Chu chuan leimin nasa takin a siam thin a, an paih zo a, a rawn min leh a, chutiang reng reng chuan vawi hnih vawi thum te hi an thawk thin.

Chutiang a nih avang chuan kan ramah hian kawng hi a tha mawh em em a ni tih kan hriat tlan tha in ka hria a. Heng an thawhrimna leh kan ram leilungin a zir loh zia te hi kan hriatpuia sawisel luai luai lova kan in ngaihnathiam tawn deuhhlek te pawh hi tha in ka hria. Pu Deputy Speaker, hun min pek avangin lawmthu ka sawi e.

SPEAKER : Tunge sawi leh dawn? Kan in thlak zing a sawi sual kha chu a pawi lo e. Pu Ruatkima.

Pu LALRUATKIMA : Pu Speaker, ka lawm e. Vawiinah kan House Leader zahawm tak demand 15 sawihona hun tha kan han nei a, sawitu ten an sawi ngaihnawm thiam khawp mai a, hlawk pawh kan hlawkpui turah ka ngai a. Demand-a ka luh hma in Tuivawl bialtu MLA zahawm tak khan a bial chhung Seventh Day lam panna kawng a chhiat thu a sawi a, PWD-in an siam tha viau thin a, a aia tha daih in paver finisher khawl hmagin SIPMIU in an rawn laihchhiat kha tunah hian an contractor TANTIA ten siam that hna Kanan veng lam an khawih a, khawih zawahh tikhuan a tahtawlin Pu K.Sangthuama bial lamah te khati khan an ti a, Aizawl khawpum khu an la siam zel turah ngai ila. Khua te a lo chhia a, nimin lama an siam te pawh kha zan lamah te an thawk rim khawp mai a. Vawiin lamah khuate a chhiat avangin an thawk chhunzawm thei lova, chuvangin khulai a sawi si lova tih kha sawi ngai lova an khawih lai mek ruahman awm sa vek a nih avangin ka'n tarlang a ni.

Demand pakhatnaa ka'n sawi duh chu Legislative Assembly hi keini MLA ten kan office ve a ni a, a thawktute an hawihhawmin biak an nuam hle mai a.

Chutih lai chuan Spot visit-te kan nei a, evidence te, discussion te, official lam te kan han ko a, kan han nei tlang thin a. Chulaiah chuan anmahni hi min bengvartu, min fin chhuahtute an ni lo thei lova, keini a hminga MLA te chu thil chin hre lo te, well-verse lo tak tak te nihna chin kan nei a, a subject azir khan chungah te chuan a changin min han Finchhuahtu ber an nih avang khan mi thenkhatte'n 'in in rawlh lutuk a ni' tih tawngkam he House-ah ngei pawh an awm ta mai kha an inkiltawih phah lek lekin ka hria a. Pu Speaker, kan ram thatna turin kan inti bawrh bawrh a, committee chhung a ni a, he House-ah ngei pawh kan han in kawk sawk sawk mai a, ram thatna tur duh tlang vek kan ni a. Chuvangin he House kaltlang hian kan Assembly official-te pawh inthlahrung lovin kan ram tana infin chhuah zel turin ka han sawi lang duh a.

Tin, hei ka thutna hi a fuh loh vang nge ni kan House Leader khan a sawi tawh a, TV hi ka hmu ve phak mang lova, Heta tang hian a chanve a lang a, a chanve a lang phak lova, helai ah hian Pu Speaker, kan dah thin khan ka hria a, a awm ta der lo mai a, hun engemawti atang khan. TV hmu ve phaklo awm chhun ka ni mai awm mang e aw ka ti a, ka thlek ka thlek thin a. Khalaiah khan dah theih ni se chuan a lawmawm ngawt ang tih kha ka han sawi lang tel duh a ni.

Demand no. 45-na PWD kan kai daih ang a, kawng siam chungchangah hian ni e, tan lak a ngai khawp mai. Mipuite phun nasatna ber department kan ni ti ila a sual tam pui awm love, sorkar pawhin hemi chungchangah hian demna/sawiselna pawh kan tawng NASA a. Pu Speaker, ka sawi tawh ang khan Sumo driver thenkhat chuan kawngchhe sawi nan 'Congress kawng' tihte pawh an hmang a, a mawi lo a ni mai thei a, he House-a sawi ah chuan. An sawi duh dan thin kha kan in enletna tur ni se, kan thahnemngaihna vek ni sela. Kawng kan han siam hian hnatiang te a kan han tih chak chak chang a tam ta mai a. Tunah chuan vaibelchhe 700 chuang ruahmanna kan han siam a, khang sum kha awm ngawt mahse kawng kha a tha thei lova, kan working season-te a tawi em em a. Tunah pawh kan beisei loh tawpin ruahmanna kan dawng der mai a, kawng siam hna thawh kha chu NASA takin a ti khaihlak ang tih kha a rinawm a, chutiangte chu a ni a. Hun kalta lamah te pawisa kan han in ruahman fel meuh chuan working season a lo zo hi a ni deuh ber mai thin a. Chuvang chuan fur lai atangin hmanrua lo in lakkhawm a,

engkim sum leh pai te pawh lo inpeih fel hman a, working season a lo thlen veleh hna ah bur chat thei tura ruahmanna an siam thiamte pawh hi a tul hlein ka hria. Tin, quality assurance chungchangah hian tan kan lak a ngai khawp mai a. Kan ram lung a no, tha tawk lo tih chu kan hre tlang vek hlawm a. Hemi ah hian tunah chuan kan SOR hman lai te a rate a lo tha ta bawk a, chutih a nih chuan phailama lungchang tha zawk tlo zawk a kha kan ngaihtuah thei tawh turah te pawh kan ngai a, hei kan hriat angin BRTF atangin kawng emawzat state PWD leh National Highway hnuiah te a lo awm ta a, heng BRTF kawngte hi a tlo em em nachhan chu a hmanrua quality chungchangah an maintain tha ni te pawhin a lang a, chung chu keini pawhin kan tih ve theih vek, kan Mizopa hnam dang aia Mizoram hmangaih zawk, kan tu leh fate seilenna tura helai kan lumphumna tur hmun neitute an nih avangin an ti tha zawk ngei ang tih pawh ka ring tlat a, anmahni ah pawh rinna sang tak nghat chungin quality assurance chungchangah hian tan lak zel a tulin ka hria a.

Tin, lei dawh chungchangah ni e kan vanduai a, lei te a chim a chim mai a, lei ah hian kan ngaihmawh zual bailey bridge engemaw zawh ngam loh te, engemaw motor lian in a zawh phal chin te pawh kan han nei thin a, hengte hi maintain that a tul khawp mai a, vanduaina a lo thlen hian a pawi tih mai loh chu tih theih dang kan nei tawh thin si lova, hemi kawngah hian tan kan lakzual a ngai a.

Tin, hei kan chhuahka pakhat a ni ta der mai a, Sairang Sihmu, Tlawng Lei khu tunah tripple structure tur tih a ni tho bawk a, double structure-in kan siam a, a siamna tur sanction atangin nuai 54 dawn kha a la chuang ni khan session hmasa ah khan sawi lan a ni bawk a, chuvang chuan motor lian te pawh a an zawh kai ve theih turin a ral leh lamah ISPAT hovin rod te, material an lakluhn turin kawng tha, lei tha kan mamawh a, chung te chu kan nih laiin kan industrial growth centre ti mai ang EPIP hmun te lo ni bawk nen bungraw lian pui pui lakluh a lo ngai a, khungte pawh khu chung angin an zawh ve theih tur chuan a ranglama tih theih ni se a tha khawpin ka hria.

Tin, a bik takin kan khawpui lian zual ah kawngte a tlo lova, a tlo lohna ber chu bawlhhlawh kan paikhimkhur loh avangin side drain-te a lo hnawh a, chung side drain a lo hnawh avang chuan kan kawngpuiah tuihawk te a lo luang a,

chu chuan kawng a ti tlo lovin a ti chhe hma em em mai a, hemi ah hian fund duh ang tawkte kan lo dah thei lova. Kan ngaihthlak fo tawh angin bitumena black topping kan han tih mai te pawh hi thlak a hun tawh mai lawm ni? India ram khawpui dang dangah pawh paver block te kan ti a, cement concrete kan han tih chi ang te pawh kha kan han hmang tawh a. Silchar kan ram dep mai kan thenawm ramah te pawh paver block hmang te'n an khawpui chhung nasa takin an chei a, kawngpuite pawh a tha ta viau a, free maintenance a nih avangin kum 20 hi chu maintain vak ngai lovin a kal theih hi a rinawm si a. Chuvangin heng ang zawngte hian a bik takin heng Zion Street chho siam that reng ngai mai te, mipui vei vak nasa bawk nen , traffic nasa bawk nen sawnglai hmun pawimawh zual te; tin, tuihawk luan kawr leh a ram thleng in a zir loh avangin Vaivakawn atanga Bazar Bungkawn te pawh hi tunhnaiah pawh vawi hnih kan siam tawh a, mahse tunah chuan Pu Speaker, zawh a hreawm leh tawh khawp mai. tui luankawr mumal loh vang te, chhan hrang hrang pawh a ni ang heng ang hi cement-in emaw, paver block hmangin emaw thlak ta ila. Tun hunah hian kan lo seng tam deuh a nih pawhin a maintenance-ah zero a lo nih kha chuanin kan tan sum leh paia kha kan seng thlawn dawn lo a ni tih te ka ngaihtuah a, chutiang chuan hmun hrang hrang kawngpui pawimawh si mahse maintain hautak zet mai, tlo mang si lo kha a tlo phah theih ang tih ka ngaihtuahnaah hian a awm a. Chuvangin helaiah hian hma lak a tul tak zet zet in ka hria a.

Tin, khawthlang lamah te KDZKT kawng kan han siam a, Kanhmun atanga Tuilut thleng mai te hi a lawmawm a. Chutih lai chuan Land Acquisition kha kan hmang tlat lo mai a. In leh lo tam tak, ram tam tak, huan puitling tha tak tak te Pu Speaker, tih chhiat a lo ni a. Amaherawhchu, a project-ah compensation tur a awm lo tiin kan hotuten an lo zuk sawi a, a dik ang. Amaherawhchu, India ramin Land Acquisition Act-te kan nei a engatinge mimawl zawk leh thil hre lo zawk te ah khan khati zawnga kan ngaihtuahna kan hman mai aw ! ka ti a. He Project kan siam lai a DPR kan siam laiin mipui ten a an ram leh lo an channa tur a awm a nih pawn khalaia Land Acquisition Act- in a phal ang khan ngaihtuahna kan lo hman loh aw tih te ka ngaihtuahnaah chuan a awm a. Khawthlang mipuite tan chuan a hrehawm khawpin ka ring.

Demand no. 28-na LE & IT-ah khan ka'n lut leh ang a. Kan hriat angin Building and Other Construction Workers Welfare Board 2012 vel chho atang khan, (a la

rei vak lova) Supreme Court-in India ram pum ah a rang thei ang bera kalpui tur a tih angin he thil hi kan han kalpui a ni a. Chutah chuan kan kalpui tirh atangin Welfare Board ah hian tawktu mi 36 zet kan nei a, officer co-terminus kan tih kha pathum kan nei a, mahse, driver post kha mi pakuain an luah mek a ni. Khalaiah khan sorkar-in sum renchem te kan han ti a, tan kan han lak viau lai khan helamah khan eng atan nge driver pakua lai mai an lak kha ka hrethiam chiah lova, hun hmasa lam thil te a ni a. Chuvang chuan khalaiah khan thil fel tawk lo te pawh a lo awm thei a ni ang.

Tin, he session-ah hian kan sawi a, kan zawt a, member ten kan hriat duh kan Minister te kan zawt a, chutah chuan constituency wise-in min chhang thei lova. Kan Minister te kha min chhangtu an ni ngei mai, amaherawhchu, chhan tura buatsaihtu kha official te an ni ngei mai, chulai ah chuan Data entry Operator pawh hi mi sawm pakhat zet mai an awm si a.

Tunlai khawvel-ah kan beneficiaries ho zawng zawng te kha chu kan computerized ang tih hi tlang hriat leh kan ngaihdan awm sa a ni. Chuvang chuan computer excel-a kan han chhut chuan han click ila a in tlar thla puat mai dawn tih kha chu a lang sa reng mai a ni. Khalai ah khan kan official te nge kan Minister in kan member te min ngai pawimawh tawk lo tih mai tur khawp khan member paruk in kan zawt a, khati veka zawhna rawn lang kha tun hnuah chuan awm tawh lo se ka duh khawp mai. Tin, he Welfare Board hnuiaia cells ah hian Children Education Assistant hi election dawn khan 13,294 hnenah kan sem a 2013-2014 ah khan. Amaherawhchu, nikum ah kha chuan sem a awm ta hauh lo mai a, engatinge ni aw ka ti a, diltu kan awm ta lo mai nge ni, enge a chhan chu ka hre lova. Hei hi MLA ten kan bial chhung ah mi harsa zawk te Building & Other Construction member ni thei tura drive te pawh hi chu zat chu tan lo teh u tih te pawh hi awareness atan kan Minister zahawm tak hian ruahmanna rawn siam se chuan keimahni ah pawh khang ang harsa tak tak te chhawmdawl nana sum tam tak awm reng si kha kan tangkaipui ngei pawh ka'n ring a. Chutah chuan tuna kan sum neih atanga a kal dan ah hi chuan cess hi 12% vel te chauh kha member te hnenah khan a la kal a ni a. Tin, chutih lai chuan tuna Assembly-a zawhna ah phei kha chuanin member zawng zawng tanpuina dawng tawh hi 16672 an awm tawh tiin zawhna kha min rawn chhang a kan zawhna in tawm ah hian. Pu Speaker, Starred Question No. 125 leh 126 a kan zawhna intawm a chhanna kha a ni a. Beneficiaries awm zawng zawng hi 16,672 a ni

a, chutih lai chuan 18th Nov, 2014-a Starred Question No. 75-naah hian chhawm dawlna hi mi 17092 in an dawng tawh tih a ni leh bawk si a. Helai hi kan fimkhur tawk lo ni te pawhin a lang a, chuti anih chuan a hmaa dawng tawha an sawi leh tuna dawng nia an sawi hi 420-in an tlem daih zawk mai a, pung zawk awm tak a nih lai khan a pung tlat lo a ni. Chuvangin heng ah hian fimkhur a ngai khawp mai a.

Tin, he inhlawhfa te chanvo hi inhlawnnaa eizawng ten a hming an tum ringawt mai hian a lang a, midang in a hlawkna an tel a chuvang chuan a nihna angin tun hnu ah chuan dik taka kalpui ni thei sela. (Interruption by Speaker) Pu Speaker, ka'n sawi zar zar ang e, kan House Leader demand a ni bawk a.

Demand no. 39-na Power & Electricity ah hian tan lak a ngai khawp mai a. He House-a kan that ve tirh atangin mega watt 30 hi kan la pel miah lo mai a, mega watt 28 vel hi a ni reng mai a. Chuvangin hemi ah hian theihtawp chhuah a ngai a Aizawl khawpui leh hmun dang ah pawh transformer mamawhna a sang zel a, mihringin kan nitin khawsaknaah pawh power kan mamawhna a san zel avang hian transformer hi ngaihtuah belh zel a pawimawh a.

Tin, chubakah chuan Aizawl khawpuiah thirhrui inthlung hi a hnawk em em a, hengte hi aereal bunching cable an tih ang te pawh khan thlak dan awm se a that ka'n ring a.

District Council Affairs kha kan han ngaithla a. Tunah hian kan MDC bial tih tet te kha i dinglam atang te khan an rawn rawt te pawh kha a ni a. Amaherawhchu, demand no. 27-naah hian kan District Council thenkhat te erawh hi chu reformation a ngai a ni ti a Saiha bialtu zahawm takin a sawi kha a dik ka ring a. Khati taka an lo tawp a nih chuan thla thar lawk ah hian mipuiin an rawn reform mai tur ah ka ngai a. Tin, Burma Khaikhy atanga Burma lam kawng te pawh SPA sum in kan lai a Burma lam kan han laih sak vak a, a thawktu te hi sawlaia nihna sang tak tak nei, dinhmun pawimawh tak tak nei te an ni leh lawi bawk si a, a fel lo khawp mai. Tin, District Council fencing te, garage te leh Children Park ang chi tea hna thawh hmuh tur mumal awm si lo te kha a tam em em mai a. Tin, sum a nihna tura MADC sorkar-a ruahmann pek si hman tak loh kha a tam khawp mai, chuvang chuan kan inenlet a tul khawp mai.

Demand no. 13-na DP & AR-ah khan MPSC-in staff nurse lak tura a tih fel vek tawh procedure lapse kha enge a chanchin ni ta zel? Nurse kan indaih lova,

damdawiin tin leh PHC te, CHC ten an mamawhna a sang a, a chanchin kan House Leader-in min hrilh theih chuan a lawmawm in ka ring a. Tin, proposal a lut chak lova, creation of post ah khan kan chak tawk lo a ni kan ti a, a dik in ka ring a. Chutah chuan a bik takin technical engineer te, vety doctor te leh medical doctor te demand a sang a. Khang ang te ah pawh khan ngaihtuahna kan hman chak a tha in ka ring a.

Demand no. 15-na GAD ah hian Mizoram House Imphal-ah emaw Churachanpur-ah emaw hi chuan neih hi a hun ve ta khawp mai a, a hmun kan nei reng si a chung te chu ka'n sawi duh a. Tin, Airport Terminal te khu air condition dah te hi a rem ve tawh lawm ni? Kan ram a lum telh telh si a tih hi ka'n sawi tel duh a.

Tin, Aizawl to Imphal tunah hian a awm ta lo niin ka hria a, ka hriat sual loh chuan. Mizo hnathlakte khawsakna tam ber state ang chuan Manipur hi a ni. Helaiah hian tih dan kawng ngaihtuah a tul tak zetin ka hria a.

Demand no. 11-na SAD-ah khan Pu Speaker, kan Secretariat-ah sawn solar plate a chungah sawn kan dah vak mai a. Mahse kan hmang tangkai leh lo niin ka hria a. Khawvelin renewable energy lamah tan a la a. Sawtiang a nih si chuan tan laka a thalo a nih pawhin siam thata, tangkai zawka kan hman a tulin ka hria a.

Tin, nichin khan kan Parliamentary Secretary zahawm tak khan CCTV an mamawh thu kha a rawn sawi a. Kan Home Minister hi a chhuak hlauh mai a, no-confidence motion a move emaw ni chu aw ka ti a. Remna leh muanna kan nei a ni tiin CCTV dah a tul leh si a. Khalai kha a pawi khawp mai a, dah sak thuai chu a tul a. Amaherawhchu, chutih lai chuan kan Secretariat pui berah pawh sawn kan CCTV hman lai saw nimin lawk khan a chhe tlat mai a ni. Saw laiah sawn mi chitin chitang kan lut chhuak a. Chuvangin, saw saw chu siamthat theih ran ni se a that kan ring a.

Tin, Environment & Forest chungchangah khan sawi tur tam tak a awm laiin hun ka nei tlem si a. Nungcha humhalh chungchangah Mizote kan thangharh ta khawp mai a. Camera hmangin sava te kan veh ta a, a lawmawm khawp mai, changkanna chi khatah ka ngai a. Hemi kawngah hian NGO te nen pawh tan kan lak a ngaiin ka hria a. Ram dangah te kan kal a, nungcha te, sava te hmuh tur tam tak a awm laiin Mizoramah chuan sava hmuh tur te, nungcha chi

hrang hrang hmuh tur a vang em em mai a ni. Hemiah hian tan kan lak a, sarep te pawh hi tui kan tih loh ngam hi a hunin ka hria. Chuvangin, hemi kawngah hi chuan theihtawp chhuaha tan kan lak a tul tak zet zet a ni.

Pu Speaker, point pakhat chiah, nichina ka hmaa sawitute khan min lo tibuai zauh zauh a. MLPC Act, 2014 kan han hmang a. Chutah chuan kan dinhmun zawng zawng kan hria a. Hei hi kan demand pawn kan House Leader zahawm tak a ni bawk a, rehabilitation bawk kha ka rilruah chuan a awm a. Sethawnah te hmun kan nei a, tlawmngai pawl hrang hrangten rehab centre te, home leh centre ang ten min han kal pui a. Hetah hian sorkar atang pawhin recognize a nih theih loh lai te pawh a awm thei e. Hengah pawh hian a tih dan kawng kan ngaihtuah loh chuan rehabilitation tha kan neih loh avang hian heng mite hian enkawlna an dawng lova. Tuna kan centre hrang hrangte kal dan hi endik ni sela chuan kan tlinglo mai thei. Amaherawhchu, mipui mamawhna avangin heng ang chi hi kan ngaihtuahnaah chuan a awm a tul khawp mai.

A tawp bera kan sawi duh chu General Administration Department-ah bawk khan district hrang hrangah Planning Board te, Development Board kan tih ang chi te kha kan han ti a. Amaherawhchu, hun engemawti atang kha chuan kan kalpui mumal thei ta lova. Chu chu kalpui leh theih ni ta sela a tha khawpin kan ring a. Chutah chuan a bik takin Lunglei High Power Committee kan han siam a, power & function of High Power Committee kan han en a, fund allocation chungchangah hian 1% hi State Annual Plan atangin siam tur/ruahmanna siam tur angin sorkar notification-ah hian tarlan a ni a. Amaherawhchu, kha pui pui kan theilo a nih pawhin khalaia Lunglei District hmasawnna turah te, district dang dang hmasawnna turah pawh hian Development Board te kan ruahman thiam a. Tin, chutih lai chuan decentralization of power kan han tih ang chi-ah pawh khan ngaihtuahna kan sen loh chuan he ram hi thangharte chenna tlak zel leh helaia Aizawla inhung bik anga mite min hmuh fona kha a bo theihna turin thingtlang zawk leh mamawhtute zawkin hmasawnna an hmuh ve theih zawkna turin chumi kawngah chuan tan lak a tul tak zet zetin ka hria. Chungte chu kan sawi ve a ni e.

SPEAKER : Pu T. Sangkunga.

Pu T. SANGKUNGA : Pu Speaker, ka lawm e. Vawiinah kan House Leader demand pawimawh tak tak kan sawi hlawm a, kan sawi dan a ngaihnawm a. Ka tui zawngte rawn sawi ve ka duh a.

A hmasa berah chuan Soil & Water Conservation Department, demand no. 33-na hi nichinah Pu R.L. Pianmawia'n ngaihnawm takin hman tangkai an tul zia a rawn sawi kha ka support em em a. Department tam bera technical officer-te leh officer pawimawh tak takte (man-power) an indaih loh laia Soil & Water Conservation hna a tam lo hi ngaihtuah a ngaiin ka hria a. Hna pek belh hian post fill-up belh ngai lutuk lovin tangkai taka hman theih tur niin ka ngai a. Hei hi kan Leader-in min hriat sak se ka duh khawp mai.

A dawt lehah chuan Minor Irrigation hi hman lawka Agriculture Department atanga indang, thang chak tak an ni a. Agriculture leh Horticulture ramah pawh tui tel lovin hna a thawh theih loh.

Mihring hi tui tellovin kar khat bak a nun theih loh a, chaw tel lovin thla khat a nun theih. Tui hi thlai leh ramsa zawng zawngin an mamawh a nih avangin Agriculture-ah pawh, Horticulture-ah pawh vegetable ho reng reng hrallh tla leh hrisel nei tur chuan tui tam tak an mamawh a ni. Hmun tam takah chuan tui an ngah tawk lo. Minor Irrigation hi Agriculture atanga an indan tirh khan Ministerial Staff phei chu an nei mumal lova. Directorate-ah phei chuan Assistant pakhat chauh an indan pui a. Zawi zawia tihlen an ni a. J.E. an indaihlo lutuk avanga project an dil that ngam loh a tam mai a. Anni hi hriat reng a thain ka hria a, kan sawi vak a ni e.

A dawt lehah chuan Power & Electricity Department demand hi sawi ka duh a. Serlui an khuah dawn khan tuna kan House Leader beihna avang hian a khuah hna tan tepin a awm a. Mahse MNF leh India karah remnate lo awmin, lalthutthlengte ken zawkah khan compensation tihpun tumin ram neitu thenkhat ten an bei vak a. Project cost san lutuk avang khan tih zui a ni ta lo niin ka hria a. Sorkar a lo inthlak leh a, Pu Lalhmingthanga, khatih laia Power Minister khan a project cost tam dawn mahse 100% state ta tur a ni a tiin a project cost tam tur pawi ti lo khan a kal a. Hei hi a dik ta riauvil ka hria a, S.H.P hi tha ta riauvil ka hria a, 25MW chin hi small hydel power a ni a, za a za kan chang tlat mai a. Entirnan -

lui lian deuh pawh khuap ila 12% emaw chauh kan chan kha chuan kan chan kha a tlem tlat mai a. Chuta ka'n sawi luh duh chu Tuirini small hydel power hi 24MW tur a ni a, a power tih chhuah cent percent kan ta a ni dawn tlat mai. 25 chin kha small hydel power a nih avangin MNRE atangin tanpuina crore tam tak a hmuh theih si a. Brazil, Russia, India, China leh South Africa inzawm khawm bank BRICS te hian loan lak an phalsak sa crore 465 pung tlem em em mai a awm bawk si a. Heta tan hian hma la ta ila mega watt 24 kan neih belh mai kha chuan kan hlawk em em dawn a ni. Tuirini hi Serlui experience atang hian a tha dawn awm mange aw tih ngaihdan ka nei a ni.

Tin, Khuangthing bula Tlawva S.H.P hi contractor in a tih that loh avangin a hun a liam a, tender approved atanga kum hnih chhunga NABARD loan dil belh loh a nih avangin a lo harsa tawh bawk si a. Tunah hian tawl mai thei dawn te in ka hria a ni. Khuap puitling se chuan Champhai district-in fur vanglaiin engah an tla tawk ang a, E.Tuipui constituency pumpui phei khi chuan thal vanglai pawhin engah an ring thei dawn a ni. Heng a nih avang hian an revised estimates hi approve a, HMRE ah te pawisa zu dil leh a, NABARD-ah te pawh crore engemaw zah puk di ila, 52.50 lai lo sen tawhna a nih avang hian crore 12 han tih belha tangkai tak tur a ni. Hmunpui zawk lam atanga hmun danga power pek kawnga transit lost te awm ngai lova khawchhak lam tan hman mai theih a nih avang hian R.E. hi approve a nih chuan sum dap dan hi a awl dawn a ni. Hei hi kan House Leader hian min hriatsak sela ka duh khawp mai.

A dawt leh ah chuan Tuirial Hydel Power siam mek hi House Subject Committee-I in kan zuk en a, a ropui kan ti khawp mai. I veilam amite pawh khan ropui an tihzia kha an hmelah a lang reng a ni. Project tawl tawh tur hetianga ropui taka rawn din chhuah leh a ni hi ka lawm hle a ni. Ka sawi tum tak pakhat chu Group A officer Mizo te kan hmu a, Tuirial khuah tura kan Leader ruahmannaa anga a tam thei ang leilung fate lak kha kan tui pui a.

Central YMA-a ka President nih lai a ni a, Central YMA te pawhin group 'C' & D ah Mizo vek la turin NEEPCO kan nawr a, an Chairman P.K. Kakoli kan hmin thei ta a. Ni 15-18 Sept. 1999 khan J.E. 16 lak turah Shillong-ah an interview a, Mizo thah 150 an interview a. J.E. Civil 10 + Mechanic 6 = 16 an la ta a ni. Hmanni-a kan zuk

kal chuan an vaiin Group A an lo kai vek tawh a, “Hmun hrang hrang ah kan awm a, kan lawm khawp mai” an ti. Ka sawi tum chu railway a lut dawn ta a, kan House Leader chakna leh rem hriatna avangin Rail-way Station leh office te an sa dawn a. Hengah hian thawktu Group C & D Mizoram mi 100% han dil leh phawt ila ka duh a ni, NGO nawrna te pawh a pawimawh em em a ni.

Tin, Vety College-ah pawh clerical staff leh Group ‘D’ staff 100% Mizo vek kan lak tir a. Railway-ah pawh hman deuh Maharashtra-ah chuan an state-a thawk tur exam-ah khan Bihari ho that an awi lo. NGO te pawhin theihtawp kan chhuah loh chuan Railway -ah hian Mizo kan la tlem a ni. NEEPCO kan sawi pawh hi ‘Mizo an la awm lova min lak sak rawh u,’ tia kan nawr vanga la ta an ni. Chubak chu NEEPCO-a thawk Mizo an la awm mumal lo reng reng. Tun anga NGO hmang thiam sorkar hi ka la hre lo reng reng a, heng railway te leh project hrang hrang kan neih thara thawk tur te, Tuivai khuah te pawh Tuirial ang bawka Mizo officer 16 tal kan lak leh chuan a hlawk em em dawn a ni. Tuirial atangin lesson zirtur a ni in ka hria.

Demand no.45-na PWD hi an project hi a rura lutuk a, World Bank Road Lengte to Bungtlang South Multi Model thleng phei chuan ` 2500 crore man a ni. National Highway laih tur atan pawh crore 620 man tih te, crore 260 tih te a tam mai a. Tuna kan House Leader hruaina ah Aizawl-Thenzawl-Lunglei World Bank Road an approved a, an thawk hman ta lova, Referral Hospital pawh saw sanctioned thlengin kan ti hman vek a, hna sem chu MNF & P.C sorkar tih a ni. He kawng laih hna tuna World Bank Road/National Highway laih tur ang hi a tiat lo a. Mahse, contractor singkhat kan mamawh belh a ni,” tih kha a ni a. Khatianga chhut chuan contractor kan mamawh belh hnem awm ve aw tih kha zu ngaihtuah theih a ni. A list tlem te, a amount pawh hi crore 14453, tuna ka list nen hian ziak khawm ta vek ila World Bank leh chi hrang hrang atanga kan hmuh project tamzia chu, Adama siam atanga vawiin thleng hian hemi zahve hmuh kum hi Mizoramah a la awm lo reng reng. Chutiang khawp chuan kan House Leader hian a su chhuak tam a ni. Chuvangin hemi thawk tur hi chuan quality kan duh bawk si a, mihring indaih ngaihna a awm lo reng reng a. JE 127 ruak atang te hian

minimum tal hi fill-up nghal loh chuan quality a awm lovang tih kha a list atanga ka rawn sawi duh a ni. Chumi dawt leh ah chuan co-terminus hian fill-up nual a tha ka ti a, co-terminus thatna chu project a tawp khan an tawp mai dawn a. Regular-a kan tih teuh chuan nakinah keimahni tan phurrit a nih phah a hlauhawmin ka ring deuh a, mi an tam chuan thil kan lo demand tam zel a, hei hi chu khawvel awm dan phung a ni a, chuvangin co-terminus-a lak hi tha in ka hria a. Hetiang zah hna thawh tur kan hmu hi a lawmawm em em a. A list hi chhiar chuan a rei dawn lutuk a, ka bialah ringawt pawh khian tuna PMGSY-ah kan House Leader hmalakna an rawn sanction hi a tam ka ti a, chungte chu Leithum-Bungzung pavement, work order a chhuak tawh a, Khuangleng atanga Lianpui pavement work order a chhuak tawh. Tin, Mualkawi atanga Hruaikawn kawng thar laih tur tender an ko mek a; tin, kan mamawh em em Khuangthing-Thekpui kawng thar tender an ko tawh bawk a, Leithum-Vangchhia pavement an rawn sanction tawh bawk a

Ka bial kha a tamna bial a ni chuang lo. Khatiang khawpa hna an han su chhuak theih mai hi he lama sorkar leh khulama sorkar thuhmun a lo pawimawh loh zia a lang. Tunhma kan thu rualpui UDA hunlaia let aia tam kum khat chhunga project a lo chhuak hi a mak hle. Tuna DPR siam an phal sa, DPR rawn siam fel rawh u an tih ringawt pawh hi a tam leh hle bawk. Chuvangin kan House Leader hi chhuanawm ka ti a, lawmthu ka sawi pahin chu chu ka sawi duh a. Chumi pah chuan min tih fuh sak loh leh thin erawh chu Tuipui – Khawbung, Dungtlang – Kelkang road kawng hlui han black top mai tur NABARD loan kan tih khan chhimlam, Chawngte kawng a chhe em mai tiin an chhuh a, He kawng hi JAIKA project number one-a thlan a ni a, kan lawm em em a, JAIKA hna chu ala rei dawn a, chumi chhung chuan khilai khi chu min han black top sak ve se, PWD officer fel tak takte pawhin min lo chhinchhiah sak in priority min pe se, khaw dang kawng an lai sup sup a, a main road ber a dum thei lo hi pawi ka ti a, min han hriat sak se tih ka sawi duh a.

Tin, Aizawl khawpui siam that UD & PA leh PWD in an tih lai khan YMA President angin member in ka awm ve a. Pu Chawngkunga kawmthlang, Pu Zoramsangliana te in hlui peng, han rawt hniam hlek a, tuna hetia kan kal kual chhunga motor jam teuh teuh bo mai tur khu kum 20 kal ta ah pawh an chhinchhiah tawh kha

siam ve turin ka rawt a, a sawt lo. PWD leh UD & PA hian min lo chhinchhiah sak se ka duh khawp mai.

SPEAKER : I hun i hmang zo.

Pu T. SANGKUNGA : Pu Speaker, tawite tak tak, ka sawi zo tep tawh a, department pakhat chauh sawi leh ka duh chu chu LE&IT a ni. LE&IT ah hian kan Minister kal ta kha a fel bawk a, Youth Commission leh Welfare Board te nen thawhhona a tha a, pawn lama keini pathum in training tur kan tir chhuah ringawt kha ka hriat chinah 3602 an a ni a, Mizoram-ah 2554 a ni a, a vaiin 6156 training kan pe hman a, Zoram pawn training hi chu hna hmu lo tlemte an ni. Cabin crew-ah te khan mi 16 lai in an hmu a. Tin, tunah hian hmalakna pawimawh tak tak kan House Leader-in a rawn nei mek a.

Ni. 11/4/2017 hian cruise liner-a thawk tur leh Gulf rama thawk tur MYC office-ah lak leh tur a ni a. Hei hi thalaiten an ngaihven a tha hle ang. Advertisement an chhuah tep niin ka hria a. Tin, Jet Airways leh Indigo te, Spice Jet ten an rawn la thin a, ni 26, April-ah hian Jet Airways in MYC office-ah Cabin Crew an rawn la leh dawn a, kha pawh kha lo practice deuh a ngai ang, interview tur tan inchei dan leh thawmhaw inbel dan thlenga in ready a ngaih avangin. Pu Speaker, ka han dil hram na che pawh kha, kan thalai hna dil duh te tan khan a pawimawh dawn a ni. Tin, reilote ah New York University te nen tangrual in Youth Commission office-ah khawl an rawn bun ang a, zirtirtu hlawh an rawn tum ang a, a senso an tum vek ang a, Mizoram Youth Commission-in thalai te an hui khawm ang a, a lo mobalize ang a, an train zawh ah Gulf rama thawk turin Dubai-ah a ni tlangpui ang a, khanga thawk tur kha post 400 lai a ruak e an rawn ti a, khang atan khan thalai tam tak an duh dawn a, a tlangpui in Higher Secondary pass chin a ni a. Khang atan khan advertisement awm hma pawh in kan lo in rin tha in ka hria.

Heng hna chi hrang hrang atan hian mahni tui zawng en a dil tur a ni. Gulf rama thawk tur tan passport neih a ngai a. Passport an dil vat vat te pawh kha a tha a. Tuna tui lem lo pawhin passport an lo dil ve hrim hrim hi a tha a ni tih te pawh hi hria sela. Chung chu Pu Speaker, kan sawilang tel hram duh a ni.

Tichuan vawiina kan House Leader-in a demand rawn pharh te hi kan pass ngei theihna turin ka rawn support a ni e, ka lawm e.

SPEAKER : Pu Lalrinliana Sailo.

Pu LALRINLIANA SAILO : Pu Speaker, ka lawm e. Tun session hi ka hritlang tlat mai a. Aw then leh engemaw tihsual palh pawhin min lo ngaidam dawn nia. Chief Minister zahawm tak demand hi ka rawn support a. Chutihrual chuan P&E, demand no. 39-ah ka'n kal ang a, lawmthu sawi ka duh a. Khawhai-ah te, Sialhawk-ah te sub-station inhnaiah te teah min dah a. Tin, tunhnaiah Integrated Powers Development Scheme atangin nuai 700 chuang Khawhai-ah min dah sak leh a, tender te pawh an chhuah tawh niin kan hria a, kan Chief Minister chungah hian kan lawm tak meuh meuh a ni.

Pu Speaker, session hmasaah zawhna hun awmlaiin min rawn tihtawp sak a. Khata kan inhnial hrepnaah khan CM in a lo hre em em mai a ni tih ka ring a. Riangtlei kawng kum 13 ka aupui tawh ka tih kha. Tunah chuan Riangtlei kawng formation cutting an tender tawh a, lawmthu han sawi loh chi a ni lo, kan lawm em em a ni. Tin, Tlangpui kawng te, Vangtlang kawng te black top turin tender chhuah a ni a, Khawzawl atanga Neihdawn te pawh, kan lawm tak meuh meuh a. Kan House Leader leh department chungah lawmthu ka sawi tak meuh meuh a ni.

Chutihrualin khawvelah lawmna a kim thei si lo tih kha kan la sa deuh! Tuikum bialtu zahawm tak leh Aizawl 'W' I bialtu zahawm takin an sawi Khawhai leh Lungpho inkar kha, heliaih pawh kan sawi tawh thin a. Lawm deuhna ka neih chu MNF hun ti mai ila, (a mawilo zawng ni lovin) MNF term hmasaah khan kan sawi nasa ve tawh a, a lang thei lo va. Tun term ah pawh hian ka sawi a. MNF hunlaiah khan an beng an chhu ngawng bik loveng, amaherawhchu a rem lo a ni. I veilam ami member zahawm tak ten min han sawipui a. Khilai kawng khi kei pawhin vawi tam tak ka sawi tawh a. A tul tak meuh meuh in ka hria tih kan sawi tawh thin a. Hemi Saitual kawng lam an block chang te hian khilai kawng khi chhuak chho se chuan a tha em em a ni.

Tin, Pu Speaker, khimi Sialhawk, Khawhai vel lai khi ram vanduai deuh mai kan ni a. Aizawl pan dawn hian Sialhawk chuan chhimchhak zawngin an han zin chhuak phawt mai a, Biate-ah, Lungdar-ah. Khawhai lam atanga kal dawnin hmarchhak zawngin Chawngtlai lam an pan chho ngar ngar a, tiang khan a rualawh tlak em em mai a, kual tak a ni. Chumai a ni lo a, Khawbung leh Myanmar kawng thlengin alternative road hi a pawimawh a ni tih hi he House-ah hian ka vawi 4 sawina a ni a. Hei

hi kan Chief Minister-in min han tih sak leh se kan lawm ngawt ang. Amah pawh hi Khawhai-in centenary kan lawm in tlang atangin kan thlir pui tawh a. Khilai khi hnai te a ni a, East, West corridor mai bakah missing link, han dawhzawmna tur khian khilai khian kan mamawh in kan ngen tak meuh meuh a ni.

Tin, Pu Speaker, han sawi tel ve ta ila. Kan Chief Minister ring em em tu khua Lungtan hi (tum 3 kan han din veah hian party dang zawng zawng belkhawm pawhin kan Chief Minister party Congress hi an la zat ngai lo reng reng a ni) chawimawi pawh a ngai ve ngawtin ka hria. Chutiang bawkin Khawhai chu engtiklaimah khian kan han din ve hnu ah party dang belkhawm zawng zawng hian kan Chief Minister kaihruaina an rin avangin Congress an la zat ngai lo. Chutiang bawkin Vangtlang-ah a ni bawk a ni. Khilaiah khian khaw 5 vel khi party dang zawng zawng belkhawm pawhin Congress la hneh ngailo inbawkkhawm lai a ni a, han hriat te pawh a tha ngawtin ka hria a, kan sawi nawn leh a ni, kan lawm a kim theih nan.

Pu Speaker, demand no. 33-na hi an sawi a, climate change hian khawvel a tidanglam a, kan hria a. Nikum khan ka hriatsual loh chuan, ka chhinchhiah dan in November ni 14 thleng khan ruah a sur a ni. Kumin pawh hi lo hal thei lovin khua hian awmzia a nei tawh lo reng reng a ni. Chuvangin kan lei te a lo hmin ang a, kan lui luan dan engkim mai te hi a in sawn neih nuaih dawn a. Chuvang chuan Soil & Water Conservation Department hi tuna an awm dan aia hman tangkai zawk hi a ngai hle in ka hria a. Pu Speaker, anmahni hian training tha tak tak te lo neiin, Indian Institute of Soil & Water Conservation, Dehradun-ah te pawh Watershed Management leh thil chi hrang hrang train khan an lo kal thla thin tawh a. Chuvang chuan tuna an awm ang ai hian, ka'n ngaihtuah a Director-ah pawh hian IAS tih te, MCS tih te, mi efficient tak tak an awm thin a, Indian Forest Service tih te pawh an awm thin a, Agriculturist te. An staff-te pawh hi an scope ti mai ila, an hnathawh hi hetiang engineering line lampang hi a ni ve teuh mai a, hei hi a pawimawh in ka hria. Phai ramah kan kal a Soil department hi an hmang tangkai khawp mai. Chuvang chuan he ram hian a mamawh thar leh in ka hria a, chu chu ka'n sawi lawk a ni.

Pu Speaker, demand no. 28 - Labour & Employment-ah hian sawi tur a tamin ka hria. Tunlaiah CESS chungchangah leh Welfare Board chungchang ri a tam em em mai a. Khi lamah bial lamah kan kal a, hmanniah PRISM-ah ka va kal a, ngamtlak an

ni hlawm bawk a, Chief Minister leh keiniho kha bang turin min lo ti a ni awm a. ‘Kan ban chuan in bang ve khawp ang,’ ka ti a. ‘Engati maw?’ an ti a. Kei chuan, ‘siki pawh hi he department atang hian ka la pawtthla lo. Kum 5 ka enkawl a, siki pawh hi ka ei an hre lovang. An hriat chuan ka in leh lo zawng zawng leh engkim ka pe ngam. Politic pawh ka chawlhsan ngam,’ ka ti a ni. Tin, Welfare Board kan din a, ka chhungkhat, thisen zawm emaw pakhat pawh ka dah a nih chuan, ka va ti a ni. PRISM hi thil an ti tha a, thil tha pawh duh hle in an in sawi a. Ka lawmpui khawp mai, anni pawh hian 1.5 lakh zet chu an lo ei ve a ni, chutiang chu a ni a. Amaherawhchu anni chu management an thiam a, ka fak khawp mai. Kan thenawmah sawn in saw ` 25,000/- in an luah a. Furniture leh thil tha tak tak hi an nei teuh mai a. Management in va thiam awm ve, khawi atanginnge in manage aw! ka ti a. An chungchang chu sawi vek lo mai ang.

Pu Speaker, Building & Other Construction Workers Welfare CESS Board hi a lo dinchhuah dan leh a bul tanna te a harsat teh lul nen, tunah hian kan chhuah chhe dawnin ka hria a, ka ui ve deuh a. A dik tak chuan kan Chief Minister kaihruaina hnuaiah kan mi in i bei ve, min ti ta se ka tang vak bik in ka ring lo. 2009 January ni 7-ah Chief Minister zahawm takin charge min pe a. Tichuan ni 29 ah central-ah kan zuk feh chhuak nghal a, L&E Secretary chu Sudha Pillai a lo ni a, G.K. Pillai nupui. Tichuan kan han lut a, ‘Ka pi, ni 21 a upa Minister ka ni a, engmah ka hre lo,’ ka ti a. Protocol-ah chuan ka pi tur a ni lo, mahse a retire tep tawh tih ka hria a, kan ram tan ‘Ka pi’ ka zuk ti lui a. Tichuan, a thawhpui zawng zawng Director General, Jt. Secretary, Dy. Secretary te leh Section Officer thlengin a ko khawm ta a, ‘Young dynamic Minister a lo kal a, a hriat duh zawng zawng hrilh rawh u’ a ti a. Tichuan, ‘Welfare Board in din a ngai,’ min lo ti a, ka hrethiam lo a ni. ‘RSBY pawh in tih a ngai,’ a ti a, hei pawh hi ka hrethiam lo a ni. Tichuan, vanneihthlak takin election laia observer, IAS pachal senior Sarda Prasad-a kha alo awm hlauh mai a. Khilai Khawzawl velah vawi 2 vawi 3 meeting-in kan awmkhawm a, kan innel nghal a, lawmawm ka ti hle a, Pathian remruat te pawh a nih ka ring a ni.

Tichuan L&E hi nasa takin kan sawi a, a tawpah kei mithiamlo ta chuan, ‘in thil sawi hi a technical em mai a, Aizawl-ah lo kal mai rawh u,’ ka ti a. Tichuan 29 January-a kan request na chu March ni 6-ah a rawn tihlawhtling a. Tichuan RSBY meeting kha India hmarchhakah a hmasa ber turin a rawn ti ta a. Tichuan K.L. Sahni,

L&E-a Secretary thin kha a lo kal bawk a, khulaia Secretary member thin kha. Tichuan Chief Secretary a rawn hmu a, ani khan, ‘hei hi mandatory a ni a, in tihloh chuan in state Chief Secretary in a tuar ang’ an ti a. Chutiang chuan harsa takin kan din a, a din dan pawh a harsa khawp mai, thiam leh hria kan awm si lo. Tichuan, Chief Minister-te rawnin leh anmahni kaihruaina hnuai-ah, mithiam nia kan ngaih Pu Darsiamliana rawnin kan zu pawt chhuak ta ringawt a, harsa takin DP & AR te’n min dang min dang a. Tichuan Dr. Para, L&E ami tho kha RSBY enkawl turin kan la chhuak leh a.

Chutiang chuan a din dan pawh kan thiam lo, Labour Management-a Master Degree hmasa ber nia kan hriat Pu Francis Lianmawia kan tahawh ringawt a, Polution Control Board atang khan ‘min tan pui teh le,’ kan han ti a, thiam kan awm chuang lo, kan Secretary te pawh an buai khawp mai. Khatiang khan kan ti ngat ngat a. MYC te pawh hi MNF khan ram hmangaih takin an lo din a, a tha e. Amaherawhchu, Sports & Youth Services-ah an dah a, scope a awmlo a ni. Tichuan MYC Sports department atang khan 2% pawh a awm theilo reng reng a ni. Skill development initiative kha Pu Manmohan-a ministry khan nasa taka rawn kalpui a tum a. Chutiang chuan, ‘India hian kum 2020-ah chuan 500 millions skill labours kan nei tur a ni,’ an ti a. Khami engah khan Chief Minister te nen kan han ngaihtuah ho a, Cabinet-in MYC kha Sports atangin L & E-ah a rawn dah ta a ni.

Pu Speaker, i veilam ami te pawhin hria se ka duh em em chu, (hria se ropuina Lalpa hi an khengbet lovang tih ang deuh in) khatiang taka CESS tih dan kha an la hre si lo, an han ti an han ti a, an han zir an han zir a, kum pawh a lo liam ta a. January ni 18, 2010-a order rawn chhuakah phei chuan, chu chu Supreme Court order a ni a, he mi a chhuah ni atanga thla 3-ah Board hi din ngei ngei tur a ni tih a ni a. Tichuan an han din ta a, an din nain technical lam chu a la har khawp mai. Pu Speaker, vawiin tleng hian a fel-fai bikin ka ring lo. Mizoram University mithiam rual, Doctorate degree tam tak nei awmna pawh kum 2001 atanga tan, vawiin tleng pawhin a la fel-fai bik lo a ni. Chutah chuan thiam lo na na chuan bultannaah phuai deuh chu a awm maithei, amaherawh chu kan theihtawpin kan kalpui a ni.

Chutichuan, CESS kha kan la ta a, (a tawi zawngin) chu chu Chief Minister leh tute bial emaw an ti vak vak an rawn tih hi hria se ropuina Lalpa chu an khengbet lo vang ka tih nachhan a ni a. Kan Chief Minister-in a hre lo reng reng. Pu

Speaker, helaia term hmasaa MLA tling tawh zawng zawng kha chuan an hre vek, khatih laia MNF MLA zawng zawng khan a tha an ti a, an pawm a, kan bial ah min tih sak rawh u an ti a ni. Registration kha kan ti thei lo, a chhan chu Doordarshan ah, a tawi zawngin print leh electronic media zawng zawng ah kan advertised a, mahse, register tur kha kan hmu thei lo a, kan mang a ang a, Trade Union kan ruai a, an han feh chhuak ngial a, registration an ti thei lo. YMA te, NGO zawng zawng kan ti a, chutah opposition MLA te recess room-ah kan va kal a vawi tam tak. Tin, he House-ah ngei hian vawi tam tak ka sawi tawh a ni. Chutichung chuan register tur kha kan hmu thei lo a ni. Kan staff te khan sawtah Maubuang, Kelsih leh Sihphhir thlengin an campaign a, Sihphir-ah phei chuan lungin an lo vawm lo chauh a ni. Tichuan, engtin nge kan tih ang aw, kan ti a. District tin ah kan intir chhuak leh a, Trade Union ho zawng zawng nen, chutah pawh registration kan hmu lo a ni. Kan Minister bial ah i tan ang an ti a, ka bial ah kan kal a, Sialhawk-ah, Biate-ah, Pi OP-i bial ah, mahse registration kan hmu thei chuang lo. Khawzawl-ah kan officer ten Hall an hire a, YMA President pakhat chiah a kal a ni. Kan mangang khan Pu Lalduhoma MLA zahawm tak helaia thu kha, ani hi a aw ki te a tha a, kuthnathawktu te hmangaihtu a ni bawk si a, kan ti a, kan zuk ngen ta tawp a. Pu Lalduhoma hoin a bial ah kan zuk campaign nasa a ni, nisensa hnuai ah. Chutiang khawp chuan kan bei a, mahse register tur hi kan la hmu chuang lo a ni.

Tichuan, ‘Chief Minister ber bial ah i bei leh ang u,’ kan ti a, an kal leh a, an ti thei leh ta chuang lo a ni. Trade Union ten, ‘hma kan han la ang e,’ an ti a, tihluih nain register tur tlemte kan hmu ta chauh a ni, chutiang chuan khang register kha tuna Children Education Assistant kan pek hnu khan mi in an rawn ti ta tuam tuam chauh a ni.

Kum 2012-ah ‘pawisa tam deuh sem rawh u, sem rawh u, hei hi a percentage in sem rawh u,’ min rawn ti tawh bawk si a. Semna tur in register kha an awm bawk si lo va, kan hah em em mai a. Tichuan Pu Ramhluna te, Pu Duhoma, Pu Thangtea te ho zawng zawng khan, ‘ka bial ah ti rawh u,’ an ti a, an bial ah special ten an va campaign chung pawhin kan hlawhtling thei lo a ni. Ama’rawhchu effort an pe leh a, an han bei leh tak tak a, Chief Minister bial ah khan, ‘Chief Minister policy a ni a, ama kutchhuak a ni a, engatinge in tih loh’ an ti a, chutiang chuan bial hrang hrangah an ti ta a, khati khan a lo chhuak ta a ni.

Chuvang chuan ‘inthlan dawna campaign nan an ti’ tih pawh kha thil tha tih hi kan intihsiaik tur a ni, mahse vaibelchhe 20 dawn kan nei tawh a, central lamin ‘engzatnge in ratio in disburse?’ an rawn ti tawh bawk si a.

Pu Speaker, dik tak chuan quarry a inhlawh lai te lungin an deng hlum a, chung ang nuai hnih an nupui fanau te kan han pe tawp mai chu, an tap zawih zawih mai te, tin, zirlai mangang tak tak, nu leh pa mangang tak tak fate pahnih ah cheng sangli an han la a, mittui tlaa an dawng lai te kha a dik tak chuan kan opposition te leh a tute pawh hian hmu in hre ve se chuan hetiang hian an tih vak vak ka ring lo. Mangan lutuk naah chuan opposition MLA pawh kan ruai pawp mai a, kan ti pawp pawp mai a ni, khatiang khawp kha a ni a. Pu Speaker, Mizo hi thil thar introduce dawn hian awareness inpek a ngai lutuk a ni. Hei hi chiang taka kan sawi chuan an sawi nawn leh ka ring lo a ni. Chuvangin kan mangan zia chu Trade Union pawh SITUM-in nuai 2, FOMTU-in nuai 2, MTUM-in nuai 2, MSU, MZP, PRISM, Tuichangral Zirlai Pawl, a hrang hrang a tam mai YMA thlengin, khatiang khan registration campaign hi an nei a ni. Pu Speaker, he thil hi thil pawimawh a ni a, kuthnathawktute hmangaihtu kan in tih chuan insawiselna chi a ni lo. Tunah pawh hei aia scheme tha hi tih tak takah chuan kuthnathawktute tan hian a tam vak bik lo asin! Kan zuar nasa tawh, he thil ah hian. Chuvangin Pu Speaker, for information-ah Tlunyel, Khawbel, Khumtung, Chhingchhip, Hmawngkawn, khing lai zawng zawngah pawh khian Tuikum bialtu zahawm tak bial ah ringawt pawh hian nuai 47,31,600 kha an sem a ni. Aizawl-ah ringawt pawh hian member zahawm tak Pu Zawma bial ah te, Pu Ruatkima bial ah te, Pu Thanliana bial ah te pawh nuai sawm tam tak kan sem a ni. A nih leh Pu Speaker, heng miharsa ten sum an lo dawng hi kan list ang a, leh an bial ah ‘in thil dawn kha an thik che u emaw ni le’ ka ti dawn emaw ni chu aw! Chutiang zawk chu a ni, itsikna thil a ni. Chuvangin hei hi chu programme tha a ni a, sawi sawi suh se. Mihring ve tho kan ni a, a sawi chu kan in um ve tawh ang. A chhe zawnga an sawi leh chuan kan in um ve tawh ang. (Speaker : I hun i hmang zo nasa tawh a nia)

Chuvang chuan Pu Speaker, Building and Other Construction Worker Welfare Cess chungchanga sorkar hmalakna hi hmalakna tha a ni a. MYC te pawh dik tak chuan tunah hian ka sawi talh duh chu kan CM hi mi zahawm a

ni a, a thalo a nih chuan a sawi ngam a ni, hman dik lohna hlek kan nei, Laodikei kohhran ang deuh hlek khan demna chhe te ka nei tih ang deuh hlek a awm ve. Kan hman dik loh deuh hlek hi a awm a ni, hei hi chu kan Chief Minister pawh hian ‘a hei hi chu a lo dik lo deuh hlek a!’ ti mai rawh se. Registrar te hnena pek tur a nih laiin a ti bik lo a ni. Amaherawhchu Pu Speaker, an tih thatna em em ka hriat ve thung chu ka hma ami ten an sawi a, Pu Sangkunga pawhin a rawn sawi a, zirlaite leh thanghar te leh kuthnathawkutte hmangaihna leh khawngaihna leh duhsakna avangin Mizoram pawnah an thawn chhuak a ni. Khalaiah khan lo dik lo hlek mahse khawngaihna leh duhsakna leh hmangaihna avanga thawn chhuak an ni in ka hria a, kan achievement zel a ni.

A hlawhtlin em avangin opposition hian an kher mai mai a ni. Pu Speaker, press-ah a pawh kan la sawi zel ang chu. Kan awm loh hnu ah thil a lo sual a nih chuan ka hre lo. Khanglai kha chuan ‘bang rawh se’ rawn ti tu hi kan la en ve ang chu ‘de khe ga’ ka ti a ni. (Interruption)

(Pu Lal Thanhawla : Khati khan a hminga ka bial ve ah khan an lo sem ni si kha engatinge min hrilh ve loh a, duhsak zawng te pawh ka lo nei thei a, chungte pawh chu min zawh ve loh le?)

Pu Speaker, khatih lai khan kan Chief Minister hian a hre lo tak tak. West -III a kan sem khan a hre lo tak tak. Chuvangin khatih lai khan pekna pawh a ni lo, kan Chief Minister pawhin a hre lo, mahse register tur kan hmuh ngang loh avang khan ‘Chief Minister bialah ti ila,’ an ti a. Dar rul khai en duh in an dawng ang a, a en duh lo in an dawng lo a ni mai Pu Speaker. Tunah pawh hian a in register apiangin an hmu dawn. Nikumah kan Chief Secretary zahawm tak pawh, ‘CESS hi in sem lova, in sem loh chuan Supreme Court-ah ka ziak dawn che a nia, a bak chu engmah rawn kal chhan ka nei lo,’ ka ti a, chu zawng chu ka sawi a ni. Ka ziak tep a, mahse Chief Minister rawn lo chuan ka ziak lo ang ka ti a, chutiang khawp chuan tunah pawh hian CESS hi a nihna angin kal rawh se. Chuvang chuan hei hi tawp tawh rawh se ka ti a ni. ‘A tha anka nem chu tawk tawh rawh se’ tih ang deuh hlek khan. Pu Speaker, ka lawm e.

SPEAKER : Pu P.C. Zoram Sangliana.

Pu P.C. ZORAM SANGLIANA : Pu Speaker, kan Chief Minister zahawm tak demand hrang hrang 15 te hi a vaia sawi dawn chuan minute 1 te te a ni mai a, chuvang chuan tawi te te in ka'n sawi ang a. Legislative Assembly leh Governor te hi kan sawi ngai vak loh a ni zel a discussion ah pawh hian, keimah ngei pawh hian ka'n sawi a. Heng kan thahnemngaihna thin te hi hmasawnna in a rawn ken tak zel a ni te pawhin ka'n hria a, chu chu a lawmawm ka ti a. Kan Chief Minister demand kan sawi tan dawn ah hian ka rilrua awm tlat chu remna leh muanna hlut zia hi a ni. Vawiina session-a kan that chhung zawng pawh hian mi hrang hrang in kan han sawi te hian mitthlaah remna leh muanna hlut zia a lo lang leh ta a. Hmasawnna atana kan intlansiakna leh kan in vei siak, kan in hriat siak ringawt hi a nilo a, a takin kan kawt buzawlah lo thleng rawh se kan han ti a. Kan hriat chian hrang hrangte, kan hmuh leh duh te kan han sawi tlang dial dial hian remna leh muanna hnuaih lo chuan heng hi a tih theih loh zia te, a hminga zirlai nih ve lai pawha mahni in leh lo ah pawh mu ngam lo-a kan awm thin lai te, pa te ruang thlak zan ngei ngei ah pawh special force ten mahni in-a riak thei lo a min han umchhuah lai te.

Vawiina ka bial lo ni ta Bairabi-ah Mizoram hmasawnna kulhpui ni tura lang, Hydel project ropui tak mai a khuah theih dawn em tiin investigation stage-ah pawh Mizorama motor zawng zawng a liam thla ta emaw ti khawpa buaipui a tih a ni a. Railway Minister te hial lung an phum tir hunlai te, chuta tan chuan hnathawktuten hna an han thawk tan dawn chauh a, three knot three rifle vawi 1/2 emaw ni an puak deuh a, hnathawhna bul min tantu tur, hmasawnna bul min tukpuitu tura kan ngaih te an ramah, an khaw buzawlah an haw vek an ngai ta te han ngaihtuah chuan vawiin ah remna, muanna lo thlenna avanga House-a debate ngaihnawm tak mai han ngaihthlak te hian, a hnukhawiah i ti mai teh ang, a hnuhnung berah kan Chief Minister demand kan han sawi a. Nakina kan Finance Minister in pawisa hman phalna leh thil dang tul te a rawn dil leh tur te nen phei chuan sawi tawh lo mai ila a tha awm mang e tih keimah pawh ka lo inkhap ka lo inkhap naa. He House Leader demand han sawi ah hian engkim mai a leng ti mai ang, Demand wise a sawi kher lo pawhin. Chung ang remna leh muanna hnuaih han awm leh te, chhung lamah, pawn lamah zan

khawthim hnuiah te mi thenkhatin fuih pawrh tur te zawnga an beih an beihna hnuiah pawh remna leh muanna policy-a petu, chuta tana a hmanruaa a hman theiha Pathianin a pek te kaihhruaina hnuiah hian mak takin mihring ngaihtuahna ah a theih dawn loh emaw tih tur thleng hian nimin lawk, nizan lawka news kan ngaihthlak-ah te chuan rah tha kan han hmu leh ta te hian vawiin-a demand han ngaihtuah ho te hi a ti nuam leh zualin ka hria a. Chuvang chuan hengte hi ka'n sawi duh a ni.

Ka sawi ang khan a vaiin ka rawn la lo ang a, a pawimawh vek nachungin Secretariat Administration Personnel & Administrative Reform te leh GAD ah te, heng bikah hian kan House member zahawm tak tak ten thahnemngaihna an neih kha ka'n tawm rualin helai bawr takah hian ka'n sawi ve duh chu hotuten a ram sik leh sa (leh a boruak en mil zelin i ti teh ang, a boruak mil zelin i ti ang, a situation te ti zawk mai ila dik zawk ang chu) mila heng ang huna officer transfer te an ni emaw heng ang hi kalpui nachang in hre thin hi lawmawm ka ti em em mai a. Helai bawr tak mai hi a pawimawh lai thin pawh a ni a, min phur taka hnathawktu hemi department pathum ah hian a tir te ah khan Minister of State-a lak luh ka ni a, kan Chief Minister hi ka'n tawiawm ve a, kan han puibawm a. Tah chuan ka bial ten an sawi ka hriat reng chu 'kan pu chuan department pawh a chang lo, Govt of tih vek a ni mai,' an ti a. Chuti khawpa pawimawh si a pawimawhna an hriat loh khawp, kan sorkar laimu tak tak lai hi a ni a. He lai ami te hian he kan ram kan hnam hi keimahni ah hian a awm a ni tih hria a, kan hotute program leh thil chi hrang hrang, department hrang hranga an mamawh an rawn thlen te pawh hi return dan pangai ang ti mai ila, file kir leh dan pangngai ang ringawt ni lo in a bul te atanga a rawn chawr chhuah dan te nena zir chung hian heng ah te hian zir thin ni sela tih hi ka'n sawi duh a, kan rawt duh a ni.

Demand no. 28-na Labour, Employment & Industrial Training Department-ah hian a hmun hma pawh kan pek hma in Pu Speaker, ka bial Kolasib-ah khuan ITI sakna tur 1st installment a lo thleng tih hi hriattir in kan awm a, ka phu deuh zawk a, tu te nge a hmun hma a thlawn in pe thei, a ram leina kan nei bawk silo a. Tu te nge ram a thlawn in pe thei ang tiin kan inrawn a, VC pahnih pathum atangin an rawn pe a, chu chu kan ti thei reng reng lo, hei thla ruk thla sarih a ral tep in ka hria a, heng ang

te hi VC ho ram petu ah te khan rawn thlang fel vat sela, rawn thawk thuai thuai sela tih hi kan sawi duh a ni.

Demand no. 33 – na leh 34 – na hi han sawi khawp ta mai ila, 33 – na bik ah chuan Pu Speaker, a dawr lo tur kan lo dawr niin ka hre ta deuh a that em em tho rualin, UD & PA hi kan bial ah kan hmang tangkai em em vangin anmahni hi kan lo dawr deuh ngar ngar a, an nin ministry ah te ngai pawimawh in min thlen sak thin a, Tlawng lui lo lian zelin, (tunah pawh fur kan han ti leh dawn a) nikum lam ah kan YMA President in a min vek tawh a, tunah MHIP-in chu a ban thlang lam a kang tep tih te a ni a, chungah te chuan he House kaltlang hian Chief Minister demand-ah hian officer fel tak tak engineer te pawhin kha lai hmun kha min lo en fel sak a, anmahni pawhin Tlawng lui lo lian zel hian kan ram a ti hek zel tur danna tur in ruahmanna te min neih pui se tih hi helai ah hian ka zep tel duh a.

Demand no. 36- na chungchang ah ka rilrua lo lut thin chu khawvela inkhawmpui ropui ber Rio De Janeiro-ah hian kum 1972-a environment pawimawh zia hria a, khawvel sorkar lu President emaw, Prime Minister emaw tal an kal ngei ngei na khawmpui ang lian kha vawikhatmah ala awm lo tih hi ka chhiar ve tawh thin a. Tin, hetakal ngei India rama Environment & Forest Minister pawh pu te tawiawm paha ka kal tum in a ti ti te ka ngaithla ve a, chumi ah chuan ropui ka tih em em mai chu vawiina kan tun dinhmun tur min an lo zir tawh a, an lo hre tawh a. Thal lain fur kan tleng a ni der mai a. Tuikuk thufing te ka hre chhuak a, tuikuk ho chuan ‘Thlasik lai aiin January-ah khua a vawt zawk’ an tih ang deuh khan March thla ah hian fur kan tleng ta tih tur khawpin vawiin March ni-30 ah pawh tiang dinhmun ah te kan lo ding ta. Chu mi chu hemi department demand no.36 – na neitu ten mipuite thil chi hrang hrang hmanga min zirtirna hian min au ve deuh teh se! NGO kal tlanga NGO te hmang tangkaia an chet na thin te hian min au eih sela, kumin ah thing pakhat tal ka phun ang, ka vawng him ang, ka hung tha ang tih te tlengin ngaiantuahna kan neih tha in ka hria a, chu chu ka’n sawi zawk duh a.

Demand no. 37 Corporation Department hi khawchhak ram zawng zawng khi chuan hmang tangkaiin vawiina India ram leh Mizoram ang te a kan material, kan thalai ten an duh em em bungrua te hi Co-operative Society ten a man an lo chhiar thin Department kut chhuak te kha a lo ni zawk a. Tunah nasa takin kan han hmang tangkai ta

a, heta co-operation department pakhat kal tlang hian tunlai Aizawl khawpuia tlangau kan hriat zin ber pawl chu Gas la duh tan a lak theih a ni tih te, chung semna department-ah te chuan englai pawhin lak tur a awm emaw tih mai turin an society inpumkhatna thatna te kha min an lo hmang tangkai ta a. Self Help Group hlawhtling tak tak mai, han hmuh te hian heng zirtirna hi a nung reng a ni tih a tilang a ni.

Power & Electricity Department hnathawh that zia hi vawiinah chuan a hmutu te vek kan nih rualin duh khawp lohna te, hmabak han beiseina te chu a la awm zel a. Fing leh fel tak maia hmalakna zarah 60 MW Tuirial Hydel Project la pharh chhuah loh chungchang hi chu ka sawi ve lo mai ang a, kan tlawh tum khan a enkawltu engineer Pu Barua khan member ho kha min lo hrilh chiang a, vawiinah hian an nghahhleh zia te, anmahnin agreement tihchhuah an tum, amaherawhchu eng eng emaw harsatna te a lo awm ve thin a, an han ti thei dawn lo a ni tih te avangin ka zu phone ve leh thin a, ka kal tum khan min lo duat em avang leh thil eng eng emaw te min hrilh avang khan, a pawi an tih zia te, nizan hmasa lawka kan inbiakna ah pawh an sawi leh thin chu tunhma kum sawm kal taa tute emaw in an u lalna chhuanlama harsatna min siam hi chu keimahni chang a ni lo, nangmahni in in tuar zawk a ni tih te hnam dangin min han hrilh zawk kha kan sawi chhawng mai a ni. Vawiinah he department tana tan lakna tur nia ka hriat chu Kelkang-ah khan NLUP leh UD & PA zawk PHE te kaltlang khan solar hmanga han tihna kha kan nei a, a ropui em em mai a. Mi pawh in solar leh wind hmang hian thli leh ni zung chakna hmang hian, helama tui chakna hmanga hma an lak mek lai hian kan ram tlang ramah hian solar hman tangkaina te hi tun ai hian han chhunzawm zel sela tih ka'n sawi duh a. Anmahni vang hian vawiinah chuan kan thlai thar chi tam tak te dah that theihin a lo awm ta a, hmun hla tak tak atanga sangha la lo in Kolasib atanga hnai te te ah khuan Electric Department te thar chhuah hmangin sangha te kan lo dah tha thei ta a, kan thlai te kan lo dah tha thei ta, Bawngkawn dai lawk ah te, heng te a nih avang hian lawmawm ka ti a ni .

Pu Speaker, sorkar hmasa tir khan kan Chief Minister aiawh in India Today ten India rama state lian leh state te te chawimawina min hlan tum in Mizoram sorkar an chawimawina ka zu dawng ve a, chumi tum chuan state te zawng ah hian lawmman awm zawng zawng hi Sikkim-in an dawng fai deuh vek a, Mizoram-in kan dawn tih loh pakhat leh Goa-in an dawn pakhat, a dang chu pakhatna an la fai vek ringawt mai a. A

hnua kan that dun tumin an CM ka zawk ta ringawt mai a, ‘enge ni heti tak maia chawimawina in dawn fai tak vek mai,’ ka ti a. Ani mi chhanna ah chuan ‘Department tin hi Engineer department ah ka siam’ a ti a ni. Vawiinah hian sawi rem ka ti tlat PWD department te, P & E te, PHE te department hmasawnna hi an thiamna a taka hmang thei in an siam vang a ni a. Tourism-ah te department hrang hrang ah te, engatinge Sikkim heti taka an san kan tih chuan SE level hi department lian deuh deuh ah a dah vek a, chumi avang chuan heta department engineering department ami te va hauh emaw, an thiamna va hman ai khan a tangkai zawk tih ka hria a, chuvang chuan tah hian anni hi kan dah a ni a ti a. Chumi chu keini ramah pawh hian a dik ang tih ka rinna chu UT kan nih hun lai te, state kan nih hun lai te leh vawiina a dang engineering department te pawh Engineer-in-chief kaih hruaina hnuia PWD demand no. 45-na kan sawi mek ah hian Engineer-in-Chief kaih hruaina hnuiah C.E ringawt pawh pali an han awm tak hnu ah an hnuhma han en hian fak tlak an ni tawh a ni. Chutih rual rual chuan nimin lama Police department kan sawi kan sawi ang deuh hlek in post ruak an ngah zia leh hna han tam zia te, nichina Tuipui East bialtu zahawm takin a bial chhung ringawta hna pawh kha vawiinah hian JE ven sen loh a ni tawh a ni. Bial khat ah pawh hian an JE neih te ven sen loh khawpin hna hi he department hian an ngah a, an sawi chhuak a ni a, chuti a nih chuan tuna hna ruak hi hnawh khah a ngai a ni.

Mithiam diploma thlengin Mizo tlangval, Mizo nula chhawr tur an tam ropui si, a bik takin engineering department te hi kan hman tangkaina tur atan chuan PWD chang ka sawi lo ve, department dang zawng zawng ami te pawh hi kan hman thiam a pawimawh. Project thenkhat chu kum 4 kum 5 thlenga en zui ngaite pawh a awm ang.

Chungah te chuan hnam dang ai te chuan Mizo nula tlangval mithiam, ram hmangaih sa, zotuithiang tui dan pawh hria, (kan ti teh ang) thingthupui pawh ei duh ve, zawngtah tangkaina pawh hre ve te (ti teh ang) kha Pu Speaker, kan House Leader hian helai ah hian rem hre takin han la leh ta sela. A hnawh khah kha DP&AR changtu a ni tel bawk a, a rem em em hian ka hre bawk a.

Kan hotupa pakhat in hmanah a sawi a, ‘department pakhat hmanga file ka clear diam tawh hi department pakhat ka chan hmang hian ka lo reject leh thin a,’ a tih ka hria a, chutiang chu ni lo sela hetah hi chuan. PWD Minister, P&E Minister nihna

atangte, DP& AR Minister nihna pawhin lo approve zui sela, chutiang chuan Finance lamin lo ti sela. Hei hi kan ram innghahna tur, kan intlansiakna tur, kan hmasawnna tur pawh a lo ni ta.

Mipuite hriatna atanga rawngbawlna hi PWD-ah hian a lang in ka hre tlat mai a tunhnaia tender lo lang ah hian. Mahni hnam pui te tel ve theihna tur atana PWD Minister, tuna kan House Leader nauten tender an rawn tihchhuah kan thlir/ kan hmuh thin hian hnam hmangaihna rilru a ni. Khawiah nge Zawlsei a awm tih hria khan a ni kawng a chhah tawh dawn tunah chuan. Keini district nei ve lo tan chuan a rualawh thlak viau na a, ram puma kan hmasawnna a nih dawn avangin Pu Speaker, hetianga Mizo nula tlangval kan ti dawn nge, hetianga a ram chin hre ngei ten kan ram hmasawnna thawk tura ruahmann a awm lai hian hnam dang dal theihna dan tal hi awm ta se tiin ka la duhthawh ta zel a ni. A chhan chu heng ang te hian kan khawtlang lo thleng ve se, tunah ka hma lawkah pawh khan ka ding lama thu khan Pu Speaker, a rawn sawi kha.

Kum engemaw zat lo thleng tawh, vawiina lawmthu sawina lo thleng ta te hi a nachang hriat mai bakah a ngaihna hria Leader kaihhruaina hnuaiah heng te hi awm a ni. Chuvang chuan vawiina heng hnathawhna tur chi hrang hrang kan han sawi leh kan han tih hi a pawimawh em em a ni. Pawimawh em em a kan hriat ve chu khaw kar kawng pakhat ah te hian tunah chuan hna awm dan an lan chuan contractor kei ka ni inti kha a tam deuh phei chuan pali panga te an han lut dawn a ni a. Khang zawng zawng te kha a hun taka zo thei tur chuan engineer hna khawihtu tur khan a vil hneh a ngai ta a, vil hneh tur chuan hmun hla tak tak ami nen a vil kawp chuan a vil hneh thei dawn reng reng lo.

Chuvangin helai bawr ah hi chuan i thil phal ang u. Vawiinah phei chuan kan ram hmel hi kan hotupa hmalakna leh zirtirna kan thenawm political boundary-a Mizoram chhunga la awmlo te hian Mizoram-a lokal ve te, heng hmasawnna rawn hmuh te hi nuam an van ti em! Kumin Chapchar Kut hi ka'n sawi leh teh ang.

Nikum lama Rangamati chheh vela Mizo hnahthlak public leader te khan anmahni an lokal thei tawh si lova, an fate university zirlai sawm rual an rawn tir leh nia! Enge rawn hmuh an duh kan tih chuan state pakhat mai pawh ni lo ram hrang hrang independent countries a chengte khan he ram hmasawnna te, an culture te, an tradition te

an humhalh dan te kha an fate Mizo hnahthlak te khan rawn hria se, ‘Aw Zoram ka ngai em a che’ tih nen an ramah haw leh se an duh a an rawn tir asin!

Khawchhak ramah ni sela social media kaltlanga kan chhiar thin tam ber ah hian Chapchar Kut an hman dan te, khawmpui chi hrang hrang an hman dan te kan han hmuh thin te hian helama kan tihdan mawi tak mai, inhmangaihna nena rawngbawl thinna, mahni inhlanna atanga Mizoram din chhuah tir tumna hi a ni hlu thin chu ni. Hei hi kei chu ropui ka ti a, ka sawi lo thei tlat lo a ni. Midang te vauna tel lo, midangte duhzawng pekna avang te, mahni dinhmun sang ber hlanna avang te in he thil hi vawiinah hian sawi thei kan ni tlat. Kan intlansiakna hi a va han nuam ta em aw! Chuvangin kaihruaina dik, a ngaihna hria in he ram a kaihruaina hi tunah chuan a rah tha hmutute kan lo ni ta a ni.

Chuvangin Pu Speaker, kan hotupa kan House Leader-in a demand a rawn tih ah hian a support-tu ni zel chungin PMGSY kawng bikah te phei chuan hmanni lawk pawh khan Rural Development Secretary pawh khan kan Chief Secretary hnenah khan lehkha a rawn pek te pawh kha kan lo hre thawi ve a. Hemi bik atan te phei chuan ‘JE post ruak zawng zawng kha lo hnawh khat rawh’ tih te kha khulam atanga sum min petute thu pek te kha a ni. Heng lai bawr hi ka ngaimawh em mai a, ka’n sawi duh a.

Demand no. hnuhnung ber 47-na Minor Irrigation department hi keini kan bial (potential area kan han in ti bik ang e) buh leh bal leh thlai, sum chang thei thlai tam theihna hmun a district ang pawh hian kan chhawr tangkai em em mai a. Kum dang zawng aiin heng ah te pawh hian kumina kan sum neih ang ang te pawh hi tangkai tak leh mipuite pawhin kan chhawr tangkai theih turin min hman sak leh dawn tih kan hriat avangin lawmthu kan han hrilh nawn leh duh a. Keinin kan duh ber chu heng kan sum leh pai leh kan thil han tih te reng reng hi a contract hna emaw, kha lai bawra lo buai em em ai khan a hna hi mipuite tan malsawmna a thlen hian kan lo lawm em em thin a ni tih hi ka’n sawi duh a. Chuvang chuan heng ang hun tha tak min pekna hnuaih hian kan Chief Minister zahawm tak demand te hi ka rawn support a ni tih ka rawn sawi a ni e. Ka lawm e.

SPEAKER : Tunge sawi leh ang ? Pu Zawma i lo sawm ang. Ani chu Leader a nihnaah kan duhsak deuh ang chu.

Pu VANLALZAWMA : Pu Speaker, ka lawm e. Ka hma ah khan member zahawm tak tak thusawi thiam tak tak ten a pawimawh zawng zawng hi an sawi kim emaw tih tur a ni a. A hminga opposition group leader nih man ah hun khar turah min han hmang thin a, ka lawm hle a, amaherawhchu thusawi thiam loh nak alain sawi tur hi a vang duh ang reng khawp mai a.

Engpawhnise kan sawi ang ang te member ten uluk deuhin min ngaihthlak sak thin a, ka lawm hle a ni. Champhai North bialtu nen hian kan rilru hi a inang deuh roh emaw ni hmanni pawh khan ka sawi tum tak a rawn sawi a, kan Home Minister zahawm takin a demand kan sawi ni in ‘ka react vak lo ang a, ziakin ka pe mai ang che u,’ a ti mai a. Vawiinah a chhanna point pawimawh thenkhat ziakin min han pe thlap mai hi a lawmawm ka ti a, sawi loh theih loh niin ka hria.

Chutih mek laiin ama mawh deuh te pawh a nih tho lai khan Police post ruak tam lutuk vang te em maw ni, hman zan khan kan lo hrechiang ve chauh a, nimin tlai lamah kan Chief Minister zahawm tak kawngka pui thleng maia Hindi zirtirtute lungawilo chawnghei an han lut chho thei tlat mai lai kha? Report kan hriat dan khan ‘duty kha an tlem lutuk a,’ an ti a, (chanchinbu lamah te kan hmuh danin) an han bawh chho kha, khang te pawh kha kan support leh ni sela. Police 2000 lai post ruak hi chu tiikhah vat hi a va tha ve aw! An indaih deuh thei ang a tih kha ka ngaihtuahnaah chuan a awm tel nghal a. Kan Home Minister ka support pah niin ani chuan police lak belh a duh ngawih ngawih in ka ring a. Chutih lai chuan ka sawi ang khan ziakin min han pe thlap mai a. Hetia han tih hi hun a heh loh bakah thil hi a tha duh zawk a ni awm mange aw te ka ti a. Kan han sawi luai luai, a tawpah Minister ten an han react a, a then hi chu anmahni tan pawh hian a har khawpin ka ring a. Hriat sen a ni lo a, kan sawi zawng zawng kha, sawisual palh te pawh a hlauhawm ka ring khawp mai. Kan House Leader te pawh hi kan chhawk zangkhaina a ni mai lawng maw, ziakin min pe ta mai se tih kha ka ngaihtuahnaah chuan a awm tel a. Helaiah hun rei lutuk kan hman phah loh bawk kha chuan kan lawm tlang viau ang tih kha ka’n sawi hmasa duh a ni.

Tichuan, vawiinah hian thu tam tak sawi lo turah ka inngaih rualin ka ngaihtuahnaah hian a lo lut thar ve thin a. A hmasa bera ka rawn sawi duh chu PWD hi a ni. Lawmthu sawia tan ka duh a. Amaherawhchu ka lawm viau lai hian min tilunghnur deuh chu a awm a, ruah an sur vak mai hi chu min ti buai angreng khawp mai a. Niminah

helaiah House-ah hian sawlam min bialtu E.E ka hmu zawk a. Ka sawi fo thin sawlai Bungkawn Presbyterian Kohhran Pastor bialin camping centre an tihna kawng kha, kan bung tan a nia tih min hrilh a. Mahse vawiinah hian ruah te hi an sur vak mai a, a buaithlak dawn mang e aw hi ka ti a.

Kawng siam leh ruahsur hi chu a in mil reng reng lo tih kan hre vek a, a pawi ka ti khawp mai. Chutih mek lai chuan helaiah te kan lo sawi tawh thin Lawipu mawng lamah sawn Presbyterian Kohran Bungkawn Pastor bial sawn camping centre an nei a. Saw camping centre saw a duh duh hman theihin an siam a, saw saw ania ka'n sawi rik duh kherna pawh chu. Kohhran dangte pawhin an hmang thei a ni, eng kohhran pawh ni se a awl hi chuan an hmang thei tih te min hrilh a, a lawmawm hle a, kawng erawh a chhia a. Tunah hian hma an la tan tih niminah kan EE-in min hrilh a, a lawmawm ka ti takzet a, PWD changtu kan Chief Minister zahawm tak leh a thawktute chungah lawmthu ka sawi duh a. Chutih mek lai chuan nichina ka sawilai te khan rilru ah thil lo lang nghal an awm a. Kawng han siam tak tak dawn hian ruah hi a han sur hma em em mai a.

Nikumah kan hre vek a, ruah tui a tla rei lutuk a, kawng a siam hleihtheih loh a, kumina an tla hma leh ta vak mai hi enge maw a chhan chu ka ti a. Heti zawng hian kan ngaihtuah deuh a, Resolution kan pulut a, kan pass lova, khilam khian a hua aniang a te hi ka tia. Khilam lawm loh zawng kha kan ti a ni lo maw tih te hi Pu Speaker, ka ngaihtuahnaah te hian a awm tel a ni. Kawng kha a siam hleithei loh tlat, pass ta ila khua te hi a tha rei deuh mai lo maw tih te kha ngaihtuahnaah a awm a ni. Engpawhnise khua te pawh tha leh turah ngai ta ila.

Tin, rilrua lo awm leh pakhat chu lo a hal hleithei loh te hian rilru chu a khawih khawp mai a. Kan eizawnna pui ber a nih mek lai hian lo kan hal hleithei loh chuan nakum lama kan hmabak hi a ko lo riau mai a. Ruah sur hma hi engemaw zawngah chuan PHE lam te chu an lawm phian maithei a, tui buai lutuk a ngailo thei a. Amaherawhchu kan lo neitute ngaihtuahin leh kawng siamthat ngaihtuah lai chuan a pawi deuh mang e aw tih kha kan sawi lang ni sela.

Tin, PWD ten min lo hriatsak se ka'n duh leh chu, (kan Chief Minister leh a thawktuten) hmanni pawh khan ka sawi zawk tawh a, han sawi chian deuh ka duh chu Aizawl chhuah lampangah Aizawl by pass road tha deuh kan nei a, tlak lamah hian a tul

takmeuhin ka hria a. A chhan chu Aizawl khawpui lut lo hian thil hi a ti hleitheih lova. Entirnan tlak lampangah khuan Aizawl by pass road chu nei ta ila, chhim bial zawng zawng tan, Lunglei lam te tan pawh Aizawl lo lut lo hian Lengpui airport hi direct-in pan sela, Aizawl riak kherlo hian a zin theihin ka hria. Chutih lai chuan an zin haw pawh Aizawl hi lut kawi lo hian Lunglei leh Serchhip lam chu a tlang daih thei a ni. Hei hi a pawimawh em em in ka hria a, rail head kan nei dawn bawk si a. Chu chu tuna mamawh hmasa deuh mai ni hian ka hria a.

Tin, sawlaiah Referral Hospital kan nei a, Hospital leh Medical College te pawh a la ni dawn a, airport connection tha te pawh a lo tul leh a. Khatiang te te khan tlak lampanga by pass road hi chu a tul hle mai tih kha ka'n sawi leh zawk duh a.

A dawt lehah chuan thui tak ka sawi lo ang a, GAD lam chan te pawh a ni tho in ka ring a, ka'n sawi duh pakhat chu kan Aizawl khawpui hi kan kawtlai dung hi a fai angreng khawp mai a. Ramdang atanga lo zin hian, 'Aizawl chu a fai khawp mai,' anti leh thin a, a lo dik deuh reuh hian ka hria a, a lawmawm takzet a. Chutih mek lai chuan kawngdung a fai lai hian a chung hi a hnawk a ni. Tu mawh ber nge, Power Department te mawh em ni ang? A nih tho lai a awm ang a. Tin, cable TV operator te pawh a ni ang a, Telecom lam te pawh a ni ang a, kawng a fai em em laiin a chung hi a hnawk lutuk. Hei hi chu engtin emaw tihdan a awm lawm ni aw? A committee bik te siama, thian tur deuh committee nge ni, a ngaihtuahtu turte hi siama tih theih chu a nih hmel khawp mai. Kan kawng chung lama hrui tam lutuk hian khua hi a ti hrehawm a. Tin, kan khawpui mawi tur angin a ti mawi lova; tin, kan kawtlai fai tha tak tawh mai hi a hek em em mai a ni tih kha GAD lam atanga ngaihtuah tur niawm takin kan ngaihtuah a.

Helaiah member zahawm takin a sawi airport sawlam chhim tawpa dah kha a phurawm hlein ka hria. Sawilaiah te chuan lo nei thei dawn ta ila Aizawl mai bakah hian, a pawimawh theih dan tur hi a awmin ka hria Mizoram kan location fuh lo thina kan ngaih hi fuh theih riau dan hi a awm tawh a, tunah chuan communication lamah hian Kolkata te, Delhi-ah te thlawhna tam tak a tum chhan hi refueling/ petrol thun te a ni a. Amaherawhchu a buaithlak em em khawp mai a.

Hmanni kan Delhi kal pawh darkar 1 dawn hi Delhi tlai lamah kan kual a, kan tum theilo a ni, traffic a jam nasa lutuk an ti a. Chung ho tan chuan helaiah hian airport tha deuh lo nei ta ila, Mizoram chung hi a route tak hi a lo ni lehngthal a. Petrol

leh oil te kan hmuhchhuah hunah phei chuan airport lo neih hi refueling atan hian a tangkai dawn khawpin ka hria.

International flight ho hian han luh zawk a, oil han thun mawlh mawlh a chhuah leh theih daih chu nakin lawkah hi chuan kum 10-20-ah te chuan kan kalphung tur hi a ni hian ka hria a. Chuvangin sawlama airport member zahawm tak Saiha bialtu in a rawn sawi kha ka'n support duh a. Ani hian alo tel ve hlim atang khan, kan inhmuh phat atang hian sawlama airport leh damdawi in neih saw a rawn tuipui nghal a. Chutih mek lai chuan kan Chief Minister zahawm takin a lo ngaipawimawh a, a en velnaah pawh ava hruai a, sawlamah hma an la chho kha a ropui hlein ka hria. Hei hi chak zawka bawhzui a tha khawpin ka hria.

Tin, GAD tho a nih ka'n ring leh a, hmanniah pawh kan sawi zawk tawh kha. Chhimtuipui-ah Kaladan Multi Modal Transit Transport saw a hrarpa deuh hleka umzui hi a tha mang e aw ka'n ti duh a. Nikum kum tawp lam khan Delhi ka kal a, mahni bengvar varin Bangladesh leh Myanmar changtu Joint Secretary ka'n hmu ve ringawt a, saw project chungchang avang sown. Khata min lo hrilh kha nikum hmasa kum tawp lama kan Committee Chairman Pu Rina hova kan zin tuma Rangoon ambassador min hrilh ang a lo la ni leh ta lova. Khami tum kha 2015 kum tawp lam khan Rangoon-a India ambassador chuan, ‘buaipui vak duh suh u, kumthar lamah chuan contractor kan thlang fel ang a, hna kan tan dawn,’ a ti mai a.

Mahse nikum kum tawp November thlaa ka zuk kal a helam changtu Joint Secretary ka zuk hmuh chuan, ‘nakum kumtir hi chuan an thlang fel thei maithei,’ a la ti dek dek chauh mai a, bawhzui hi chu alo va ngai mang e aw tih kha ka ngaihtuah a. Pu Laldenga’n a sawi an tih thin tunthlenga dik riau ka tih chu, (a Chief Minister hlim khan Delhi a zuk kal a party High Command ah report hi an pek tir a) “Report han pe dawn ila vai ho thusawi sawi chhawn hi dawt sawi a awl khawp mai a,” a ti a. Chutiang deuh hlek chuan, ‘kan ti dawn nia,’ tih an lo sawi mai a, sawichhawn dawn hian dawt sawi a awl angreng khawp mai a. Chu! tunah pawh chuan kan haw hlim te khan kan lo sawi phur ve khawp mai a. ‘Nakum lam atang chuan saw Mizoram border atanga Paletwa thleng road project saw a thawktu tur an thlang fel ang a,’ tikhan phur deuhin press mite hmaah pawh kan lo sawi ve a ni. Mahse chu kum khat a liam hnu pawh khan contractor an lo la thlangfel lo tawp mai a. Saw saw chak deuh hleka bawhzui ni ta sela, a bik takin chhim

lam unau te tan sawn a nghehleh awm a. Ka sawi tawh em aw! ka hrelova, Mani Shankar hnungzuia Tuithumhnara vawikhat kan kal tumin, ani khan a sawithiam khawp a saw project saw, “Nakinah chuan buhfaite hi Aizawl dawn hma hlirin in dawng tawh ang” a ti a, an lawm em em a ni. A fiah em em a ni, he project a tlang hnu chuan a ni dawn tlat a ni. Chhimlam unaute sawn kan dawn hmain an dawng zel dawn! Chuvang chuan, a pawimawh si a, chak deuhhlekin i nawr ang u tih kha ka’n rawt a ni.

Forest Department-ah hian tawite ka’n sawi duh chu, project lian deuh kan han tih dawn hian forest clearance hi a har em em mai a. Heti lo deuh hian kan ramah hi chuan a tih theih loh emaw ni aw! Dik tak chuan keini ram, Mizoram te ang, ram changkang lo hi chuan forest ai hian kawngpuite kan mamawh a, development-te kan mamawh a. Chuvangin forest clearance ngai harsa lutuk thin hi Forest Department-a thawktute pawh hian haider theih deuh dan te hi a awm lo emaw ni chu aw! ka ti a. Hei hi khawvel ram dang pawhin, a bik takin khawvel ram changkanglo te pawhin an tih tho kha a ni a. Ram changkang tawh ho hian khung Amazon Basin-a an ngawpui thiahte an hlau em em a. Mahse, khawmpui lian an han koh tak tak chuan third world countries hi an ngam lo a ni. ‘Nangni in changkang tawh a, engkim in nei tawh, chutah climate change hlauvin kan changkan vena tur kan ngawte thiah loh theih loh te thiah min phalloh pui in tum a, a theih bik loh,’ an ti a ni. Chutiang deuhhlek chuan kan ram, a bik takin Mizoram tan chuan forest ai chuan kawngpuite kan mamawh a, tuikhuahte pawh kan mamawh a. Forest clearance avanga tih theih loh reng mai hi Forest-a kan thawktute pawh khan khati zawng khan min ngaiantuah sak ula tih kha ka ngaiantuah dan ka’n sawi leh ni sela.

Thil tam tak ka sawi tawh lovang a. Thil pakhat ka sawi kai leh lawk duh chu tunhnai issue pawimawh deuh mai, Labour & Employment hmalakna chi khatah khan leh Youth Commission pawh lo tel venaah khan. L&E Department hi tunhmaa department pawimawh em em pawha kan hriatloh hi a pawimah ta em em in ka hria a. Tin, Labour Department hrim hrim hi ram changkang, a bik takin communist ramah te hi chuan labour-te welfare hi an lo dah pawimawh em em mai a. Chumi ang chuan hmalakna tha deuh mai a lo awm hi a lo ni a, keipawh ka lo hre mang lo thin a. Labour cess sum, hetia contractor-in an chhunluh zelte hi a lo tam hma viau kha a lo ni a. Hmanniah zawhna leh chhanna ah te pawh khan kan hmu tawh a, kan lo collect tam

hman khawp mai a. Chutih mek lai chuan a hmanna tur ni chhiahlo ah te pawh kan hmang ni te pawhin a lang a. Engpawhnise, kan lo hmang tawh a, khang kha chu inzir nan te pawh a tha zel ni sela.

He department hi ngaihpawimawh a va tul em! A bik takin kan kut hnathawtute, construction worker-ho hmakhua hi helaiah hian tha deuh mai a lo awm a, a tha khawpin ka hria a. Tin, lawmawm angreng si, thil hriat chian deuh ka duh chu, hmannia zawhna ni 27 tun Thawhtanni a chhuak chhan hman tak chiah lo ah khan, Er. Lalrinawma zawhnaa lo langah khan, “Tun dinhmunah NIAS Kolkatta atangin Mizoram sorkar-ah sum rawn pek let a awm em? Lo awm ta se cheng engzat nge?” tih chhanna kha, “Awm e, Chief Minister’s Office hmalakna in nuaih 42 cheque rawn dah tawh a ni” tih a ni a. A lawmawm khawp mai a. A mak chu ka ti a, engtinge maw an rawn dah mai theih ka’n ti ang lawi a.

Hemi NIAS hi thla hmasa khan Pu Ruatkima nen hian kan tlawh a. Pu Ramsanga leh Pu Nihar-a hi, ‘va tlawh ila, a issue a pawimawh si a,’ ka ti a. Mahse, anni kha chuan bazaar kha an thlahlel zawk deuh a, ‘ngawi rawh, kan tlawh lo mai ang,’ an ti a. Ruling lam kha chu sum leh paite an lo nei deuh thin a ni ang, keini opposition bazaar-na tur nei vak lo khan kan va tlawh a. An principal a lo awm a, kan zawt kan zawt a. Ani kha chuan, “Principal employee ve mai hi ka ni a, thil hi ka hre thuk lova” a ti a. Mahse, an chairman, Mehnat Shaha kha a lo kal ta a, kan sawipui kan sawipui a, thilte kan zawt a. Kan sorkar pawh kha min thiamlo ve khawp mai a. Kan agreement angin an ti lo, chuti khati tih kha an lo sawi ve teuh mai a. Chutihlai chuan, ‘naupang 50 tir turte in kan ti a, 32 chauh in rawn tir a, in rawn tirh belh loh te chuan,’ a lo ti a. Keini te kha mi a mawh lek lek a, amah zuk dawr chiangtu leh thil awmzia zuk zawt chiangtu kha, kan sorkar-te pawh kha a dem ve viau a. Mahse, chuti chung chung chuan nuaih 42 lai chu a rawn return leh ni tur a ni a. Labour Cess pawisa pawh a lut leh mai turah ka ngai a, a lawmawm khawpin ka hria a.

Chutihlai chuan, kan lo zuk pe tam deuh emaw ni chu aw ka ti a. An prospectus hi kan dil a, chutah chuan kum 3 chhung atana senso tur lo lang chu ` 1,48,000 a ni a. Mahse, kan zuk pek thlak danah hi chuan nuaih 128 lai kha zirlai 32 tan khan kan pe a, chu chu nuaih 4 zel pakhatah pe ang kan lo ni ta a. Chuvang chuan

awlsam te in a rawn return leh emaw ni chu aw! ka ti deuh a. Engpawhnise pawisa kan hmu let leh a nih kha chuan a lawmawm hrim hrim a.

Ka sawi duh lai tak zawk chu, he Labour, Employment & Industrial Training Department hi ngaihpawimawh lehzual a ngai a. Tin, kan inchher chhoh zelna tur atan pawh a pawimawh a. ITI kan tih te pawh hi tun aia uluk zawka kan enkawl a ngai a nih hi. Nimin lawkah te pawh khulaiah lungawilo in nawrhna angreng deuh te pawh an nei tih te kan hria a. He department-hi a pawimawh takzet a, a bik takin ram changkanglo tan hian a lo pawimawh lehzual bik emaw ni aw, ka ti a. He department hi tun aia ngaihpawimawh chhoh lehzual hi a tha khawp mai. Tunah kan Chief Minister zahawm takin a'n enkawl chhoh mek lai hian theihtawpa hma lak a, tanlakna tur atan he department-te hi ka'n sawi mawi a, ka'n sawi langin, tan lak lehzual nan a tha a ni tih kha ka'n sawi duh a. Sawi tur tam tak a awm thei ang a Pu Speaker, kha kha ka duhtawk mai ang a. Hun tha tak min pek avangin ka lawm e.

SPEAKER : Aw le, Pu Thanliana.

Pu P.C. LALTHANLIANA, MINISTER : Pu Speaker, Unstarred Question 67, Ballot No.53, 28.3.2017 a chhuakah khan Social Welfare Department-in tihsual palh kan nei a. Zawhna chhanna diklo hi paper lay anga tih tur chu a ni a. Amaherawchu, vawiin hi session hnuhnung ber a nih tawh avangin dan angin kan lay hman dawn si lova. Chuvangin, a dik zawk he House zahawm takah hian sawi lawk min phalsak turin ka rawn dil che a ni.

SPEAKER : Khalai dan kha kan lo hre lova. Mahse House remtihnain sawi rawh le.

Pu P.C. LALTHANLIANA, MINISTER : Pu Speaker, ka lawm e. Unstarred Question No.67, Ballot No.57 (enclosure page no.6)-ah, HP Food Products, Zuangtui, Aizawl, proprietor- Lalthanzara, tih kha Lalthanzova Sailo tih zawk tur a ni a. Kan tihsualah House ngaihdamna ka dil a ni. Ka lawm e.

SPEAKER : Kha kha nidangah a copy (Pu Lalruatkima : Pu Speaker, a copy kha min sem thei ang em?)

Pu P.C. LALTHANLIANA, MINISTER : Pu Speaker, House Secretariat ka rawn a, anni chuan, khatia i sawi mai kha a ngai ang a, Lay tur chuan House-ah hun a awm tawh lova. Amaherawchu, a copy hrim hrim in duh chuan ka correction chu member-te tan chuan pek theih a ni ang.

SPEAKER : In tih dikna mai kha a ni lawm ni? Kha kha a copy mamawh chuan a lak theih ang. Nimin ai khan sawitu kan tam a, a lawmawm ngawt mai. Tunah chuan kan House Leader sawihona khaikhawm tur leh pass rawn dil turin kan sawm ang a. Khawngaih takin vawiina station-a awm member zahawm tak te chu demand hrang hrang kan House Leader chan kan pass lai hian House chhungah awm vek thei ila a lawmawm ngawt ang. Tunah khaikhawm tur leh pass rawn dil turin kan House Leader zahawm tak Pu Lal Thanhawla i sawm ang.

Pu LAL THANHAWLA, CHIEF MINISTER : Pu Speaker, khawngaih takin kan naute kha tui min rawn chhawp tir la, min rawn chhawp sak sela, (a tul takin) kei hi in chi ka ni a, min pek ang hi chu eng rawng pawh ni se, a sen rim rem pawh ni se ka in zel mai a tlawmngaih chhuahin.

Pu Speaker, member zahawm tak te khan thahnemngai takin an sawi a, 18/19 in an sawi a, a lawmawm hle a. Tin, hun tlem in phalrai pawh kha awm tak a ni. A chhan chu department a tam a, ngaihpawimawh leh ngaihmawhte a tam a. Khami han sawi chhuahna tur atan hun i pe kha lawmawm tak a ni. Amaherawhchu, Opposition Group Leader in react vak, sawi belh vak lo turin min ngen a. Opposition Group Leader a nih avangin ka zah si a, ka thluraithlum vak lo mai turah ka ngai a. Chutih nak alaiin helaia kan hotute hian, hmannia Home Minister zahawm tak tih ang khan ti ve mai rawh te min lo la ti leh zel bawk si a.

Tin, nichinah khan kan room-ah khan i lo leng a, ‘A rei hmel si a, thingpuite kan ti dawn lo em ni?’ i tih khan, ‘ti e a, hmeh tui deuh te nen kan ti dawn nia’ ka tih khan, kan hotute hian an remti bawk si lova. Thenkhat tan phei chuan a riltam tlak tawh deuh maithei a. Chuvangin, ka ti vak lo mai ang e. Ka thiam zawng tak a ni, sawi vak loh kha.

Tin, kan session leh hun ah chuan Pathian zarah damte in kan awm ang a, India rama session TV live transmission ti hmasa ber kan ni a, a lawmawm a. Amaherawhchu, thusawitu te chauh an focus ngar ngar mai a, nangni te pawh an focus ngai lo che u a, helaia kan official lian tak tak te; tin, a sira member lo thu te, duhdah deuha lo thu te, lo mutthlu te pawh hi pawn lam atang hian hmu ve se a tha in ka hria a. (SPEAKER : A mawi lo an ti a ni ang chu.) An intlhahrung a ni mai thei a, kan

Office/Secretariat lam hian lo hrilh ula a tha in ka ring. Inkawm lehah chuan thusawitu ding chauh hi focus lo sela, a behbawm, hei kan lo thu te hi min focus sela.

Keini ho hi kan huaisen hle a, Pathian Biakin-ah thu duhdah a, bawp khawkherh a, mutthluk khum ngam ngat hnam kan ni a. Khawvel Christian dang hi ka hmu ve miah lova. Pathian Biakin ah nawmnah taka thu a, bawp te khawkherh khum a, mutthluk khum ngam hnam kan ni. Hmun tam takah, Pathian khawngaihna leh mipuite zarah ka inkawm ve tawh a, hnam dang thu nawmnah, bawp khawkherh, mutthlu hi ka hmu miah lo a ni.

Tin, vaihlo, zuk leh hmuam, kuhva ei lama kan intlahdah avanga India rama Biakin pathuma kan hnawng tawh hi a pawi khawp a, a zahthlak a. Hengte hi insiamthat nan hmang ila, he hnam hian kan thianghlim phah sawt ang a, kan hrisel phah sawt bawk ang tihte ka ring a. Chuvangin, vawiinah hian kha lam zawnga sawite kan awm nual avangin lawmawm ka ti a, chu chu ka han sawi a ni.

Pu Speaker, ni e, han thluaitlum vak dawn pawh ni ila a tlangpuiin, kan hotute helaia member zahawm tak kalkhawm te hian lawmthu an sawi deuh vek mai a ni. Lawmthu sawiah khan han react vak ngaihna pawh a awm hranpa in ka hre lova. Amaherawhchu, lawmthu sawi zawah khan thahnemngaihna aw leh duhthawhna aw a awm a. Khang kha chu ngaihthlak a nuam a, an lawm deuh vek mai a ni. Chuti a nih chuan, lawm deuh vek na na na hnena thil han hrilh nawn vak kha a tul pawhin ka hre lova. ‘Lawm chungin Lalpa rawng bawl ula,’ tih kha an pawm hle hlawmin ka hria a. Lawm chungin khatiang khan engkim kan sawi a, lawm chungin thil kan ti a, lawmawm tak a ni.

Kawng chhiat zia hi kan hria a, inhrilh inhrilh pawh a ngai lova. Hmanni ah kan hotupa Pu Piana hi a lo leng a, kan inhmu a. Kawng chhiat zia, Champhai atang khian tum hnih/ tum thum tunhnai lawkah kan rawn haw thla a, a bik takin Zemabawk, Bawngkawn atanga Tuirial kawng chhiat zia em em dante hi chu, car hniam deuha chuan phei chuan, khu lampang Tuirial hnaih lamah te phei khu chuan a helna tur lai pawh hi a vang khawp mai a. Driver-te nena han din ho vang vang a, rel ho te a ngai a ni, a kal dan tur, a mawng a hrut loh dan tur vel kha, chuti khawp chu a ni a. Chuvang chuan Pu K. Sangthuama kha, a tul si a, en turin kal duh lo mai rawh se tih ka han hrilhna a nih chu. Car te deuh takte chuan a hel a rem deuh mai thei a, car lian deuh hlek, hniam si ah

chuan PSO-te nen, Driver-te nen, khawilai takah sawn nge kal ila kan hrut nat loh deuh ang tih kha rel laih laih a ngai a ni, chhe tak a ni. Chutiang ka sawi lai chuan Pu Piana ve thung hi chuan, ‘Darlawm lamah lo kal la, kawng a tha deuh asin, a lo ti ve leh thung a. Kawng tha a kal i duh chuan Darlawnah va zin la a ni mai alawm, a ti a. Khatiang kha a ni a, a inang lova.

Amaherawhchu sawi leh sawi hnu, Highway ngat phei hi chu kan thu viau lo tlat a ni. Hman deuha Minister lo zin khan Press-ho hmaah min rawn sawifiah sak a, kan lawm khawp nghe nghe a. Tin, helam min enkawl tur hi Regional Officer Guwahati-ah pakhat an dah a, state 8 a ni a, project a tam si a. Khangte pawh kha kan lo hrilh a, engtinnge a tih zel dawn kan hre lova. Tin, kan sawi zing tawh a, an pawm emaw, pawm lo emaw Mizoram awmna pawh hre mang lo te khan an workable rate khan an rawn chhang a. Tikhan an machinery-te to put in place tur khan innawr innawr a ngai a, invau invau a ngai a. Kei pawh hian vawi hnii/vawi thum te ka phone ve a ni.

Amaherawhchu, a dang PWD road bikah hi chuan siamthat a nih lohva, a awm pangngai ah hi chuan a chhe viau lo deuh a ni, a tha chu ka ti ngam lova, mahse a chhe viau lo deuh a. Tin, Champhai atanga Aizawl pawh hi, khimi Khawzawl leilet phei tih loh leh helai Tuirial atanga Bawngkawn tih loh hi chu chhe pangai naran deuh a ni ve a, tlan a hrehawm loh. Khi lampang mi ni si lovah chuan a tlan zing ber pawl ka nih ka ring. Chuvangin, sawi leh sawi hnu, thal a lo ni a, tan an han la a, an han kal chho mek dawn a. Tun ang khua hi kan han tawng leh ta si a, eng chen nge ni dawn kan hre lova, a pawi hle a. Chutiang chuan hmalakna hi chu chak takin, kan phak ang chinah chuan kan kal a ni. Hmun hrang hrangah kawng thar te leh siamthat te tam tak a awm a, duh angin hma a lak chak theih loh va. Mahse chuti chungin, a tul leh mamawh a ni tih kan hriat avangin kan hotute’n nasa takin tan an la a, an kal chho mek zel a.

Tin, member zahawm tak Pu Zawma hian Aizawl West lama by pass hi a ngai pawimawh a. Hmanniah pawh khan a sawi a, kan hotute pawhin an ngai pawimawh a. PWD hian Vision 2030 a nei a, chumiah chuan helama by pass lo awm tur te, ring road turte hi tha taka ruahmanna siam a ni a. Tin, chumi hma pawh chuan a theih ang anga kalpui dan hi UD&PA atangte pawhin ngaihtuah a ni a, a ri ruat ang chi deuh te in. Chutiang chuan tunah hian kan hotute’n ngaihtuahna an siam a.

Tin, khang kawng entirnan, Champhai atanga Lunglei, tuna a kawng aia a hnaih deuh dan tur ang chi te pawh kha ngaihtuahna a awm a. Tunah hian hma lak chhoh mek zel a ni a. Khatiang khan a tul ang ang chu thawh mek a ni. KDZKT compensation ang te kha, dan awm loh lai Land Acquisition Act awm loh laia private negotiation-in ti rawh u tih atanga private negotiation-a tih a ni a. Chutiang chuan harsatna eng eng emaw avang leh dan mumal awm loh lai a nih avanga private negotiation-a kal a ni a. Tin, he kawng rawn in irhchhuahna hi a rei tawh khawp mai a, tunah hian sanction te awmin kan thawk thei dawn tawh a, thil lawmawm tak a ni a. Khawthlang lam te pawh an lawmin ka hria, kan lawm tlang a ni. Kha ti kha ni mai sela, thil dang chu kan thawk mek zel a, hma lak mek zel a ni a. Ziakin min pe ve se an tih avangin ziakin kan la inpe dawn a. A detail thei mah mah zawkin a rinawm a, a tha zawk mah mai thei a ni.

Tin, power hi helaiah pawh an sawi a, a mak ka ti khawp mai a. Engatinge a lian ti lova te reuh te te hlir hi kan tih tih hi mi lehkhathiam pui pui newspaper-a rawn ziah ching te pawhin an rawn ti fo va. Hei hi tunhma Deva Gowda rawn Prime Minister hma zawng khan Pu Speaker, state power chu 5 mega watt a ni. Deva Gowda kha a rawn Prime Minister a, Chief Ministers's conference a koh hmasak berah khan kan sawiho-naah tun chinah chuan state power hi 25 mega watt ni tawh rawh se a ti a. Party zawng zawng, party hrang hrang kan tam a, kan lawm hle a, Jyoti Basu pawh a la dam a. Ani pawh a lawm ber te zing ami a ni a, lawmthu a sawi nghe nghe a ni. Kha kha a lian ber a la ni leh ta nghal a ni. Chu chu state power chhung ami kha a ni a. Ama'rawhchu, kha mi khan clearance ngai zawng zawng kha chu a la keng vek tho a. Environment clearance te leh Forest clearance te nen lam khan. Serlui B pawh hi khawl pakhat khu thawk thei lo reng a ni a, kan lo kir leh hnu-ah pawh khan. Khung zawng zawng operational a han siam tur chuan tunah hian 25 crore lai kan seng tawh a ni. Tunah khu chuan siamthat ni tawhin a vaiin a thawk thei tawh niin ka hria a. Kan hotute min hrilh danah keimahni local consumption pawh a sang sawt dawn a ni.

Tin, tunah hian kan peak load requirement hi 102-103 vel a ni a. Tun atanga kum reilo te ah chuan 120 lai a thleng chho ve thei tawh te pawhin a rinawm a. Eng eng emaw a hmanna turte pawh a lo tam chho a. Chuvangin, kan local requirement meet tur pawh khan tan kan lak a ngai a. Kha mi tur khan tunah hian theihpatawp kan hotuten an chhuah mek a.

Tuirial khu OECS te nen inremna neia thawk kan ni a. A bul tan kan ni a, NEEPCO in an execute a. OECS hi tuna JICA kan tih tak hi ni awmin ka'n ring deuh a. Overseas Economic Development Fund of Japan a ni a. Pu C.L.Ruala Minister nih lai a ni, anni rawn tirhte kha theihtawpin kan lo mikhual a. Site hrang hrang Tuivai te pawh khi helicopter in a kal kualpui a. Tin, a chheh vel khua an tlawh tur te kha theih ang tawka reception lo siam a, lo welcome tur te in kan ti a. Tin, an duhzawng bekangte a hluiin kan hlui a. Khatiang khan theihpatawpin tilawm turin kan hotuten ruahmanna an lo siam a, an hlim hle a; chuvangin, a pahnih khan min rawn phalsak ve ve ta a ni. 210MW pechhuak thei tur Tuivai leh Tuirial 60MW. Tuirial phei chu kan hotuten a lung min phum tir a, 1998-ah khan NEEPCO ten an thawk tan nghal a. Amaherawhchu, kut tlinglo-a sum lak pawisak lohna avangin a tira compensation, pek tur zat compensation claimant 48 verified tawh kha a lo pung leh hlui a. Chuvang chuan harsatna kan tawk a, khawvela bandh rei ber ni 60 band te kha a lo awm ta hial a. Chungte avang chuan harsatna kan tawk ta a, hluihlawnin a awm ta a ni. Vanneihthlak takin 2008-a kan lo kir leh khan kan hotuten an bawhzui ngar ngar a. Tunah khuan PPP mode in NEEPCO hovin an thawk a. Japan ho nena kan inremnaah kha chuan power kha a zavaiin kan ta tur a ni a, a free in. Amaherawhchu, tunah erawh hi chuan a free chu 12% a ni ang a, a bak zawng kha chu kan ta vek chu ni tho mahse kan lei a ngai dawn a. Chutiang chu a lo danglam tak na hi a ni.

Tin, Tuirial lung kan phum lai khan Japanese ho chuan, ‘nakum tun ang hunah ka pu, Tuivai 210MW pe chhuak thei tur pawh hi a lung i phum leh thei ang,’ min ti a. A zavaiin kan ta tur a nih rual khan free power kha chu 12% a ni ang a, a bak zawng kha chu hralthin, tiang khan kal tur a ni a. A vai khan free a ni a, mahse, kan rulh tur chin kha chu a bang kha a ni dawn a ni. Chuvangin, tunah hian tluangte in lo kal sela chuan power ah hi chuan kan intodelh chauh pawh ni lovin hralth chhuah tur mega watt 100 chuang kan nei tawh dawn tihna a ni a. Chutiang chu vawiin thlenga power project lian kan neih loh nachhan a ni a. A tirah chuan mega watt 5 chauh a ni a, tunah chuan mega watt 25 a ni.

Tin, kan lui zawng zawng deuhthaw hi MoU signed pui kan nei deuh vek tawh a. Mi tam tak chuan a rei tawh vei nen cheh khat pawh an la chek lo an ti a. Mahse MoU signed khan bawngtuthlawh kha a hman nighal mai theih loh a. Clearance

tam tak an tih a ngai a. Tin, survey investigation famkim tak, tha tak an tih a ngai a. Hetiang zawng zawng atan hian hun a duh a ni. Tin, survey and investigation te ti zo vek pawh ni sela technical clearance hi khulam tih tur a lo ni a. Environment clearance, Economic clearance, khatiang clearance hrang hrang kha a la ngai cheu a. A thente chu PPP mode te pawh a ni ang a, a tul angin. Tin, kan project thenkhat dang dangah te pawh outsourcing te pawh kan hmang mek a, sum kan neih loh avangin duh angin a tih theih loh a ni. Sum duhtawk chu nei ila a lian lian atangin kan han khuap hmasa mai tur a ni a. Mahse sum hi zawn chawp a ngai a. Mizoram sorkar hian a neih loh zawng tak a lo ni bawk si.

Tin, nichin lamahte pawh kan ngaihthlak tawh ang khan sum leh pai hi lo nei teh reng pawh ni ila, a zawng zawng khuah hi environment atan a tha ber ang em tih te pawh ngaihtuah zel a la ngai a. Engpawhnise, Tuivai hi tunah hian NEEPCO hovin an tan leh dawn mek a, pisa pawh an rawn hawng tawh turah ka ngai a, chutiang chuan hma lak mek a ni a.

Tin, member zahawm tak Dr. Beichhua khan Chhimtuipui te pawh saw khuah ni se a ti a. Tunah sawn Kawlchaw khuap turin NTPC te hi 2008 December-ah khan pek tawh an ni a. Amaherawhchu, DPR siamna-te kha a lo rei tawh a, revise leh vek a ngai a. Tin, chutih chhung chuan compensation chungchangah buaina thui tak a awm a. Vawi tam tak DC ho te pawhin meeting a awm tawh a, vawi hniih khat chu kei pawhin ka ho tawh nghe nghe a. Chutiang chuan problem hrang hrang a awm avangin a kal chak thei lova; ama'rawhchu, NTPC- ho chuan an la chenchilh reng a ni. Chutiang chu thil awm dan a ni e.

Tin, Lungreng khi mega watt 800 chuang pe chhuak thei tur a ni a. Hman tuma Burma Ambassador lo zin khan democracy an la nih hma in kan han hrilh a, sawta Multi Model Transport Project in a chhuahka tur te helicopter-in kan thlir tir a, a hlim hle a. Lungreng thawh pawh khi a phur khawp a. Burma ram eng emaw chen a chim dawn a, mahse khi lai keimahni Zo hnahthlak in an luah chin ram khi neglected deuh a ni a, underdeveloped area a ni a, khangte khan development an lo hmuu phah theih dawn avangin a phur hle a. Mahse tunah hian thil a lo inhlakthleng tak avangin thil kallai chutiang khatiang chu tih tur chu a awm lo na-in thil thi a la ni lo ve tih kha House zahawm tak hi ka'n hriattir duh a ni. Chu chu a tlangpuiin power lam awmdan chu a ni.

Theih se, sum te chu awm se chuan pakhat khuap ila, intodelh hle ila a tawk mai lawm ni te pawh a tih theih a. Amaherawhchu a khuahna sum a awm lova; tin, kan power chin chu kha ka sawi ang kha a ni a. Chuvangin tunah hian 5 mega watt hnuai lam te te kan neih nachhante hi kan power chhung ami kha a ni a. Tin, a khuahna tur atan hian REC atang tein sum kan hmu thei a, chutianga khuah chu a ni a, MNRE atang te pawhin, chu chu a awmdan tlangpui a ni. Chuvangin mithiam pui pui hi chuan ‘Engatinge maw project lian pui pui hi tun thleng hian kan la khuah loh le’ tih hi chu indah hniam paha inzawh loh atan a tha khawp. ‘Thil hi ka va lo hre lo em’! tih kha an sawi tel zel tihna ang a ni. Chuvangin power lamah chuan kha kha a tlangpuiin thil awmdan kan hriat atana tha, kan zavaia hriat atana tha a ni.

Tunah hian khimi keimahni ram rawn depa Zo hnahlak awmna khua eng emaw zat khi kan han pe ve a, an lawm hle a, Burma sipai ho khilaia rawn duty hlei hlei khi an lawm a. Hmanni khan khaw pahnih vel, pathum vel atangin lehkha min rawn thawn a, tariff tlema sang ta deuh hi min awl thei lawm ni an rawn ti nghe nghe a, an sorkar emaw min rawn ti ni awm fahranin lehkha min rawn thawn a ni. Chutiang chu power lama thil awmdan a ni a.

Dr. BD Chakma, aw Pu BD Chakma tih ang khan ka ti ve dawn em, Pu Speaker? Hei a tam mai a, heng zawng hi kan chhiar ang a, comment pahin. Member zahawm takten an nghah peih chuan kei chuan ka peih mai a. Kan sorkar kalphung kha an hrechiang dawn tihna a ni mai a. Tin, member zahawm takte zawhna leh hriat chian duhte kha hei bu hnih bu thum daih a ni. Mahse Opposition Group Leader zahawm takin min sawmna kha ka pawm rih mai ang a, heng hi remchangah kan la rawn pe ang che u.

Tin, airport kha kan sawi leh lawk ang a, airport chauh kha. Latawh kha tunah hian DPR an siam mek a. Hmanah Tuipang lama kan zinin Theiri-ah kan chawl a, chutatang chuan kan hotu Pu Hiato-te khan “Chhim lamah in hmu ngang loh chuan khu khu entir teh u” min ti a. Ani kha a lo awm ta lova, Pu Beichhua hi bialtu MLA a nihnain kan request a, anin phur takin tikhan min lo kalpui a, nichina kan ngaihthlak tawh ang khan. Chutiang chuan tunah hian Lengpui ang tiat vel khu chu awm thei dawna an hriat avangin phur takin kan kal chho a ni. Tin, Lunglei District-ah kan zawng kan zawng a, kan hmu zo lova. Tunah sawn khawthlang lampangah Lengpui ang tiat vel chu a awm thei awm mang e aw an ti a, mahse an danah hian ‘within 500 km as a crow flies’-ah

khan airport awm kha a rem lo a ni. Chu chu engtinngé kan tih ang kan hre lova, engpawhnise kan la sawiho ang a. Tichuan sawlama airport awm hi chu min phurpui ve a ni. A chhan chu hmannah helaiah hian ka sawi tawh a, Kolodyne Multimodal Transit Project hi a tira UPA sorkara kan sawi lai khan tun hma kum 20 vel kaltaah khan min phurpui tehchiam lova. Mahse kan ti lui a, RITES-te kan investigate-tir a, Pu K. Thangzuala CE a nih laiin. Mahse Burma lamah sipaiin an lo phal lova. Tichuan tha dawna kan hriat si avangin kan hotuten Burma sorkar nena inbiakna, kan CE te, kan CS te telh vein Burma khan rem an lo ti a, chutatanga kal chho ta zel hi a ni a.

UPA sorkar khan tha an rawn ti viau a, an Look East Policy-ah pawh khan an chhuan pawl tak a ni a. Tuna sorkar thar hian Act East policy a tiyah hian chak zawka min rawn thawhpui tura kan beisei laiin kha Opposition Group Leader zahawm takin a hre chiang a. Tin, kan MP te pawh hi kan nawr tir ve deuh reng a. Amaherawhchu Burma ramah chuan tunah khian an democracy khi, ka tawng tu hriat thu suh ah, a la frail deuh a, Chuvangin chak takin engmah khi an la ti zung zung thei lova. Mahse an phur ve avangin thil chu a kal mek a. India sorkarin tangka pawh a tumsak dawn a, chutiang chu a ni a. Chuvangin heng zawng zawng kan peih hunah chuan Bangladesh nen border trade nasa takin kan buaipui mek a, tun thla tharah hian Delhi-ah Sheik Hasina a lo kal dawn ni awm tak a ni a. Prime Minister-in border area Chief Minister te kha chu tel ve turin a duh an ti a, lehkha chu kan hmu lo nain phone-a min rawn hrilh an awm a. Chutiang chuan engtinngé a chak zawk theih ang tihte pawh chu la ngaihtuah tur a ni a. Chuti a nih chuan Pathianin ringlo mi sakhaw lian pui pui pathum min hualtir tlat te hi Chanchin Tha mi thahnemngai leh kan Kohhranten tangkai zawkin, awlai zawkin, remchang tha zawkin an hril piah lamah South East Asia ram, ring lo mi ram hlirah khian tuna harsa taka thahnemngaiten pahnih khat lek lek an tirthnaah khian a huho te pawhin kan kal thei tawh ang tih kan beisei a. Chu chu trade and commerce lam ai maha kan sorkar hotute an phurna hi a ni Pu Speaker, chutiang chuan kan hotuten hma an la chho mek a ni.

Ti kha ni mai sela, Pu Speaker, memberte hian resolution a ni emaw, engemaw hi kan sawiho thin a, zalen takin kan sawiho thin a a tha a. Tin, mimal tinin kan sawi hi sorkar emaw, party emaw ngaihdan a ni vek kher lo a ni tih hi inhriatsak vek ila thain ka hria a, Mizo mipuite hian. Mimalin an ngaihdan an sawi thei a, chu chu kan pawm loh zawng a lo nih pawhin mawihnaid deuhte pawhin kan react a tul a. Ringtu kan

nih hi hmang rim hle ila a thain ka hria a. Chutianga kan kal chuan he ram hi ram nuamah kan siam ang. Tin, kan Pathian hmel pawh hi mite lakah kan ti itawm zawk ang, kan tiropui zawk ang tih hi ka ring a ni. Nichina kan ngaihthlak tawh ang khan vui hmel pu deuhin, vui hmui puin, ‘Pathianin ram kilkhawr berah, tlang ram chhengchhe karah min dah a,’ kan ti thin a. Mahse Pathianin min dahna ram hi khawizu leh hnute tui luanna ramah a siam theih a ni tih hi kan chiang a, chumi siam tur chuan vawiin hian kan kal a. Chuta tana pawimawh hmasa ber chu Lal Isuan “Heng ka unau mi te ber” a tih te, kuthnathawk mi te, hmeithai te, pachhia te, lonei mite, huan nei mi te, chhumchhia te an ni. Chung ho tuam nan chuan kan hotuten NLUP an ti chhuak a. Eng ang pawhin sawichhe thin mahse he programme hian Lal Isuan “Heng ka unau mi te ber” a tih te kha mi lian te, mi hausate tlawn reng renga khawsa lova, mahni khaw buzawlah lungawi taka, thlamuang taka ei hmua an khawsak ve theihna tur atana ruahmanna siamsaktu a ni.

Chuvangin ‘a tirah cheng nuai khat kan pe ang, singthum kan pe ang,’ kan tih lai pawh khan khawi atangin nge chung sum chu a lo kal dawn tih kan hre lo. Mahse chung lampang lamtang a nih avnagin chung lampang thiltihtheihnain a rawn titlheng zel, a takin kan hmu zel mai a nih hi. Remna leh muanna pawh chuti tho chu a ni, min hmuhsit nan an hmang. Mahse chung lampang programme, duhzawng a ni aniang chu, Pa hun tiam a lo thlen chuan enge lo thleng a takin kan hmu mai a ni.

Chutiang zel chuan tunah pawh hian he ram, ram kilkhawr ber, ram chhengchhia, tlang ram, ram rethei kan tih hi boruak tha ber, sik leh sa nuam ber, ram leilung tha ber, vawiin thlengin ram nuam ber, ram leilung tha ber. Vawiin thleng chuan carbon a dahthat te hi India rama mithiam ten, agriculturist ten an awt a ni. Chung zawng zawng chu tunah hian hmang tangkaiin, khawvelah inphochhuah nan hmang turin tunah hian kan hotuten hma an la a ni. Chu chu tunah hian kan pan mek a.

NLUP hun a lo ral tawh a, mahse la hlawhtling tawk lo te an awm a. Chung tang duh si, tanna tur neilote chhawmdawl nan, tang te tanpui nan tunah hian kan hotute hian NEDP an duangchhuak leh tawh a. Chumi chuan tunah hian growth strategy chak zawk, tha zawk leh changtlung zawka growth kan neih theih nan tih a ni a. Hei hi kan sawi tawh angin subsistence economy atangin market oriented economy-ah kan kal theihna a ni dah law maw tiin kan hotuten phur takin NLUP a tul anga chhunzawm chungin hei hian supplement an tum a ni.

Chutiang zawng chuan kan hotuten hma an la a. Hengte pawh hian mihausa kan tih te, mikhawsa thei kan tih te, sumdawng te hi a zawng lo. A zawn ber chu Lal Isuan, ‘heng ka unau mi te ber,’ a tih te kha an ni tlat. Chuvangin heng programme te avang hian he ram, ram kilkhawr tak, tlangram chhengchhe tak hi khawvel hriatah ropui takin tunah hian kan phochhuak mek a ni.

Chutiang chuan kan hotute an kal a ni. Chanchin Tha khawvel zawng zawnga kal a, hril turte kan ni a. Thil siam zawng zawng hnena Chanchin Tha hril nachang hi kan lo hre tlai deuh hlek a, tunah hian kan ram thing leh mau te hi kan lo ti chereu zo hman thelh a. Ramsa te, chungleng sava te hi kan hnawt bo zo tawh a. Luia sangha te pawh tur nen lam kan hrai a, mahse tunah hian chungho hnenah pawh, mihring chauh ni lo hnenah pawh Chanchin Tha hril nachang hria tam tak an lo awm a. Vawiina member zahawm tak tak ten in han sawichhuak te kha thil lawmawm tak a ni.

Mahnia forest/huan siam thei te pawh an lo awm ta a. Silaia sava veh, ramchhuak te hi kan zin te pawh hian kan hmu thin a, a hrehawm khawp mai. An silai license te hi, an silai te hi tun tir vek tur emawni chu aw te kan ti deuh a ni. Miin camera nena sava an veh tawhlai hian. Chutiang chu a ni a.

Chuvangin, vawiinah hian khawvel zawng zawnga kal a thilsiam zawng zawng hnena Chanchin Tha kan hril theihna turin he sorkar hian Pu Speaker, hma a la chho mek zel a. Hei hi tuna ruling party chauh ni lo in, Zoram leilung fa zawng zawng tan a nih avangin neitu rilru pu a min tawiawm turin Pathian ropui nan kan insawm a ni. Chu chu kan tum a ni a. Chu chu kan kalphung a ni.

Chutichuan Pu Speaker, ka demand no-

Demand No.	Purpose	Amount	Demand For Grants Page No.
1	2	3	4
1	Legislative Assembly	19,96,10,000	1-6
2	Governor	13,60,000	7-12
3	Council of Ministers	5,67,20,000	13-18
5	Vigilance	5,65,65,000	38-41
11	Secretariat Administration	1,13,91,00,000	79-82

13	Personnel & Administrative Reforms	4,88,69,000	86-89
15	General Administration Department	78,08,03,000	106-142
27	District Council & Minority Affairs	3,26,64,63,000	333-339
28.	Labour, Employment & Industrial Training Deptt.	29,61,65,000	340-345
33.	Soil & Water Conservation	16,95,97,000	398-403
36.	Environment, Forests & Climate Change Department	76,88,35,000	425-435
37.	Co-operation Department	22,76,02,000	436-441
39	Power & Electricity	4,24,37,65,000	454-470
45	Public Works	8,15,99,48,000	520-551
47	Minor Irrigation Department	61,79,80,000	571-578
	TOTAL	20,03,33,82,000	

te hi House-in min pawmpui a min pass sak turin ka ngen e.

SPEAKER : Tunah khan kan House Leader, kan Chief Minister zahawm tak Pu Lal Thanhawla'n a demand number hrang hrang 15 te hnuiaia department hrang hrang ten kum 2017-2018 chhunga an pawisa hman tur, a vaia belkhawm hi kan chhiar mai ang a, ` 20,03,33,82,000 he House hi pass sak turin a rawn dil a. Pass Remti zawngin remti ti rawh u le. (Members: Remti.) Remtilo kan awm em? Awm lo. Tichuan Chief Minister zahawm tak Pu Lal Thanhawla demand 15 te hnuiaia department hrang hrang ten 2017-2018 chhunga an pawisa hman tur, a vaia belkhawm ` 20,03,33,82,000 chu he House hian lungrial takin a pass ta a ni.

Pu LAL THANHAWLA, CHIEF MINISTER : Pu Speaker, member zahawm takte leh i hnenah lawmthu ka sawi e.

SPEAKER : Business pakhat chiah kan la nei a. Chu chu Legislative Business a ni a. Tuna kan pawisa pass tak kha hman theihna tur a ni a. The Mizoram Appropriation No.2 Bill hi Finance Minister zahawm takin introduce rawn dil se la.

Pu LALSAWTA, MINISTER : Pu Speaker, His Excellency the Governor of Mizoram recommendation ang leh i phalnain 'The Mizoram Appropriation No.2 Bill, 2017' hi he House-ah hian introduce ka rawn dil e.

SPEAKER : Introduce a rawn dil ta a, kan phal mai maw? Kan phal e. A copy kha member te hnenah sem ni se. Minister zahawm tak Pu Lalsawtan House ngaihtuah atan rawn move sela, pass rawn dil nghal tawh mai sela. Amah i sawm leh ang.

(₹ in lakh)

<i>Demand No.</i>	SERVICES AND PURPOSES	SUMS NOT EXCEEDING		
		<i>Voted by Legislative Assembly</i>	<i>Charged on the Consolidated Fund</i>	<i>Total</i>
<i>1</i>	<i>2</i>	<i>3</i>	<i>4</i>	<i>5</i>
1.	Legislative Assembly	Revenue	1956.10	87.20
		Capital	40.00	40.00
2.	Governor	Revenue	13.60	594.94
3.	Council of Ministers	Revenue	567.20	567.20
4.	Law and Judicial	Revenue	2044.59	793.22
		Capital		0.00
5.	Vigilance	Revenue	565.65	565.65
6.	Land Revenue and Reforms	Revenue	3185.18	3185.18
7.	Excise and Narcotics	Revenue	3140.01	3140.01
8.	Taxation	Revenue	1612.79	1612.79
9.	Finance	Revenue	93506.68	93506.68
		Capital	73075.45	73075.45
10.	Mizoram Public Service Commission	Revenue		615.80
11.	Secretariat Administration	Revenue	11391.00	11391.00
12.	Parliamentary Affairs	Revenue	58.75	58.75
13.	Personnel and Administrative Reforms	Revenue	488.69	488.69
14.	Planning and Programme Implementation	Revenue	7651.25	7651.25
		Capital	500.00	500.00
15.	General Administration Department	Revenue	7808.03	7808.03
16.	Home	Revenue	56557.09	56557.09
		Capital	1273.00	1273.00
17.	Food, Civil Supplies and Consumer Affairs	Revenue	6781.10	6781.10
		Capital	18747.60	18747.60
18.	Printing and Stationery	Revenue	1330.48	1330.48
19.	Local Administration	Revenue	2795.72	2795.72
		Capital	3000.00	3000.00
20.	School Education	Revenue	96886.97	96886.97
		Capital	1806.00	1806.00
21.	Higher and Technical Education	Revenue	18044.88	18044.88
		Capital	1000.00	1000.00
22.	Sports and Youth Services	Revenue	1806.84	1806.84
		Capital	350.00	350.00

(₹ in lakh)

<i>Demand No.</i>	SERVICES AND PURPOSES	SUMS NOT EXCEEDING		
		<i>Voted by Legislative Assembly</i>	<i>Charged on the Consolidate d Fund</i>	<i>Total</i>
1	2	3	4	5
23.	Art and Culture	Revenue	927.72	927.72
24.	Medical and Public Health	Revenue	42522.01	42522.01
		Capital	3700.00	3700.00
25.	Water Supply and Sanitation	Revenue	15431.74	15431.74
		Capital	4309.55	4309.55
26.	Information and Public Relations	Revenue	1436.25	1436.25
27.	District Council and Minority Affairs	Revenue	32664.63	32664.63
28.	Labour, Employment and Industrial Training	Revenue	2961.65	2961.65
		Revenue	12727.39	12727.39
30.	Disaster Management and Rehabilitation	Revenue	2099.47	2099.47
		Revenue	8397.71	8397.71
31.	Agriculture	Capital	9855.00	9855.00
		Revenue	6955.18	6955.18
32.	Horticulture	Capital	300.00	300.00
		Revenue	1695.97	1695.97
34.	Animal Husbandry and Veterinary	Revenue	5507.20	5507.20
		Capital	1441.00	1441.00
35.	Fisheries	Revenue	852.35	852.35
36.	Environment, Forests & Climate Change	Revenue	7688.35	7688.35
		Revenue	1434.02	1434.02
37.	Co-operation	Capital	842.00	842.00
		Revenue	30780.08	30780.08
38.	Rural Development	Capital	5631.00	5631.00
		Revenue	37977.65	37977.65
39.	Power	Capital	4460.00	4460.00
		Revenue	7174.08	7174.08
40.	Commerce and Industries	Capital	6168.55	6168.55

(₹ in lakh)

<i>Demand No.</i>	SERVICES AND PURPOSES	SUMS NOT EXCEEDING		
		<i>Voted by Legislative Assembly</i>	<i>Charged on the Consolidate d Fund</i>	<i>Total</i>
<i>1</i>	<i>2</i>	<i>3</i>	<i>4</i>	<i>5</i>
41.	Sericulture	Revenue	1827.61	1827.61
42.	Transport	Revenue	3880.41	3880.41
		Capital	500.00	500.00
43.	Tourism	Revenue	732.19	732.19
		Capital	800.00	800.00
44.	Trade and Commerce	Revenue		
45.	Public Works	Revenue	38785.48	38785.48
		Capital	42814.00	42814.00
46.	Urban Development and Poverty Alleviation	Revenue	7598.79	7598.79
		Capital	28962.64	28962.64
47.	Minor Irrigation	Revenue	2040.80	2040.80
		Capital	4139.00	4139.00
48.	Information and Communication Technology	Revenue	1832.16	1832.16
49.	Public Debt	Revenue	42606.39	42606.39
		Capital	27774.37	27774.37
GRAND TOTAL:		807838.28	72471.92	880310.20

Pu Speaker, hei hi he House zahawm tak hian kum 2017-2018 atan min pass pui turin ka rawn sawm a ni.

Pu LALSAWTA, MINISTER : Pu Speaker, ni 22 atang khan vawiin thlengin ni thum chauh awl in Minister zahawm tak takte demand sawi khawm a ni a, pass a ni tawh hlawm bawk a. A hman theihna tur Appropriation Bill, The Mizram Appropriation No. 2 Bill, 2017 hi min pass pui turin kan chhiar chhuak ang a. Tin, chumi hma chuan Appropriation-a kan pass turah hian vote tur leh vote loh tur hi ka'n chhiarchhuak nghal vek mai ang a. Nakinah min pass pui hunah kan hriathran nan ka'n sawi ve hrim hrim ang a, ‘Charged on the consolidated fund of Mizoram State’ tih hi Legislative Assembly hian an nei a.

Tin, Governor in a nei bawk a, Law and Judicial Department-in kan nei bawk a; tin, Mizoram Public Service Commission-in an nei bawk a. Tin, Public Debt kan tih hian kan nei bawk a. Chu chu a nihna takah chuan House-in kan pass loh pawhin he House ruhrel pawimawh an nih avanga awm reng tur an ni ve hrim hrim a, mahse kha

ka'n sawi lang tho a. Tichuan a tir lamah pawh kan lo sawi tawh ang khan kan pawisa hman dan hi tun hmaa plan, non-plan awm tawh lovin capital expenditure leh revenue expenditure chauh kha a ni tawh a. Kan budget bu pawh tlem chuan a thawl ve deuh ta a. Tin, member zahawm tak tak ten in hmuh a in hriat a, in rilrua zawhna awm tur pakhat a awm a. Trade & Commerce kha a nil tlat a, a nil nachhan hi Commerce and Industries Department-ah a in ‘merged’ luh tawh vang a nia. Chu chu hemi kan pass tur kan chhiarchhuah hma in ka'n sawi lawk a ni Pu Speaker.

Pu Speaker, Legislative Assembly Secretariat lam ka'n rawnin chhiarchhuah vek a ngai an ti a, a tul bawk a, ka'n sawi chhuak leh ang e. Heng department ami pawisa kum 2017 leh 18-na kan hman theihna turin “The Mizoram Appropriation No. 2 Bill, 2017” in a ken chu hengte hi a ni.

Pu Speaker, hei hi House zahawm tak hian kum 2017-2018 atan min pass pui turin ka rawn sawm a ni.

SPEAKER : Awle, tunah khan Finance Minister zahawm takin ‘The Mizoram Appropriation No.2 Bill, 2017’ hi he House-ah pass a rawn dil a. Pass remti zawngin ‘Rem ti’ ti ru le (interruption : Pu Speaker, a Bill no. hi 44 a nih loh pawhin 45-na a ni lo maw?) Ni lo. Hei hi chu Appropriation a ni a, Appropriation No.2 bill a ni e. Pass remti zawng in ‘Remti’ ti ru le (Members : Remti) Rem ti lo in awm em? Awm lo. Tichuan ‘The Mizoram Appropriation No.2 Bill, 2017’ chu he House hian lungrual takin a pass a ni tih ka puang e.

Pu LALSAWTA, MINISTER : Pu Speaker, ka lawm e.

SPEAKER : Tunah chuan kan pawisa passed tawh te kha kan hmang thei a ni. Khawngaih takin member zahawm tak te khan lo dawh hram hram ila. 1978-ah chuan zanriah pawh ei lovin kan tlaivar tawh a ni he House-ah hian. Tun tum session-a a tlangpui te in hriattirna kan nei ang a.

Hei a tawp thlenga ka dinglama officer awmte hi a bik takin House hmingin lawmthu ka sawi bawk a ni.

Tin, kan rorel chhung hian Pathian leh Zoram mipuite ngaimawh tur thil pakhat mah a awm lovin ka hria a. State dangte ngaihtuah chuan kan rorelna hi a fel faiin a tha em emin ka hre thin a, ropui ka ti a. Hei hian he rorelna

House hi a tizahawm a, a chawimawi em em a. Chumi piahlamah Mizoram leh hnam hi a chawimawiin a tizahawm hle a ni.

Ka rilrua thil pakhat lo lut chu, India hmarchhak state 8 ah hian tlangmite awmna state 5 kan awm a. Arunachal, Sikkim, Meghalaya, Nagaland, Mizoram. Heng state 5 te zingah hian tawng pakhat chauh hmanna state hi an awm ka hre lo. Keini hi Mizoram tawng, Duhlian tawng chauh hmang hian a bul atanga a tawp thlengin ro kan rel thei a, kan inpawh em em mai a. Hengte hi ram leh hnam thil khawih tak tak a ni a. He kan chanvo hi a ropuiin tha kan ti hle a. Hengte hi kan zavaia lunguala kan tanrualna, kan inngaihtlawmna, thuhnuai kan rawlhna, kan tanrualna avanga awm thei a ni a, ropui ka ti a, lawmawm ka ti hle a ni.

Kan Finance Minister zahawm tak Pu Lalsawta'n kan ban tlai dawn avangin dinner min siam sak a. A duh dan tak chuan kan nupuite hruai theuh turin min duh a, a sawm vek a. Amaherawhchu, kan haw leh a kan nupuite nena kan lo kal leh chuan a tlai tawh dawn bakah a then chu an lo kal duh tawh loh an hlauh avangin kan nupuite a sawm ta lova, keini ho zawng hian kan ei sak dawn a ni.

Tichuan, tuna kan session chu tiam chin awm lovin kan ti tawp dawn a ni.

The House is adjourned. SINE DIE